

लैव्यवस्था

होमबलि क नेम

1 यहोवा परमेस्सर मूसा क मिलापवाला तम्बू स बोलाएस अउ ओसे कहेस। यहोवा कहेस, 2“इस्त्राएल क मनइयन क निर्देस द्या कि जब तू लोगन में स कउनो मनई यहोवा बरे भेंट लइ आवइ तउ उ ओकर झुण्ड या खरका स होइ चाही।

3“अगर कउनो मनई आपन झुण्ड में स कउनो क होमबलि देइ तउ उ नर होइ चाही अउ गोरु में कउनो दोख नाही होइ चाही। उ मनई क चाही कि गोरु क मिलापवाला तम्बू क दुआरे प लइ जाइ। तब यहोवा भेंट क अंगीकार करी। 4इ मनई क आपन हाथ क गोरु क मूँड़े प धरइ चाही। जब एको बलि दीन्ह जाइ क होइ। यहोवा होमबलि क ओकर पाप बरे प्रायस्चित क खातिर अंगीकार करी।

5“मनई क चाही कि बछवा क यहोवा क समन्वा मारइ। तब हारून क याजक बेटवन क बछवा क रक्त मिलापवाला तम्बू क दुआरे प वेदी क चारिहुँ कइँती बहावइ चाही। 6याजक उ गोरु क चाम हटाइ देइ अउ ओका टूका में काटी। 7हारून क याजक बेटहनन क वेदी प काठ अउ आगी धरइ चाही। 8हारून क याजक बेटहनन क उ सबइ टूकन, (मूँड़े अउ चर्बी) क काठे प धरइ चाही। उ काठ वेदी प आगी क ऊपर होत ह।

9“याजक क गोरु क भितरे क हींसा अउ गोड़ी क पानी स धोवइ चाही। तब याजक क गोरु क इ सबइ हींसा क वेदी प बारइ चाही। इहइ होमबलि अहइ यानी एक तु उपहार, यहोवा क खुस करइ बरे एक तु सुगन्ध।

10“अगर कउनो मनई भेड़ी या बोकरी क होमबलि चढ़ावइ तउ उ एक अइसा नर गोरु क भेंट देइ जेहमों कउनो दोख न होइ। 11उ मनई क वेदी क उत्तर कइँती यहोवा क समन्वा गोरु क मारइ चाही। हारून क याजक बेटवन वेदी क चारिहुँ कइँती रक्त छिड़कइ चाही। 12तब याजक क चाही कि उ गोरु क टूकन में काटइ। गोरु क मूँड़ी अउ चर्बी काठे क ऊपर सिलसिला स धरइ चाही। काठ वेदी प आगी क ऊपर रहत ह। 13याजक क गोरु क भीतर क हींसन क अउ ओकरे गोड़े क पानी स धोवइ चाही। तब याजक क चाही कि उ गोरु क इ सबहिं हींसन क वेदी प बारइ। इ होमबलि अहइ यानी एक तु उपहार यहोवा क खुस करइ बरे एक तु सुगन्ध।

14“अगर कउनो व्यक्ति यहोवा क एक तु पंछी होमबलि क रूप चढ़ावत ह तउ इ पंछी फाख्ता या नान्ह कबूतर होइ चाही। 15याजक भेंट क वेदी प लिआइ। याजक पंछी क मूँड़े क काट देइ। तब उ पंछी क वेदी प बारी। पंछी क

खून वेदी कइँती बहइ चाही। 16याजक क पंछी क गटइ क थइली अउ ओकरे पखना क वेदी क पूरब कइँती लोकइ देइ चाही। इ उहइ जगह अहइ जहाँ उ पचे वेदी स निकारिके राखी रखई जात हीं।

17“तब याजक क पखना क लगे पंछी क जरूर काटइ चाही, मुला पंछी क दुइ हींसा में नाही बाँटइ चाही। याजक क वेदी क ऊपर आगी प धरी काठे क ऊपर पंछी क जरूर बारइ चाही। इ होमबलि अहइ यानी एक तु उपहार, यहोवा क खुस करइ बरे एक तु सुगन्ध।

अन्नबलि क नेम

2 “जब कउनो मनई यहोवा क अन्न बलि चढ़ावइ तउ ओकर भेंट पातर आटा क होइ चाही। उ मनई उ आटे प तेल नावइ अउ ओह प लोहबान धरइ। 2तब उ एँका हारून क याजक बेटवन क लगे जरूर लिआवइ चाही। तब याजक तेल अउ लोहबान स मिला भवा एक मूठी आटा लेइ अउर एको वेदी प स्मृति भेंट क रूप में बारइ देइ। इ यहोवा बरे एक भेंट एक सुहावना सुगन्ध होइ। 3बची भई अन्नबलि हारून अउ ओकरे पूतन बरे होइ। इ भेंट यहोवा क दीन्ह जाइवाली भेंटन में स सब त परमपवितर होइ।

चूल्हा में पकी अन्नबलि क नेम

4“जबहिं तू चूल्हा में पकी भइ अन्नबलि क भेंट लिआवा तउ इ बे खमीरे तेल मिला भवा बढ़िया आटा क फुलका या ऊपर स तेल डवा भवा बिना खमीरा क पतला केक होइ चाही। 5अगर तू भूँजइ वाली कइही स अन्नबलि लिआवत ह तउ इ तेल स मिला भवा बे खमीरे क गेहूँ क बढ़ियाँ आटा क केक होइ चाही। 6तोहका एँका टूका कइके कइउ हींसा में तोड़इ चाही अउ एँन प तेल चुपरइ चाही। इ अन्नबलि अहइ। 7अगर तू अन्नबलि क भूँजइ वाली कइही स लिआवत ह तउ इ तेल स मिला भवा गेहूँ क बढ़ियाँ आटा क होइ चाही।

8“तू इ चीजन स बनी अन्नबलि यहोवा खातिर लइ अउब्या। तू इ चीजन क याजक क लगे लइ अउब्या अउ उ ओनका वेदी प धरी। 9फिन याजक उ अन्नबलि में स एँकर कछू हींसा लइके ओका स्मृति भेंट क रूप में वेदी प बारि देइ। अउर इ एक तु उपहार, यहोवा क खुस करइ बरे एक तु सुगन्ध होइ। 10बची भइ अन्नबलि हारून अउ ओकरे बेटवन बरे होइ। इ भेंट यहोवा बरे चढ़ाई जाइवाली भेंटन में स परमपवितर होइ।

11“तोहका यहोवा क खमीर स या मधु स बना भवा अन्नबलि क भेंट क रूप में नाहीं चढ़ावइ चाही। 12तू पहिली फसल क खमीर स बना भवा अन्न भेंट यहोवा बरे भेंट क रूप में लाइ सकत ह, मुला एका खुस करइ बरे सुगन्ध क रूप में वेदी प बारइ नाहीं चाही। 13तोहका आपन लिआइ भइ हर एक अन्नबलि प नोन भी जरूर धरइ चाही। यहोवा स तोहरे करार क मुताबिक नोन क जरूरत क अनुसार अन्नबलि में धरइ स तोहका नाहीं रोकइ चाही। तोहका आपन सबहिं भेंटन प नोन धरइ चाही।

पहली पकी फसल स अन्नबलि क नेम

14“अगर तू पहिली पकी फसल स अन्नबलि लिआवत ह तउ तोहका भूँजी भइ ताजा अनाज लिआवइ चाही। इ अनाजे क दरिके नान्ह नान्ह टूकन में तोरा जाइ चाही। इ भेंट तोहार पहिली पकी फसल क जइसा अन्नबलि होइ। 15तोहका एँह प तेल नावइ अउ लोहबान जरूर धरइ चाही। इ अन्नबलि अहइ। 16अउर याजक क चाही कि उ स्मृति भेंट क रूप में दरा भवा अनाजे क कछू हींसा, तेल अउ एँह पइ धरा पूरा लोहबान क बारइ। इ यहोवा बरे उपहार होइ।

मेलबलि क नेम

3 “अगर कउनो मनई आपन झुण्ड में स एक तु नर या मादा जनावर यहोवा क समन्वा मेलबलि क रूप में भेंट चढ़ावत ह तउ ओहमाँ कउनो दोख नाही होइ चाही। 2इ मनई क आपन हाथ गोरु क मूँड़े प जरूर धरइ चाही। मिलापवाला तम्बू क दुआरे प उ मनई क जरिये उ गोरु क जरूर मारि डवइ चाही। तब हारून क याजक पूतन क वेदी क चारिहुँ कइँती रक्त बहावइ चाही। 3मेल बलि में स यहोवा क उपहार क रूप में भीतरी हींसन क ढौंपइ वाली अउ भितरे क हींसा में रहइवाली चर्बी क भेंट जरूर चढ़ावइ चाही। 4ओका दुइनउँ गुर्दन अउर ओका ढौँकइ वाला चर्बी क अउर पुट्टा के चर्बी क भी भेंट चढ़ावइ चाही। तउ उ झिल्ली जउन करेजा स चिपका भवा ह ओका भी गुर्दन क संग निकाारि लेइ चाही। 5तब हारून क बेटवन चर्बी क वेदी प बरिहीं। उ पचे चर्बी क आगी प धरी भइ लकड़ी प राखी। इ एक उपहार अहइ। एकर सुगन्धि यहोवा क खुस रखत ह।

6“अगर एक मनई यहोवा बरे आपन झुण्ड में स मेलबलि क रूप में नर अउर मादा गोरु लिआवत ह तब ओका सिरिफ उ गोरु क भेंट देइ चाही जेहमाँ कउनो दोख न होइ। 7अगर उ आपन बलि क रूप में एक तु मेमना लिआवत ह तउ ओका यहोवा क समन्वा बलि देइ चाही। 8ओका आपन हाथ गोरु क मूँड़े प धरइ चाही अउ मिलापवाला तम्बू क समन्वा ओका मारइ चाही। तब हारून क बेटवन वेदी प चारिहुँ कइँती गोरु क रक्त बहावइ चाही। 9इ मनई क चर्बी स भरी पूरी पूँछ गोरु क पिछली हड्डी क आखरी हींसा स कटा भवा चर्बी, अउ उ चर्बी जउन भीतरी हींसा क ढौँपि रहत ह अउ उ सबइ चर्बी जउन भितरे में अहइ क यहोवा क उपहार क रूप में भेंट चढ़ावइ

चाही। 10ओका दुइनउँ गुर्दन अउर ओनका ढौँपइ वाला चर्बी क अउर पुट्टा क चर्बी क भी भेंट चढ़ावइ चाही। उ झिल्ली जउन करेजा स चिपका भवा ह ओका भी निकाारि लेइ चाही अउर गुर्दन क संग चढ़ावइ चाही। 11तब याजक वेदी प एँका जरूर बारी। इ खइया अहइ, इ यहोवा बरे एक तु उपहार होइ।

मेलबलि क रूप में बोकरा क बलि क नेम

12“अगर ओकर बली एक तु बोकरा अहइ तउ उ ओका यहोवा क समन्वा जरूर भेंट देइ। 13उ व्यक्ति क बोकरा क मूँड़ी प हाथ धरइ चाही। ओका मिलापवाला तम्बू क समन्वा एको मारइ चाही। तबइ हारून क बेटवन बोकरा क रक्त वेदी प चारिहुँ कइँती बहाइहीं। 14तब उ व्यक्ति क बोकरा क एक हींसा यहोवा बरे उपहार क रूप में चढ़ावइ बरे लिआवइ चाही। इ मनई क भीतरी हींसा क अउ ओकरे चारिहुँ कइँती क चर्बी क भेंट जरूर चढ़ावइ चाही। 15ओका दुइनउँ गुर्दन अउर ओनका ढौँपइ वाला चर्बी क अउर पुट्टा के चर्बी क भी भेंट चढ़ावइ चाही। उ झिल्ली जउन करेजा स चिपका भवा ह ओका भी निकाारि लेइ चाही अउर गुर्दन क संग चढ़ावी चाही। 16याजक क वेदी प बोकरा क हींसा क जरूर बारइ चाही। इ खइया अहइ, यहोवा बरे एक तु उपहार। सबहिं चर्बी यहोवा क अहइ। 17इ नेम तोहार सबहिं अगुवा पीढ़ियन में हमेसा चलत रही। तू जहाँ कहुँ भी रहा, तोहका खून या चर्बी नाहीं जरूर खाइ चाही।”

संजोग स भवा पाप बरे पापबलि क नेम

4 यहोवा मूसा स कहेस, 2“इस्त्राएल क मनइयन स कहा: अगर कउनो व्यक्ति स संजोग क कारण कउनो अइसा पाप होइ जाइ जेका यहोवा न करइ क हुकुम दिहे अहइ तउ उ व्यक्ति क नीचे लिखी भई बात करइ चाही:

3“अगर अभिसिक्त याजक स कउनो पाप भवा होइ अउ इ लोगन क बुरा बनावत हीं तउ ओका आपन कीन्ह गए पाप बरे यहोवा क बलि चढ़ावइ चाही। ओका एक बछवा यहोवा क भेंट में जरूर देइ चाही जेहमाँ कउनो दोख न होइ। ओका यहोवा क बछवा पापबलि क रूप में जरूर चढ़ावइ चाही। 4अभिसिक्त याजक क उ बछवा क यहोवा क समन्वा मिलापवाला तम्बू क दुआरे प जरूर लावइ चाही। ओका आपन हाथ उ बछवा क मूँड़े प जरूर धरइ चाही अउ यहोवा क समन्वा ओका मारि देइ चाही। 5तब अभिसिक्त याजक क बछवा क कछू रक्त जरूर लेइ चाही अउ मिलापवाला तम्बू क अन्दर लइ जाइ चाही। 6याजक क आप अँगुरी खून में डवइ चाही अउ महा पवितर ठउर क पर्दा क समन्वा खून क सात दाई परमेस्सर क समन्वा छिछकारइ चाही। 7याजक क कछू खून महकउआ धूप क वेदी क सींगन प जरूर लगावइ चाही। इ वेदी यहोवा क समन्वा मिलापवाला तम्बू क अन्दर अहइ। याजक क बछवा क सारा खून होमबलि क वेदी क आधार प जरूर उडेरइ चाही। इ वेदी मिलापवाला तम्बू क दुआर प अहइ। 8अउर ओका पापबलि कीन्ह गइ बछवा क सारी चर्बी जरूर

निकारि लेइ चाही। ओका भितरे क हीसा क ढौंपि भइ चर्बी अउ ओकरे चारिहुँ कइँती क चर्बी क निकारि लेइ चाही। 9ओका दुइनँ गुर्दन अउर ओनका ढौंपइ वाला चर्बी अउ पुट्टा प क चर्बी क भी भेंट चढ़ाई चाही। ओका उ झिल्ली जउन करेजा स चिपका भवा ह ओका भी निकारि लेइ चाही अउर गुर्दन क संग चढ़ावइ चाही। 10याजक क इ सबइ चीजन ठीक उहइ तरह लेइ चाही जउने तरह उ इ सबइ चीजन मेलबलि क बछवा स लिहे रहा। याजक क होमबलि क वेदी प गोरु क भितरे क हीसन क जरूर बारि देइ चाही। 11मुला याजक क बछवा क चाम, मूँड़, गोड़, भीतर क हीसन अउ तने क बेकार हीसा जरूर निकारि देइ चाही। 12याजक क डेरा क बाहेर खास ठउरे इ हीसन जउन बछवा क सरीर क बचा भवा हीसा अहइ क हुँआ लइ जाइ चाही जहाँ राखी डारी जात ह। याजक क हुआँ काठ क आगी पइ जहाँ राखी क डारी दीन्ह गवा ह इन हीसन क जरूर बारइ चाही।

13“अइसा होइ सकत ह कि समूचइ इस्त्राएल रस्ट्र स बे जाने भए कउनो अइसा पाप होइ जाइ जेका न करइ बरे परमेस्सर हुकुम दिहे होइ। मुला अइसा होइ जात ह तउ उ सबइ दोखी होइहीं। 14जदि ओनका इ पापे क पता लागि जात ह तउ समूचइ रस्ट्र बरे एक ठु बछवा पापबलि खातिर चढ़ावा जाइ चाही। ओनका बछवा क मिलापवाला तम्बू क समन्वा लइ आवइ चाही। 15बुर्जुगन क बछवा क मूँड़े प आपन हाथ धरइ चाही। बछवा क यहोवा क अगवा मारइ चाही। 16तबहिँ अभिसिक्त याजक क बछवा क तनिक खून मिलापवाला तम्बू में लइ आवइ चाही। 17याजक क आपन अँगुरियन रक्त में जरूर बोरइ चाही अउ पर्दा क समन्वा सात दाई रक्त क छिछकारइ चाही। इ यहोवा क अहइ। 18तब याजक क कछू रक्त वेदी क सिंगियन प डवइ चाही। उ वेदी मिलापवाला तम्बू में यहोवा क समन्वा बा। याजक क सारा रक्त होमबलि क वेदी क नीव प डवइ चाही। उ वेदी मिलापवाला तम्बू क दुआरे प बा। 19तब याजक क गोरु क सारी चर्बी निकारि लेइ चाही अउ ओका वेदी प बारइ चाही। 20उ बछवा क संग जरूर वइसा ही करी जइसा उ पापबलि क रूप में चढ़ावा भवा बछवा क संग किहे रहा। इ तरह याजक मनइयन क पाप क पछतावा करत ह एहसे लोग छिमा पाइहीं। 21याजक डेरा क बाहेर बछवा क लइ जाइ अउर ओका हुआँ बारि देइ। इ पहिले क तरह होइ। इ पूरे समाज बरे पापबलि होइ।

22“जब कउनो सासक यहोवा आपन परमेस्सर क हुकुम तोड़इ क पाप अनजाने में करत ह, तउ उ दोखी समुझा जाई। 23अगर सासक क इ पाप क पता लागत ह तब ओका एक अइसा बोकरा जरूर लावइ चाही जेहमाँ कउनो दोख न होइ। इहइ ओकर भेंट होइ। 24सासक क बोकरा क मूँड़ि प हाथ जरूर धरइ चाही अउ ओका उ ठउरे प मारइ चाही जहाँ उ पचे होमबलि क यहोवा क समन्वा मारत हीं। इ एक पापबलि अहइ। 25याजक क पापबलि क कछू रक्त आपन अँगुरियन प जरूर लेइ चाही। याजक क होमबलि क वेदी क सिंगियन प रक्त जरूर छिछकारइ चाही। याजक क बचा भवा रक्त होमबलि क वेदी क

आधार प जरूर डवइ चाही। 26अउ याजक क बोकरा क सारी चर्बी वेदी प जरूर बारइ चाही। ओका एका उहइ तरह बारइ चाही जउने तरह उ मेलबलि क चर्बी बारत ह। इ तरह याजक सासक क पाप क पछतावा करत ह अउ सासक छिमा पाइहीं।

27“अइसा होइ सकत ह कि साधारण जनता में स कउनो मनई स संजोग स कउनो अइसा पाप होइ जाइ जेका यहोवा न करइ क हुकुम दिहेस ह। 28अगर उ व्यक्ति क आपन पाप क पता लागि जाइ तउ उ एक ठु मादा बोकरी जरूर लियावइ जेहमाँ कउनो दोख न होइ। इ उ व्यक्ति क पापबलि होइ। उ इ बोकरी क उ पाप खातिर लियावइ जउन उ किहस ह। 29ओका आपन हाथ गोरु क मूँड़ी प धरइ चाही अउ होमबलि क ठउरे प ओका बाँधइ चाही। 30याजक क उ बोकरी क कछू रक्त आपन अँगुरियन प जरूर लेइ चाही अउ याजक क होमबलि क वेदी क सिंगियन प रक्त जरूर छिड़कइ चाही। याजक क बचा भवा रक्त होमबलि क आधार प जरूर डवइ चाही। 31तब याजक क बोकरी क सारी चर्बी उहइ तरह निकारइ चाही जउने तरह मेलबलि स चर्बी निकारी जात रहा। याजक क एँका यहोवा बरे सुहावना सुगंध क रूप में धूप क वेदी प बारइ चाही। इ तरह याजक उ मनई क पापे क पछतावा कइ देइ अउ व्यक्ति छिमा पाइहीं।

32“अगर उ मनई पापबलि क रूप में एक ठु भेड़ी क बच्चा लिआवत ह तउ ओका एक मादा भेड़ी क बच्चा लइ आवइ चाही जेहमाँ कउनो दोख न होइ। 33मनई क ओकरे मूँड़ी प हाथ धरइ चाही अउ ओका उ ठउरे प पापबलि क रूप में मारइ चाही जहाँ उ पचे होमबलि क गोरु क मारत हीं। 34याजक क उ बोकरी क कछू रक्त आपन अँगुरियन प जरूर लेइ चाही अउ याजक क होमबलि क वेदी क सिंगियन प रक्त जरूर छिड़कइ चाही। याजक क बचा भवा रक्त होमबलि क आधार प जरूर डवइ चाही। 35याजक क मेमना क सारी चर्बी उहइ तरह लेइ चाही जउने तरह मेलबलि क चर्बी लीन्ह जात ह। याजक क मेमना क सारी चर्बी क यहोवा क उपहार क रूप में जरूर बारइ चाही। इ तरह याजक उ व्यक्ति क पापे क पछतावा करी अउ उ व्यक्ति छिमा पाइहीं।

एक मनई दुआरा अनजाने में कीन्ह गवा पाप

5 “जदि कउनो मनई अदालत में गवाही देइ बरे बोलावा जात ह अउ जउन कछू उ लखेस ह या अनकेस ह, ओका नाहीं बतावत तउ उ पाप करत ह। ओका ओकरे अपराध बरे जरूर ही सजा भोगइ क होइ। 2जदि कउनो व्यक्ति कउनो असुद्ध चिजियन क जइसे जंगली जनावर या घरेलू जनावर या रेंगइवाला कउनो जनावर क लहास क अनजाने में छुवत ह तउ उ व्यक्ति, जदि ओका एँकर पता नाहीं भी लागत तउ भी उ दोखी होइ। 3एक व्यक्ति अलग अलग चिजियन स असुद्ध होइ सकत ह। अगर कउनो प्रकार क मानव अनजाने में किसी असुद्ध मनई क छुअत ह, तउ जे टेम में ओका इ पता चली उ दोखी होइ। 4अगर एक व्यक्ति कउनो व्यक्ति स कछू नीक या खोट करइ

क बचन करत ह अउ ओका बिसरि जात ह, जब उ आपन बचन क सुमिरइ तब उ दोखी होइ। 5^{एह} बरे, अगर उ एनमौ स कउनो चिजियन क दोखी बाटइ तउ ओका आपन बुराई जेका उ किहेस ह क कबूल लेइ चाही। 6^{ओका} आपन झुण्ड मैं स एक तु मादा मेमना या एक तु बोकरी पापबलि बरे लावइ चाही। इ उ यहोवा बरे आपन दोख बरे किहेस ह। तब याजक उ व्यक्ति क पापे क पछतावा करी।

7^{अगर} कउनो मनई भेड़ी क बच्चा भेंट करइ मैं समरथ नाहीं अहइ तउ ओका दुइ फावता या कबूतरे क दुइ बच्चा यहोवा क भेंटे मैं देइ चाही। इ ओकरे पाप बरे दोखबलि होइ। एक तु पंछी दोखबलि बरे होइ चाही अउ दूसर होमबलि बरे होइ चाही। 8^उ मनई क चाही कि उ ओन पंछियन क याजक क लगे लइ जाइ। पहिले याजक क दोखबलि क रुप मैं एक पंछी चढ़ावइ चाही। याजक पंछी क गटई क मरोइ देइ। मुला याजक पंछी क दुइ हीसा मैं न बाँटी। 9^{तब} याजक क पापबलि क कछू रकत क वेदी क सिरन कईती प जरूर ड़ावइ चाही। तब याजक क बचा भवा रकत क वेदी क आधार प जरूर ड़ावइ चाही। इ एक दोखबलि अहइ। 10^{तब} याजक क नेम क मुताबिक होमबलि क रुप मैं यहोवा क दूसर पंछी क भेंट चढ़ावइ चाही। इ तरह याजक उ व्यक्ति क पापे क पछतावा करी अउ उ व्यक्ति छिमा पाइहीं।

11^{अगर} कउनो व्यक्ति दुइ फावता या दुइ कबूतर क भेंट चढ़ावइ मैं समरथ न होइ तउ ओका एपा* क दसवाँ हीसा महीन आटा जरूर भेंट चाही। इ ओकर पापबलि होइ। उ मनई क आटा प तेल नाहीं ड़ावइ चाही। ओका एँह प लोहबान नाहीं ड़ावइ चाही काहेकि इ पापबलि बाटइ। 12^{मनई} क आटा याजक क लगे जरूर लावइ चाही। याजक एहमौ स मुट्ठी भइ आटा निकारी। इ स्मृति भेंट होइ। याजक यहोवा क उपहार क रूप मैं वेदी क ऊपर आटा क बारी। इ पापबलि अहइ। 13^इ तरह याजक उ व्यक्ति क पाप क अपराध बरे पछतावा करी अउ उ छिमा पाइहीं। बची भइ आटा याजक बरे अन्नबलि क जइसा ही होइ।”

14^{यहोवा} मूसा स कहेस, 15^{एक} व्यक्ति गलती स यहोवा क पवितर चीजन मैं स एक तु चीज लइ सकत ह। अइसा हालत मैं उ व्यक्ति क एक तु बिना दोख क भेड़ा लइ आवइ चाही। इ भेड़ा यहोवा बरे ओकर दोखबलि होइ। तोहका उ भेड़ा क कीमत तय करइ बरे पवितर स्थान क सेकेल क अनुसार बइपरइ चाही। 16^उ व्यक्ति क पवितर चीजन बरे भुगतान जरूर करइ चाही अउर जउने चीजन क उ लिहस ह। ओका कीमत मैं पाँचवाँ हीसा जोरि देइ चाही अउर ओका इ धन याजक क देइ चाही। इ तरह याजक दोखबलि क भेड़ा क जरिये उ मनई क पाप क पछतावा करी अउ उ व्यक्ति छिमा पाइहीं।

17^{अगर} कउनो व्यक्ति पाप करत ह अउ जउन चीजन क न करइ क हुकुम यहोवा दिहे अहइ, ओनका करत ह तउ इ बात क कउनो महत्व नाहीं कि उ एको नाहीं जानत। उ मनई अपराधी अहइ अउर आपन पाप क जिम्मेदार होइ।

एपा लगभग दुइ लीटर क बराबर या दुइ क्वार्ट।

18^उ व्यक्ति क एक तु उचित कीमत क निर्दोख भेड़ा आपन झुण्ड स याजक क लगे लइ आवइ चाही। भेड़ा दोखबलि होइ। इ तरह याजक उ व्यक्ति क उ पाप बरे पछतावा करी जेका उ अनजाने मैं किहेस ह अउ उ छिमा पाइहीं। 19^{मनई} अपराधी अहइ चाहे उ इ न जानत होइ कि उ पाप करत बा। एह बरे ओका यहोवा क दोखबलि देइ क होइ।”

दूसर पाप बरे दोखबलि

6 यहोवा मूसा स कहेस, 2^{एक} मनई यहोवा क समन्वा दोखी समुझा जाइ अगर उ एनमौ स कउनो कार्य करत ह: उ एक पड़ोसी क उ सामान जउन ओका देखरेख करइ बरे दीन्ह ग अहइ क बरे छल कइ सकत ह, या उ वस्तु क आपन खुद क लइ ले सकत ह, या उ कछू चोरइ सकत ह, या आपन पड़ोसी क ठग सकत ह, 3^{या} ओका कउनो क हेरान चीज मिलइ अउर तब उ ओकरे बारे मैं लबार बोल सकत ह या कउनो मनई कछू करइ क झूठा बचन दइ सकत ह या उ कउनो अइसा अपराध कइ सकत ह जउन दूसर लोग करत ह। 4^{अगर} कउनो मनई अइसा पाप ओनमौ स करत ह अउ उ दोखी होत ह, ओका उ जरूर वापिस करइ चाही जउन उ चुराएस ह, या उ लाभ जउन उ ठगी स प्राप्त किहेस ह, या उ सामान जउन देखरेख बरे लिहस ह, या उ खोया भवा सामान जउन उ पाएस ह, क जरूर वापिस करइ चाही। 5^{या} जउन कउनो क बारे मैं झूठ बचन दीन्ह ग होइ, उ ओका ओन वस्तुअन क पूरा दाम चुकावइ चाही अउर तब ओका चीज क दाम क पाँचवाँ हीसा अलावा देइ चाही। ओका असली मालिक क धन जरूर देइ चाही। ओका इ उहइ दिन करइ चाही जउने दिन उ दोखबलि लिआवइ।

6^उ व्यक्ति क दोखबलि याजक क लगे जरूर लिआवइ चाही। इ जरूर झुण्ड स एक भेड़ा होइ चाही। भेड़ा मैं कउनो दोख नाहीं होइ चाही। इ जरूर उहइ दाम क होइ चाही जउन याजक कहइ। इ यहोवा बरे दोखबलि होइ। 7^{तब} याजक यहोवा क समन्वा उ मनई क ओन पापन क पछतावा करी अउ उ व्यक्ति सभी चीजन बरे छिमा पाइ जेनका उ किहेस अउ उ दोखी होइ गवा।”

होमबलि

8^{यहोवा} मूसा स कहेस, 9^{हारून} अउ ओकरे पूतन क इ हुकुम द्या: होमबलि क वेदी क अगी कुण्ड मैं पूरी रात भिन्सार होइ तलक जरूर राखइ चाही। वेदी क आगी क वेदी प जरूर बरत रहइ चाही। 10^{याजक} क सन क उत्तिम रेसा क बना भवा चोगा जरूर पहिरइ चाही। ओका आपन तन स चिपका जाँधिया पहिरइ चाही। तब याजक क होमबलि प पूरी तरह स जरि जाइ क पाछे वेदी स बची भइ राखी क उठावइ चाही। याजक क वेदी क बगल मैं राखी जरूर राखइ चाही। 11^{तब} याजक क आप ओढ़ना क उतारइ चाही अउ दूसर ओढ़ना पहिरइ चाही। तब ओका डेरा स बाहेर साफ ठउर प राखी लइ जाइ चाही। 12^{मुला} वेदी प आगी क जरूर बरत रहइ चाही। एका बुझइ नाहीं देइ चाही। याजक क रोज भिन्सारे वेदी प काठ जरूर बारइ चाही।

ओका वेदी प होमबलि जरूर रखइ चाही। ओका मेलबलि क चर्बी जरूर बारइ चाही। 13वेदी प आगी लगातर बरत रहइ चाही। एका बुझइ नाहीं चाही।

अन्नबलि

14“अन्नबलि क इ नेम अहइ कि हारून क पूतन क वेदी क समन्वा यहोवा बरे अन्नबलि जरूर लावइ चाही। 15याजक क अन्नबलि में स मूठी भइ उत्तिम ँँकर आटा, ँँकर तेल अउ ँँकर लोहबान लेइ चाही अउ ँँका वेदी पइ बारइ चाही। इ यहोवा बरे एक खुसबूदार अउर स्मृति भेंट होइ।

16“हारून अउ ओकरे बेटहनन क बची भइ अन्नबलि क खाइ चाही। अन्नबलि एक तरह क अखमीरी रोटी क भेंट अहइ। याजक लोगन क इ रोटी पवित्र ठउर में खाइ चाही। ओनका मिलापवाला तम्बू क आँगन में अन्नबलि खाइ चाही। 17अन्नबलि खमीर क मिलइके जरूर नाहीं पकावइ चाही। मई इ ओनका आपन उपहार में स ओकर हींसा दिहेस ह। इ पापबलि अउ दोखबलि क नाई बहोतइ पवित्र बाटइ। 18हारून क पूतन में स हर एक यहोवा क चढ़ाइ भइ भेंट स खाइ सकत ह। इ तोहरी पीढियन बरे सदा नेम बाटइ। जउन कउनो ँँका छुअब उ जरूर पवित्र होइ चाही।” *

याजक लोगन क अन्नबलि

19यहोवा मूसा स कहेस, 20“हारून अउ ओकरे बेटवन क जउन अन्नबलि लइ आवइ चाही उ इ अहइ। ओनका इ उ दिना ही करइ चाही जउने दिन हारून क अभिसेक भवा रहा। ओनका हमेसा एपा क दसवाँ हींसा महीन आटा अन्नबलि बरे जरूर लेइ चाही। ओनका ँँकर आधा भिन्सारे अउ आधा सौँझ में लइ आवइ चाही। 21उत्तिम महीन आटे में तेल जरूर डावइ चाही अउ ओका कड़ाही में जरूर भूँजइ चाही। जब इ भूँज जाइ तब ँँका जरूर भीतर लिआवइ चाही। भेंट पूर्ण रूप स जरूर टूकन में तोड़वइ चाही। तू पचन क यहोवा क चूरमा क भेंट जरूर चढ़ावइ चाही ँँकर सुगन्धि यहोवा क खुस करी।

22“हारून क सन्तानन में स, जउन हारून क जगह पइ अभिषिक्त अहइ, क इ अन्नबलि यहोवा बरे चढ़ावइ चाही। इ नेम हमेसा बरे अहइ। अन्नबलि यहोवा बरे पूर्ण रूप स जरूर जरावइ चाही। 23याजक क हर एक अन्नबलि पूरी तरह जरावइ चाही। एका खाई नाहीं चाही।”

पापबलि क नेम

24यहोवा मूसा स कहेस, 25“हारून अउ ओकरे पूतन स कहा: पापबलि बरे इ नेम अहइ कि पापबलि क हुवैइ मारा जाइ चाही जहाँ यहोवा क समन्वा होमबलि क मारा जात ह। इ बहोतइ पवित्र बाटइ। 26उ याजक क ँँका खाइ चाही, जउन पापबलि चढ़ावत ह। ओका पवित्र ठउरे प मिलापवाला

जउन ... चाही एकर अनुवाद इ तरह कीन्ह जाइ सकत ह: ँँका जउन कउनो छुअइ ओका पहिले पवित्र (सुद्ध) होइ लेइ चाही।

तम्बू क आँगन में एका खाइ चाही। 27कउनो मनई जउन पापबलि क गोस क छुअत ह ओका पवित्र होइ चाही। अगर छिछकारा भवा रक्त कउनो मनई क ओढ़ना प पड़त ह तउ ओन ओढ़नन क जरूर धोइ चाही। तू पचन क ओन ओढ़नन क सिरिफ एक पवित्र ठउरे में ही धोवइ चाही। 28अगर पापबलि कउनो माटी क बासन में उबाली जाइ, तउ उ बासन क जरूर फोड़ देइ चाही। अगर पापबलि क काँसा क बासन में उबाला जाइ, तउ बासन क जरूर माँजा जाइ अउ पानी स धोवा जाइ।

29“याजक परिवारे क कउनो मनई पापबलि क खाइ सकत ह। इ सबन्त पवित्र बाटइ। 30मुला अगर पापबलि क रक्त पवित्र ठउर प पछतावा करइ बरे मिलापवाला तम्बू में लइ जाइ। तउ पापबलि क आगी में बारि देइ चाही। याजकन क उ पापबलि जरूर नाहीं खाइ चाही।

दोखबलि

7 “दोखबलि खातिर इ नेम बाटइ। इ सबइ स पवित्र अहइ। 2याजक क दोखबलि क उहइ ठउरे पइ मारइ चाही जउने प उ सबइ होमबलि क मारत ह अउ ओका ँँकर रक्त क वेदी क चारिहूँ कइँती जरूर डावइ चाही।

3“याजक क दोखबलि क सारी चर्बी चढ़ावइ चाही। ओका चर्बी भरी पूँछ, भीतरी भाग क ढकइवाली चर्बी, 4दुइनउँ गुर्दन अउ ओकरे ऊपर क चर्बी, पुट्ठन क चर्बी जरूर भेंट करइ चाही। अउ करेजा क संग क झिल्ली जउन ओकर संग चिपकी भइ चर्बी अहइ गुर्दन क संग जरूर हटावइ चाही। 5याजक क वेदी प ओन सबहि चीजन क जरूर बारइ चाही। इ यहोवा बरे उपहार भेंट होइ। इ दोखबलि अहइ।

6“याजक परिवार स हर एक मरद दोखबलि खाइ सकत ह। एका बहोतइ पवित्र ठउर पइ खाइ चाही इ बहोतइ पवित्र बाटइ। 7दोखबलि क सबइ नेम पापबलि क नेम क जइसा अहइ। इ भेंट उ याजक क होइ जउन ऐसे ओकर बरे पछतावा करी। 8उ याजक, जउन बलि चढ़ावत ह, चमड़ा भी होमबलि स लइ सकत ह। 9हर एक अन्नबलि चढ़ावइवाला याजक क होत ह। याजक ओन सबइ अन्नबलि क लइ लेइ जउन चूल्हा में पकाई गइ होई, या कड़ाही में पकाइ गइ होई या तावा प पकी होई। 10अन्नबलि हारून क बेटवन क होइ। ओसे कउनो फर्क नाहीं पड़ी कि उ सबइ झुरान या तेल स सनी भइ अहइ। हारून क बेटवन याजक क नाई भागीदार होईहीं।

मेलबलि

11“इ सबइ मेलबलि क नेम अहइ, जेका कउनो मनई यहोवा क चढ़ावत ह: 12कउनो व्यक्ति मेलबलि आपन एहसान परगट करइ बरे लई आइ सकत ह। अगर एक व्यक्ति एहसान परगट करइ बरे बलि लिआवत ह तउ ओका तेल स सना भवा अखमीरी फुलका, अखमीरी केक अउ तेल स सना भवा उत्तिम आटा क फुलका भी लिआवइ चाही। 13उ व्यक्ति क आपन मेलबलि बरे खमीरी रोटियन क साथ आपन बलि जरूर लइ आवइ चाही। इ मेलबलि

अहइ जेका एक व्यक्ति यहोवा बरे एहसान देखावइ बरे लिआवत ह। 14ओन रोटियन में स एक तु उ याजक क दुआरा लइ जाइ जउन मेलबलि क रक्त क छिछकारत ह। 15इ मेलबलि क गोस उहइ दिन खावा जाइ चाही जउने दिन उ चढ़ावा जाइ। एक व्यक्ति परमेस्सर बरे एहसान परगट करइ बरे इ भेंट चढ़ावत ह। मुला तनिकउ भी गोस दुसर भिन्सारे बरे जरूर नाहीं बचइ चाही।

16“एक व्यक्ति मेलबलि यहोवा क उपहार देइ क इरादे स लइ आइ सकत ह या उ वादा क पूरा करइ बरे जेका उ पिहले परमेस्सर स किहस ह। अगर इ सच अहइ तउ बलि उहइ दिन खाई जाइ चाही जउने दिन उ ऐंका चढ़ावइ। जदि कछू बच जाइ तउ अगले दिना जरूर खाइ लेइ चाही। 17मुला अगर इ बलि क कछू गोस फिन भी तीसरे दिन बरे बचि जाइ तउ ओका आगी में बारि देइ चाही। 18अगर कउनो मनई मेलबलि क गोस तीसरे दिन भी खात ह, तउ यहोवा उ मनई स खुस नाहीं होइ। यहोवा उ बलि बरे कउनो सम्मान नाहीं देई। इ बलि एक असुद्ध वस्तु बन जाई। अगर कउनो उ बलि क खात ह तउ उ आपन पाप बरे उत्तरदायी होइ।

19“लोगन क अइसा गोस भी नाहीं खाइ चाही जेका कउनो असुद्ध वस्तु छुइ लेइ। ओनका इ गोस क आगी में बारि देइ चाही। उ पचे सबहिं मनइयन जउन सुद्ध होई इ मेलबलि क गोस खाइ सकत हीं। 20मुला अगर एक व्यक्ति अपवितर अहइ अउ यहोवा क मेलबलि में स कछू गोस खाइ लेइ, तउ उ व्यक्ति क ओकरे लोगन स निकाल दीन्ह जाहीं।

21“अगर एक व्यक्ति मानव जाति क असुद्ध चीज क या एक असुद्ध जनावरन क या कउनो असुद्ध घृणित वस्तु क छुअत ह अउ अगर उ यहोवा बरे मेलबलि क कछू गोस खाइ लेत ह तउ उ व्यक्ति क ओकरे लोगन में स जरूर निकाल कइ दीन्ह जाइ।”

22यहोवा मूसा स कहेस, 23“इस्त्राएल क मनइयन क सलाह देइ कि तू लोगन क गाइ, भेड़ी अउ बोकरी क चर्बी नाहीं खाइ चाही। 24तू पचे उ पसु क चर्बी क प्रयोग कइ सकत ह जउन खुद ही मरा होइ या दूसर जनावरन क जरिये मार दीन्ह ग होइ। मुला तू उ पसु क चर्बी कबहुँ नाहीं खाया। 25जदि कउनो मनई अइसा पसु क चर्बी खात ह जउन यहोवा क उपहार क रूप चढ़ावा ग होइ, तउ उ लोग क ओकरे मनइयन स निकाल दीन्ह जाइ।

26“तू पचे चाहे जहाँ कहुँ भी रहा, तू पचन क कउनो पंछी या पसु क रक्त कबहुँ नाहीं खाइ चाही। 27अगर कउनो व्यक्ति कछू रक्त खात ह, तउ उ व्यक्ति क ओकरे लोगन स निकाल दीन्ह जाइ।”

उत्तोलन बलि क नेम

28यहोवा मूसा स कहेस, 29“इस्त्राएल क लोगन स कहा: अगर कउनो व्यक्ति यहोवा बरे मेलबलि लइ आवइ, तउ उ मनई क उ भेंट क एक हींसा यहोवा क जरूर देइ चाही। 30ओका उ भेंट क उ हींसा आपन हाथे में यहोवा बरे लइके चलइ चाही। ओका पसु क चर्बी अउ छाती याजक

बरे लइके चलइ चाही। छाती क यहोवा क समन्वा ऊपर हिलावा जाइ चाही। इ उत्तोलन बलि होइ। 31तब याजक क वेदी पइ चर्बी बारइ चाही। मुला पसु क छाती हारून अउ ओकर पूतन क होइ। 32मेलबलि स दाहिन जाँघ हारून क पूतन में स याजक क जरूर देइ चाही। 33मेलबलि में स दाहिन जाँघ उ याजक क होइ जउन मेलबलि क चर्बी अउ रक्त मेलबलि बरे चढ़ावत ह। 34मई (यहोवा) उत्तोलन बलि क छाती अउ मेलबलि क दाहिन जाँघ इस्त्राएल क मनइयन स अंगीकार किहे हउँ अउ मई ओन चीजन क हारून अउ ओकरे बेटवन क देत अहउँ। इस्त्राएल क लोगन क जरिये इ नेम क सदा-सदा पालन कीन्ह जाइ चाही।”

35यहोवा बरे दीन्ह गइ उपहार हारून अउ ओकरे पूतन क अहइ, जब कबहुँ हारून अउ ओकरे पूतन यहोवा क याजक क रूप में सेवा करत हीं तब उ पचे बलि क उ हींसा पावत हीं। 36जउने समइ यहोवा याजकन क अभिसेक किहेस उहइ समइ उ पचे इस्त्राएल क लोगन क उ सबइ हींसा याजकन क देइ क हुकुम दिहेस। उ सबइ हींसा हमेसा याजकन क ओकर भाग क रूप में दीन्ह जाइ क अहइ।

37इ सबइ होमबलि, अन्नबलि, पापबलि, दोखबलि, याजकन क नियुक्ति, अउ मेलबलि क नेम अहइ। 38यहोवा सिनाई पहाड़े पइ इ सबइ नेम मूसा क दिहस। यहोवा इ सबइ नेम ओह दिन दिहस जउने दिन उ इस्त्राएल क मनइयन क सिनाई रेगिस्तान में यहोवा बरे आपन भेंट लिआवइ क हुकुम दिहे रहा।

मूसा हारून अउ ओकरे पूतन क सेवा करइ बरे अभिसेक करत ह

8 यहोवा मूसा स कहेस, 2“हारून अउ ओकर पूतन ओकरे वस्त्रन, अभिसेक क तेल, पापबलि बरे बर्धा, दुइ भेड़ी अउ अखमीरी रोटी क डलिया क संग लइ आवा 3अउर सबहिं लोगन क मिलापवाला तम्बू क दुआरे प जमा करा।”

4मूसा उहइ किहस जउन यहोवा ओका हुकुम दिहस। मनइयन मिलापवाला तम्बू क दुआरे प एक संग मिलेन। 5तब मूसा लोगन स कहेस, “इ उहइ बाटइ जेका करइ क यहोवा हुकुम दिहे अहइ।”

6तब मूसा हारून अउ ओकरे पूतन क लइ आवा। उ ओनका पानी स धोएस। 7तब मूसा हारून क कमीज पहिराएस। मूसा हारून क चारिहुँ कइँती एक तु पेटी बाँधिस। तब मूसा हारून क चोगा पहिराएस। तब ओह पइ एपोद* पहिराएस। उ ओह पइ सुन्दर बुना भवा पेटी बाँधिस। 8तब मूसा हारून क निआव क थइला पहिराएस। तब मूसा निआव क थइला मैं ऊरीम अउ तुम्मीम धरेस। 9मूसा हारून क मूँडे पइ पगड़ी भी बाँधिस। मूसा पगड़ी क अगले भाग पइ सोना क पवितर पतर क मुकुट बाँधिस। मूसा इ यहोवा क आदेस क मुताबिक किहस।

10तब मूसा अभिसेक क तेल लिहस अउ पवितर तम्बू अउ एहमाँ क सबहिं चीजन प छिछकारेस। इ तरह मूसा ओनका पवितर किहस। 11मूसा अभिसेक क कछू तेल वेदी

एपोद एक खास अंगरख जेका महा याजक पहिरत रहा।

पड़ सात दाईं छिछकारेस। मूसा वेदी, ओकरे उपकरण अउ तस्तरियन क अभिसेक किहस। मूसा खोरा अउ ओकरे आधार पड़ भी तेल छिछकारेस। इ तरह मूसा ओनका पवित्र किहस। 12तब मूसा अभिसेक क कछू तेल क हारून क मूँड़े प डाएस। इ तरह उ हारून क पवित्र किहस। 13तब मूसा हारून क बेटवन क लिआएस अउ ओनका कमीज पहिराएस। उ ओन पड़ पेटियन क बाँधेस। तब उ ओनके मूँड़े पड़ पगड़ियन क बाँधेस। मूसा इ सबइ सब वइसेन ही किहस जइसे यहोवा हुकुम दिहे रहा।

14तब मूसा पापबलि क बर्धा लिआएस। हारून अउ ओकर पूतन आपन हाथे क पापबलि क बर्धा क मूँड़े प धरेन। 15तब मूसा बर्धा क मारेस अउ रक्त जमा किहस। मूसा आपन अँगुरियन स तनिक रक्त लिहस अउ वेदी क सबहिं सिंगियन पड़ छिछकारेस। इ तरह मूसा वेदी क बलि बरे सुद्ध किहस। तब मूसा वेदी क आधार पड़ रक्त क उड़ेस। इ तरह मूसा वेदी क सुद्ध किहस अउ एको पापन क प्रायश्चित करइ बरे तइयार किहस। 16मूसा बर्धा क भितरी भाग स सबइ चर्बी लिहस। मूसा दुइनउँ गुर्दा अउ ओनकइ ऊपर क चर्बी क संग करेजा स चिपकइ वाली चर्बी लिहस। तब उ ओनका वेदी प बारेस। 17मुला मूसा बर्धा क चाम, ओकर गोस अउ बदन क बेकार भितरी भाग क डेरा क बाहेर लइ गवा। मूसा डेरा क बाहेर आगी में ओन चीजन क जराएस। मूसा इ सबइ वइसा ही किहस जइसा यहोवा हुकुम दिहे रहा।

18मूसा होमबलि क भेड़ा क लइ आवा। हारून अउ ओकर बेटवन आपन हाथ भेड़ा क मूँड़े प धरेन। 19तब मूसा भेड़ा क मारेस। उ वेदी क चारिहुँ कइँती रक्त छिछकारेस। 20मूसा एको टूका में काटेस। तब मूसा ओकर मूँड़े, टूका अउ चर्बी क जराएस। 21मूसा भितरी भागन अउ गोड़े क पानी स धोएस। तब मूसा समूचइ भेड़ा क वेदी पड़ जराएस। इ होमबलि रही। इ यहोवा क बरे एक ठु सुगन्धि उपहार रही। मूसा यहोवा क हुकुम क मुताबिक उ सबइ काम किहस।

22तब मूसा दूसर भेड़ा क लइ आवा। इ भेड़ा क उपयोग हारून अउ ओकरे बेटवन क याजक नियुक्त करइ बरे कीन्ह गवा। हारून अउ ओकर बेटवन आपन आपन हाथन क भेड़ा मूँड़े प धरेन। 23तब मूसा भेड़ा क मारेस। उ भेड़ा क तनिक रक्त हारून क काने क निचले सिरे, दाहिन हाथे क अंगूठा अउ ओकर दाहिन गोड़े क अंगूठा पड़ लगाएस। 24तब मूसा हारून क बेटवन क वेदी क निचके लिआवा। मूसा तनिक रक्त ओनके दाहिन कान क निचले सिरे, दाहिन हाथ क अंगूठा, अउ ओनके दाहिन गोड़े क बड़का अंगुरि पड़ लगाएस। तब मूसा वेदी क चारिहुँ कइँती रक्त उड़ेस। 25मूसा चर्बी, चर्बी भरी पूँछ, भितरी भाग क सारी चर्बी, करेजा स चिपकइवाली चर्बी, दुइनउँ गुर्दन अउ ओनकइ चर्बी अउ दाहिन जाँघ क लिहस। 26अखमीरी रोटी क एक ठु टोकरी हर रोज यहोवा क अगवा धरा जात रहेन। मूसा टोकरी में स एक ठु तेल स सनी रोटी, अउर एक अखमीरी फुल्का लिहस। मूसा ओन टूकन क चर्बी अउ भेड़ा क दाहिन जाँघे प धरेस। 27तब मूसा ओन सबहिं क हारून अउ

ओकरे बेटवन क हाथे में धरेस। मूसा ओन टूकन क यहोवा क आगे उत्तोलन बलि क रूप में हाथन क ऊपर उठावाएस। 28तब मूसा ओन चीजन क हारून अउ ओकरे बेटवन क हाथन स लिहस। मूसा ओनका वेदी प होमबलि क ऊपर जराएस। इ तरह उ बलि हारून अउ ओकरे पूतन क याजकन नियुक्त करइ बरे रही। इ यहोवा क खुस करइ बरे एक ठु सुगन्धि उपहार रही। 29तब मूसा उ भेड़ा क छाती लिहस अउ यहोवा क समन्वा उत्तोलनबलि बरे हिलाएस। याजकन क नियुक्त करइ बरे भेड़ा में स मूसा क हीसा रहा। इ ठीक वइसा ही रहा जइसा यहोवा मूसा क हुकुम दिहे रहा।

30मूसा अभिसेक क कछू तेल अउ वेदी पड़ क कछू रक्त लिहस। मूसा ओहमा स कछू हारून अउ ओकरे ओढ़नन पड़ छिछकारेस अउ कछू हारून क ओन पूतन प जउन ओकरे संग रहेन अउ कछू ओनकइ ओढ़नन प छिछकारेस। इ तरह मूसा हारून, ओकरे वस्त्रन, ओकरे पूतन अउ ओनकइ ओढ़नन क पवित्र बनाएस।

31तब मूसा हारून अउ ओकरे बेटवन स कहेस, “का तू पचन क मोर आदेस* याद अहइ? मई कहे रहेउँ, ‘हारून अउ ओकर पूत इ सबइ चीजन क खइहीं।’ एह बरे याजकन नियुक्ति संस्कार क याजक स रोटी अउ गोस ल्या। मिलापवाला तम्बू क दुआरे पड़ उ गोस क पकावा। तू पचे उ गोस अउ उ रोटी क उहइ ठउर प खाब्या। 32अगर कछू गोस या रोटी बचि जाइ तउ ओका जराइ द्या। 33याजक नियुक्ति संस्कार सात दिना तलक चली। तू पचे मिलापवाला तम्बू स तब तक नाहीं जाब्या जब तक तोहार याजक नियुक्ति संस्कार क समइ पूरा नाहीं होइ जात। 34यहोवा ओन काम क करइ क आदेस दिहे रहा जउन आज कीन्ह गए। उ तू पचन क आपन क प्रायश्चित करइ बरे इ आदेस दिहे रहा। 35तू पचन क मिलापवाले तम्बू क दुआर प सात दिना तलक लगातार दिन अउ रात जरूर रहइ चाही। अउर तू पचे यहोवा क आदेस क पालन करब्या एँह बरे तू नाहीं मरिब्या। यहोवा मोका इ आदेस दिहे रहा।”

36एँह बरे हारून अउ ओकरे पूतन उ सब कछू किहन जेका करइ क आदेस यहोवा मूसा क दिहे रहा।

परमेस्सर क जरिये याजकन क स्वीकृति

9 अठवें दिन, मूसा हारून अउ ओकरे पूतन क बोलाएस। उ इस्त्राएल क बुजुर्गन (नेता लोगन) क भी बोलाएस। 2मूसा हारून स कहेस, “आपन झुण्ड में स एक ठु बछवा अउ एक ठु भेड़ा ल्या। ओन में कउनो दोख नाहीं होइ चाही। बछवा पापबलि बरे होइ अउ भेड़ा होमबलि बरे होइ। इ सबइ गोरुअन क यहोवा क समन्वा बलि द्या। 3इस्त्राएल क लोगन स कहा, ‘पापबलि बरे एक ठु बकरा ल्या। एक बछवा अउ एक मेमना होमबलि बरे ल्या दुइनउँ एक बरिस क होइ चाही। इ सबइ जनावरन में कउनो दोख

मोर आदेस हिआँ मोर आदेस स मतलब अहइ मोरे जरिये दीन्ह गवा यहोवा क आदेस मूसा क बचन, यहोवा क बचन अहइ काहेकि उ यहोवा क प्रवक्ता अहइ। एह बरे हिआँ मूसा यहोवा क आदेस क मोर आदेस कहेस ह।

नाहीं होइ चाही। 4एक साँड़ अउ एक भेड़ा मेलबलि बरे ल्या। ओन जनावरन क अउर तेल स मिली भइ अन्नबलि ल्या अउ ओनका यहोवा क भेंट चढ़ावा। काहेकि आजु यहोवा क महिमा तोहरे समन्वा परगट होइ।”

5एह बरे सबहिं लोग मिलापवाला तम्बू में आएन अउर उ पचे ओन सबहिं चीजन क लियाएन जेनके बरे मूसा आदेस दिहे रहा। सबहिं लोग यहोवा क आगे ठाड़ भएन। 6मूसा कहेस, “तू पचे उहइ किहया ह जेका यहोवा हुकुम दिहस। तू लोग यहोवा क महिमा देखब्या।”

7तब मूसा हारून स कहेस, “जा अउर उ करा जेकरे बरे यहोवा हुकुम दिहे रहा। वेदी क निअरे जा अउर पापबलि अउ होमबलि चढ़ावा। इ सबइ आपन अउर लोगन क पापन क प्रायश्चित्त बरे करा। तू लोगन क लाई भइ बलि ल्या अउर ओका यहोवा क अर्पित करा। इ ओनके पापन बरे प्रायश्चित्त होइ।”

8एह बरे हारून वेदी क लगे गवा। उ बछवा क पापबलि बरे मारेस। इ पापबलि खुद ओकरे अपने बरे रही। 9तब हारून क पूतन हारून क लगे रक्त लिआएन। हारून आपन अंगुरियन क रक्त में डाएस अउ वेदी क सींगन पइ ऐंका लगाएस। तब हारून वेदी क आधार पइ रक्त उड़ेरेस। 10हारून पापबलि स चर्बी, गुर्दन अउ करेजा क संग चिपका भवा झिल्ली जमा किहेस। उ ओन सब क वेदी प जराएस। उ उहइ प्रकार किहस जउने तरह यहोवा मूसा क आदेस दिहे रहा। 11तब हारून डेरा क बाहर गोस अउ चाम क बारेस।

12एकरे पाछे, हारून होमबलि बरे जनावरन क मारेस। हारून क पूत रक्त क हारून क लगे लिआएन अउ हारून वेदी क चारिहुँ कइँती रक्त डाएस। 13हारून क बेटवन ओन टूकन अउ होमबलि क मूँड़ हारून क दिहस। तब हारून ओन सबन क वेदी पइ बारेस। 14हारून होमबलि क भितरी भागन क अउ गोड़े क धोएस अउ उ ओनका वेदी प बारेस।

15तब हारून लोगन क बलि लावा। उ लोगन क बरे पापबलि वाला बोकॅरा क मारेस। उ बोकरा क पहिले क नाई पापबलि बरे चढ़ाएस। 16हारून होमबलि लावा अउ उ उ बलि चढ़ाएस। वइसेन ही जइसे यहोवा आदेस दिहेस। 17हारून अन्नबलि क वेदी क लगे लिआवा। उ मूठी भइ अनाज लिहस। अउ भिन्सारे क नित्य बलि क संग उ वेदी प धरेस।

18हारून लोगन बरे मेलबलि क साँड़ अउ भेड़ा क मारेस। हारून क बेटवन रक्त क हारून क लगे लिआएन। हारून इ रक्त क वेदी क चारिहुँ कइँती उड़ेरेस। 19हारून क बेटवन साँड़ अउ भेड़ा क चर्बी भी लाएन। उ पचे साथ ही साथ चर्बी भरी पूँछ, भितरी भाग क ढकड़वाली चर्बी, गुर्दन अउ करेजन स चिपका भवा झिल्ली भी लिआएन। 20हारून क बेटवन चर्बी क इ सबइ भागन क साँड़ अउ भेड़ा क छाती प धरेस। हारून चर्बी क भागन क लइके ओका वेदी पइ बारेस। 21मूसा क आदेस क मुताबिक हारून छातियन अउ दाई जाँघ क उतोलन भेंट बरे यहोवा क समन्वा हाथन में ऊपर उठाएस।

22तब हारून आपन हाथ लोगन कइँती उठाएस अउ ओनका आसीबीद दिहस। हारून पापबलि, होमबलि अउ मेलबलि क चढ़ावइ क पाछे वेदी स तरखाके उतरि आवा।

23मूसा अउ हारून मिलापवाला तम्बू में गएन। ओकर पाछे हुआँ स बाहेर आइके उ पचे लोगन क आसीबीद दिहन। अउर यहोवा क तेज सबहिं लोगन क समन्वा परगट भवा। 24यहोवा स आगी परगट भइ अउ उ वेदी पइ होमबलि अउ चर्बी क जराएस। सबहिं लोगन जब इ लखेन तउ उ पचे चिल्लानेन अउ उ पचे धरती पइ भराइके प्रणाम किहेन।

परमेस्सर क ज्वाला क जरिये बिनास

10 फिन तब हारून क बेटवन नादाब अउ अबीहू धूप जरावइ बरे तस्तरियन क लिहन, ओह में आग लगाएन अउ धूप क आगी पइ धरेन। तउ उ पचे एक तु अनोखी आगी* क उपयोग यहोवा क समन्वा किहन जेकरे प्रयोग क हुकुम उ ओनका नाहीं दिहे रहा। 2एह बरे यहोवा स ज्वाला परगट भइ अउ उ नादाब अउ अबीहू क बरबाद कइ दिहस।

3तब मूसा हारून स कहेस, “यहोवा कहत ह, ‘जउन मोरे लगे आवइ ओनका मोर संग जरूर पवितरता क बर्ताव करइ चाही। अउ सबहिं लोगन क मोका सम्मान देइ चाही।’” हारून खामोस रहा।

4हारून क चाचा उज्जीएल क दुइ पूत रहेन। उ पचे मीसाएल अउ एलसाफान रहेन। मूसा ओन बेटवन स कहेस, “पवितर ठउर क समन्वा जा। आपन चचेरा भाइयन क ल्हासे क उठावा अउ ओनका डेरा क बाहेर लइ जा।”

5एह बरे मीसाएल अउ एलसाफान मूसा क आदेस मानेन। उ पचे नादाब अउ अबीहू क ल्हासन क बाहेर लइ आएन। नादाब अउ अबीहू तब तलक आपन खास अंगरखा पहिरे रहेन।

6तब मूसा हारून अउ ओकरे दूसर पूतन एलीआजार अउ ईतामार स बात किहस। मूसा ओनसे कहेस, “कउनो सोक परगट जिन करा। आपन ओढ़ना जिन फाड़ा या आपन बासन क जिन बिखरावा। तू मरब्या नाहीं अउ यहोवा क गुस्सा तोहार समूचइ धर्मिक सभा क भंग नाहीं करी। इस्राएल क समूचा राष्ट्र तोहार सम्बंधी अहइ। उ पचे यहोवा क जरिये नादाब अउ अबीहू क बारइ क बारे में रोइ सकत हीं। 7मुला तू लोगन क मिलापवाला तम्बू नाहीं तजइ चाही। अगर तू पचे बाहेर जाब्या तउ मर जाब्या। काहेकि यहोवा क अभिसेक क तेल तू पचन पइ अहइ।” तउ हारून, एलीआजार अउ ईतामार मूसा क आग्या मानेन।

8तब यहोवा हारून स कहेस, 9“तोहका अउ तोहरे पूतन दाखरस या सराब* उ समइ नाहीं पिअइ चाही जब तू पचे मिलापवाला तम्बू में आवा। अगर तू पचे अइसा करब्या तउ

अनोखी आगी सम्भवतः एकर अरथ इ होइ सकत ह कि उ पचे उ आगी मन्दिर क बाहेर लाएस रहा वेदी क आगी क उपयोग करइ क बजाए। बलि क नेम क अनुसार।

सराब एक ठू पेय जेका अनाज क खमीर स बनावा जात ह। इ प्राचीन मिस्र आम रहा।

मर जाब्या। इ नेम तोहरी सारी पीढ़ियन में हमेसा चलत रही। 10तू पचन क, पवितर अउ अपवितर तथा सुद्ध अउ असुद्ध चिजियन में फरक करइ चाही। 11यहोवा मूसा क आपन नेम दिहस अउ मूसा ओन नेमन क लोगन बरे दिहस। हारून, तोहका ओन सबहिं नेमन क सिच्छा लोगन क देइ चाही।”

12मूसा हारून अउ ओकरे बचा भवा दुई पूतन एलीआज़ार अउर ईतामार स बात किहस। मूसा कहेस, “कछू अन्नबलि यहोवा क उपहार में अबहुँ तलक बची भइ अहइ। तू लोग अन्नबलि क उ हीसा खाइ सकत ह। मुला तू लोगन क एको बिना खमीर मिलाए खाइ चाही। एको वेदी क लगे खा। काहेकि उ भेंट बहोतइ पवितर बाटइ। 13उ उ भेंटन क हीसा अहइ, जउन यहोवा बरे उपहार क रूप में भेंट चढ़ाइ ग रहेन। जउन नेम मई तोहका बताएउँ ह, उ सिखावत ह कि उ हीसा तू अउर तोहार पूतन क बाटइ। मुला तोहका एको पवितर ठउरे प खाइ चाही।

14“तू, तोहार बेटवन अउ बिटियन भी उत्तोलन बलि स छाती क अउ मेलबलि स जाँघि क खाइ सकिहीं। इ सबइ क तोहका जरूर पवितर ठउरे पइ खाइ चाही। मुला तोहका इ सबइ क सुद्ध जगह पइ खाइ चाही। काहेकि इ सबइ मेलबलि में स मिली अहइ। इस्राएल क लोग इ बलि यहोवा क देत हीं। ओन जनावरन क कछू भाग क लोग खात हीं मुला छाती अउ जाँघ तोहार हीसा अहइ। 15लोगन क आपन चर्बी क भेंट जरूर लिआवइ चाही। ओनका मेलबलि क जाँघ अउ उत्तोलन बलि क छाती जरूर लिआवइ चाही। ओका यहोवा क समन्वा जरूर उत्तोलन करइ चाही। इ बलि तोहार हीसा होइ। इ तोहार अउ तोहार गदेलन क होइ। यहोवा क आदेस क मुताबिक बलि क उ भाग हमेसा तोहार होइ।”

16मूसा पापबलि क बोकरा क बारे में पूछेस। मुला ओका पहिले ही बारि दीन्ह गवा रहा। मूसा हारून क बाकी बेटवन अलावा एलीआज़ार अउ ईतामार पइ बहोतइ कोहाइ गवा। मूसा कहेस, 17“तू लोगन क इ बोकरा पवितर ठउरे पइ खाइ क रहा। इ बहोतइ पवितर बाटइ। तू लोगन एँका यहोवा क समन्वा काहे नाहीं खाया? यहोवा इ तोहका धार्मिक सभा क पापन क छिमा बरे ओकर प्रायश्चित करइ बरे दिहस। 18देखा! तू उ बोकरे क रक्त पवितर जगह क भीतर नाहीं लिआया। तू पचन क इ बोकरा पवितर ठउरे प खाइ क रहा जइसा कि मई आदेस दिहेउँ ह।”

19मुला हारून मूसा स कहेस, “लखा आज उ पचे आपन पापबलि अउ होमबलि यहोवा क समन्वा लाएन। मुला तू जानत अहा कि आजु मोरे संग का भवा ह! का तू इ समझत अहा कि अगर मई पापबलि क आज खाब तउ खुस होइ नाहीं।” * 20जब मूसा इ सुनेस तउ सहमत होइ गवा।

माँस भोजन क नेम

11 यहोवा मूसा अउ हारून स कहेस, 2“इस्राएल क लोगन स कहा: इ सबइ पसु अहई जेनका तू खाइ

का तू ... नाहीं हारून आपन दुइ पूतन क मउत स एँतना जियाद परेसान रहा कि पापबलि क नाहीं खाइ सका रहा।

सकत ह: 3अगर पसु क खुर दुइ हिस्सा में बँटा होइ अउ उ पसु जुगाली करत होइ तउ तू उ पसु क गोस खाइ सकत ह।

अइसे पसु जेनकइ गोस नाहीं खाइ चाही

4-6“कछू पसु जुगाली* करत हीं, मुला ओनकइ खुर नाहीं फाट होतेन। तउ अइसे पसु क जिन खा। ऊँट, सापान अउ खरहा वइसेन दर्जा क अहई। एह बरे उ सबइ तोहरे बरे असुद्ध अहई। 7दुसर पसु दुइ हिस्सा में बँटा भवा खुरवाला अहई, मुला उ पचे जुगाली नाहीं करतेन। ओन पसुअन क जिन खा। सुअर वाइसेन ही अहई, एह बरे उ सबइ असुद्ध अहई। 8ओन पुसुअन क गोस जिन खा। ओनके लहासे क जिन छुआ। उ सबइ तोहरे बरे असुद्ध अहई।

समुद्री भोजन क नेम

9“अगर कउनो जनावर समुदर या नदी में बसत ह अउ ओकरे पखना अउ परत होत हीं तउ तू उ जनावर क खाइ सकत ह। 10-11मुला जदि जनवार समुदर या नदी में बसत ह अउ ओकरे पखना अउ परत नाहीं होतिन तउ उ जनावर क तोहका नाहीं खाइ चाही। तोहका उ तरह जनावरन क घिनौना समुझइ चाही। उ तरह क पसु क गोस जिन खा। इहाँ तक कि ओकर लहासे क जिन छुआ। 12तोहका पानी क हर एक पसु क जेकरे पखना अउ परत नाहीं होतिन असुद्ध जनावर में समझइ चाही। तोहका उ तरह क समुदर क जनावरन क घिनौना चिजियन में स समुझइ चाही।

अभोज्य पंछिन

13“तोहका नीचे लिखे भए पंछिन क भी घिनौना पंछी समझइ चाही। इन पंछिन में स कउनो क जिन खा: उकाब, गीध, सिकारी पंछी, 14चील, सबहिं तरह क बाज नाउँ क पंछी, 15सब तरह क काला पंछी, 16सुतुर्मुर्ग, सींगवाला कुचकुचवा, समुद्री जलमुर्गा, सबहिं प्रकार क बाज, 17कुचकुचवा, समुद्री कौआ, बड़का कुचकुचवा, 18जलमुर्गा, मछरी खाइवाला पेलिकन नाउँ क खेत जल पंछी, समुद्री गीध, 19हंस, सब तरह क सारस, कठफोड़वा अउ चमगादड़।

कीड़ा पतंगा खाइ क नेम

20“अउ सबहिं अइसे उड़इवाला कीड़ा पतंगा जउन चार गोड़े प चलत इ सबइ तोहार लइ घिनौना अहइ। 21मुला अगर उड़इवाला कीड़ा पतंगा क पखना होत हीं अउ चार गोड़े प चलत ह अगर ओकरे गोड़े क ऊपर टांगन में अइसे जोड़ अहई कि उ जमीन प उछरि सकइ तउ तू ओन पतंगन क खाइ सकत ह। 22इ सबइ बाटेन जेनका तू खाइ सकत ह: हर किसिम क टिडियन, हर किसिम क उड़इवाला

जुगाली कछू पसु गाइ क तरह एक स जियाद पेट वाला होत हीं। पहिले पेट में चार लील लीन्ह जात ह अउ ओकर कछू हिस्सा बचि जात ह। पाछे उ हिस्सा पसु आपन मुँह में लिआवत ह अउ फुन चबात ह। इ चार क चबाब जुगाली कहा जात ह।

टिड्डियन, हर तरह क झींगुर, हर तरह क घास चट कइ देइवाला टिड्डन।

23“मुला दूसर उ सबहिं उड़इवाला कीड़ा पतंगन जउन चार गोड़े प चलि सकत हीं, तोहरे बरे घिनौना प्राणी अहइ। 24उ सबइ कीड़ा पतंगन तोहका सबन क असुद्ध करिहीं। कउनो मनई जउन मरे भए कीड़ा पतंगन क छुई, साँझ तलक असुद्ध रही। 25अगर कउनो मनई ओन मरे भए किरवन में स कउनो क उठावत ह तउ उ मनई क आपन ओढ़ना धोइ लेइ चाही। उ मनई साँझ तलक असुद्ध रही।

घिनौना पसुअन क विसय में अन्य नेम

26-27“कछू जनावरन क खुर होत ह मुला उ खुर दुइ भाग में फटि नाही होतेन। कछू जनावर जुगाली नाही करतेन। कछू जनावरन क खुर नाही होतेन, उ आपन पंजे पइ चलतहीं। इ सबइ प्रकार क जनावरन असुद्ध अहइँ। अगर एक व्यक्ति ओकर लहासे क छुअत ह तउ उ व्यक्ति साँझ तलक असुद्ध रहीं। 28अगर एक व्यक्ति ओकर लहासे क उठावत ह तउ उ व्यक्ति क आपन ओढ़ना क जरूर धोवइ चाही। उ व्यक्ति साँझ तलक असुद्ध रहीं। उ सबइ जनावरन तू पचनक बरे असुद्ध अहइ।

रेगंडवालन पसुअन क बारे में नेम

29“इ सबइ रेगंडवालन पसु तू पचन बरे असुद्ध अहइँ: छछून्दर, चूहा, सबहिं तरह क गिरगिट, 30छिपकली, मगरमच्छ, गिरगिट, रेगिस्तानी गोहेर, अउ रंग बदलत गिरगिट। 31इ सबइ रेगंडवाला पसु तोहरे बरे असुद्ध अहइँ। कउनो मनई जउन ओन मरे भएन क छुई साँझ तलक असुद्ध रही।

घिनौना पसुअन क बारे में नेम

32“अगर कउनो असुद्ध पसुअन में स एक मरा भवा पसु कउनो चीज प गिर पड़इ तउ उ चीज असुद्ध होइ जाइ। इ काठ, चाम, कपड़ा, सोक ओढ़ना या कउनो भी औजार होइ सकत ह। जउन कछू भी उ होइ ओका पानी स धोवइ चाही। इ साँझ तलक असुद्ध रही। तबहिं इ फुन सुद्ध होइ जाइ। 33अगर कउनो असुद्ध पसुअन में स एक मरा भवा माटी क कटोरा में गिर जाइ तउ कटोरा क कउनो भी चीज असुद्ध होइ जाइ। तू पचन क कटोरा जरूर तोड़ देइ चाही। 34अगर असुद्ध माटी क कटोरा क पानी कउनो खइया या पेय खोरा पइ पड़इ तउ उ असुद्ध होइ जाइ। 35अगर कउनो मरे भए घिनौने पसु क कउनो हिस्सा कउनो चीजे पइ आइ पड़इ तउ उ चीज सुद्ध नाही रही। एका टूका टूका कइ देइ चाही। चाहे उ चूल्हा होइ या कइही। उ सबइ तू पचन क बरे हमेसा असुद्ध रहहीं।

36“कउनो सोता या कुआँ, जेहमाँ पानी रहत ह, सद्ध बना रही। मुला कउनो व्यक्ति जउन कउनो मरे भए असुद्ध जनवार क छुइ उ असुद्ध होइ जाइ। 37अगर ओन घिनौने मरे पसुअन क कउनो हिस्सा बोवा जाइवाला बिआ पइ आइ पड़इ तउ भी उ सुद्ध ही रही। 38मुला बोवइ बरे तू पचे कउनो बिआ प पानी डावत ह अउ तब अगर मरे असुद्ध

पसु क कउनो हिस्सा ओन बिअन पइ आइ पड़इ तउ उ सबइ बिआ तोहरे बरे असुद्ध अहइँ।

39“अउर भी, अगर भोजन बरे कउनो पसु जेका तू बइपरत ह अपने आप मरि जाइ तउ जउन मनई उसके मरे सरीर क छुअइ, साँझ तलक असुद्ध रही। 40जउन व्यक्ति मरे भए पसु क गोस खाइ, ओका आपन ओढ़ना जरूर धोवइ चाही। उ मनई साँझ तलक असुद्ध रही। जउन व्यक्ति मरे पसु क सरीर उठावइ ओका भी आपन ओढ़ना जरूर धोवइ चाही। इ व्यक्ति साँझ तलक असुद्ध रही।

41“हर एक अइसा पसु जउन धरती प रगत ह, उ ओन पसुअन में स एक बाटइ, जेका यहेवा खाइ क मना किहे अहइ। 42तू पचन क अइसे कउनो रेगंडवाले पसुअन क जरूर खाइ नाही चाही जउन पेटे क बल रगत ह या चारउँ गोड़न प चलत ह, या जेकरे बहोत स गोड़ अहइँ। उ पचे तोहरे बरे असुद्ध पसु अहइँ। 43ओन पसुअन स आपन क गन्दा जिन बनावा अउ ओनके बरे आपन क असुद्ध जिन बनावा। 44काहेकि मई यहेवा तोहार परमेस्सर अहउँ। मई पवितर अहउँ। एह बरे तू पचन क आपन क पवितर रखइ चाही। ओन घिनौने रेगंडवाला पसुअन स आपन क घिनौना जिन बनावा। 45मई तू लोगन क मिस्र स लइ आवा अहउँ। मई इ एह बरे किहेउँ कि तू लोग मोर खास जन बना रहि सका। मई इ एह बरे किहेउँ कि मई तोहार परमेस्सर बन सकउँ। मई पवितर अहउँ, एह बरे तोहे सबन क पवितर रहब अहइ।”

46उ सबइ नेम सबहिं गोरुअन, पंछियन अउ भुइँया क दूसर पसुअन बरे अहइ। उ सबइ नेम समुद्धर में रहइवालन सबहिं पसुअन अउ भुइँया पइ रेगंडवालन सब पसुअन बरे अहइँ। 47उ सबइ उपदेस एह बरे अहइँ कि लोग सुद्ध अउ असुद्ध पसुअन में अन्तर कइ सकइँ। इ तरह लोग जनिहीं कि उ पचे कउन सा पसु खाइ सकत हीं अउर कउन सा नाही खाइ सकत हीं।”

नई महतारिन बरे नेम

12 यहेवा मूसा स कहेस, 2“इस्त्राएल क लोगन स इ नेमन क कहा: अगर कउनो स्त्री एक ठु लरिका क जन्मत ह तउ उ स्त्री सात दिना तलक असुद्ध रही। इ ओकरे मासिक धर्म क समइ असुद्ध होइ क तरह होइ। 3अठएँ दिन लरिका क खतना होइ चाही। 4उ आपन सुद्धीकरण क टेमें क लइके तैंतीस दिना पाछे तलक असुद्ध रहीं। उ स्त्री क उ समइ में कछू नाही छुअइ चाही जउन पवितर अहइ। ओका पवितर ठउरे में तब तलक नाही जाइ चाही जब तलक ओकरे सुद्धीकरण क समइ पूरा न होइ जाइ। 5मुला अगर स्त्री लरिकी क जन्मत ह तउ महतारी क मासिक धर्म क समइ क तरह उ दुइ हफ्ता तलक असुद्ध रही। उ आपन सुद्धीकरण क टेमें स लइके छहसठ दिना पाछे असुद्ध रही।

6“नई महतारी जउन अबहिं बच्चा जनम दिहे अहइ, चाहे उ बच्चा लरिका होय या लरिकी तउ अइसी महतारी क सुद्धीकरण क समइ पूरा होइ क पाछे ओका मिलापवाला तम्बू में खास भेंटन लइ आवइ चाही। ओका ओन भेंटन क

मिलापवाला तम्बू क दुआर पइ याजक क जरूर देइ चाही। ओका एक बरिस क मेमना होमबलि बरे अउ एक तु फारखा या कबूतर क बच्चा पापबलि बरे लइ आवइ चाही। 7-8अगर स्त्री मेमन देइ में असमर्थ होइ तउ उ दुइ फारखा या दुइ कबूतरे क बच्चा लिआइ सकत ह। एक तु पंछी होमबलि बरे अउ एक तु पापबलि बरे होइ। याजक यहोवा क सामने ओनका भेंट करी। इ तरह उ ओकरे पाप बरे प्रायश्चित करी। तब उ आपन रक्त क हानि स सुद्ध होइ। इ सबइ नेम ओन स्त्रियन बरे अहई जउन एक तु लरिकी या लरिकी क जन्मत ह।”

गंभीर चर्मरोग क बारे में नेम

13 यहोवा मूसा अउ हारून स कहेस, ²“कउनो व्यक्ति क चाम पइ भयंकर सूजन या खजुरी या सफेद दाग होइ सकत हीं। अगर घाव चर्मरोग क नाई देखाइ पड़ई तउ उ मनई क याजक हारून या ओकरे कउनो याजक पूतन क लगे लिआवा जाइ चाही। ³याजक लोगन क मनई क चर्म क घाव क देखइ चाही। अगर घाव क बार सफेद होइ गवा होई अउर घाव मनई क चाम स जियादा गहिर मालूम होइ तउ इ भयंकर चर्मरोग बाटइ। जब याजक मनई क जाँच खतम करइ तउ ओका एलान करइ चाही कि मनई असुद्ध अहइ।

⁴“कबहुँ कबहुँ कउनो मनई क चाम पइ कउनो सफेद दाग होइ जात ह मुला दाग चाम स गहिर नाहीं मालूम होत। अगर उ सच होइ तउ याजक उ मनई क सात दिना बरे दूसर लोगन स अलग करी। ⁵सतएँ दिन याजक क उ मनई क फुन स जरूर जाँच करइ चाही। अगर घाव में कउनो बदलाव नाहीं आएस ह। अउर चाम पइ नाहीं फइलेस ह। तउ याजक क दूसर सात दिना बरे उ व्यक्ति क दूसर लोगन स जरूर अलगाइ देइ चाही। ⁶तब याजक क उ व्यक्ति क सात दिना पाछे जरूर जाँच करइ चाही। जदि दाग गहिर होइ गवा ह अउ चाम पइ न फइला होइ तब याजक क जरूर एलान करइ चाही कि उ व्यक्ति सुद्ध अहइ। इ सिरिफ खुरंड अहइ। तब उ व्यक्ति क आपन ओढ़ना धोवइ चाही अउ उ फुन स सुद्ध होइ चाही।

⁷“मुला अगर मनई याजक क फिन अपने आप क सुद्ध बनावइ बरे देखाइ लिहे होइ अउ ओकरे पाछे चर्मरोग चमड़ी पइ फइलइ लागाइ तउ उ मनई क फुन याजक क लगे आवइ चाही। ⁸याजक क जाँच कइके देखइ चाही। अगर घाव चाम पइ फइला होइ तउ याजक क एलान करइ चाही कि उ मनई असुद्ध अहइ अर्थात् ओका कउनो भयानक रोग अहइ।

⁹“अगर मनई क भयानक चर्मरोग भवा होइ तउ ओका याजक क लगे लइ आवा जाइ चाही। ¹⁰याजक क उ मनई क जाँच कइके देखइ चाही। अगर चाम पइ सफेद दाग होइ अउ ओहमाँ सूजन होइ, उ जगह क बार सफेद होइ ग होई अउर अगर हुअँ घाव कच्चा होइ। ¹¹तउ इ कउनो भयानक चर्मरोग अहइ जउन उ मनई क बहोत समइ स अहइ। ऐह बरे याजक क उ मनई क असुद्ध घोसित कइ देइ चाही। याजक उ मनई क सिरिफ तनिक समइ क बरे ही दूसर

मनइयन स न अलगाई। काहेकि उ जानत ह कि उ मनई असुद्ध अहइ।

¹²“अगर कबहुँ चर्मरोग मनई क समूचइ सरीर में फइल जाइ, उ चर्मरोग उ मनई क मूँडे स गोड़े तलक ढक लेइ, ¹³अउर याजक लखइ कि चर्मरोग समूचइ सरीर पइ इ तरह ढके अहइ कि उ मनई क पूरा सरीर ही सफेद होइ ग अहइ तउ याजक क ओका सुद्ध घोसित कइ देइ चाही। ¹⁴मुला अगर मनई क चर्म घाव जइसा कच्चा होइ तउ उ सुद्ध नाहीं अहइ। ¹⁵जब याजक कच्चा चाम लखइ, तब ओका घोसित कइ देइ चाही कि मनई असुद्ध अहइ। कच्चा चाम सुद्ध नाहीं अहइ। इ भयानक चर्मरोग अहइ।

¹⁶“अगर कच्चा चाम फुन सफेद होइ तउ उ मनई क याजक क लगे आवइ चाही। ¹⁷याजक क उ मनई क जरूर जाँच करइ चाही। अगर व्याधि सफेद होइ गवा अहइ तउ याजक क घोसित करइ चाही कि रोग ग्रस्त व्यक्ति सुद्ध अहइ। तउ उ मनई सुद्ध अहइ।

¹⁸“होइ सकत ह कि कउनो व्यक्ति क सरीर क चाम पइ कउनो फोड़ा होइ जउन कि ठीक होइ ग रहा।¹⁹अउर उ जगह पइ सफेद सूजन, या लाली लिए भए सफेद दाग जाहिर हो जात ह अउ तब एका याजक क जरूर देखावइ चाही। ²⁰याजक क ओका निहारइ चाही। अगर सूजन चमड़ी स गहिर बाटइ अउ एह पइ क बार सफेद होइ ग अहई तउ याजक क एलान करइ चाही कि उ मनई असुद्ध बाटइ। उ दाग भयानक चर्मरोग अहइ। इ फोड़ा क भितरे स फूट पड़ा बाटइ। ²¹मुला अगर याजक उ जगह क लखत ह अउ ओह पइ सफेद बार नाहीं अहई अउर दाग चमड़ी स गहिर नाहीं अहइ, मुला धुँधला बाटइ तउ याजक क उ मनई क सात दिन बरे अलग कइ देइ चाही। ²²अगर दाग क जियादा हिस्सा चमड़ी पइ फइलत ह तब याजक क एलान करइ चाही कि मनई असुद्ध अहइ। इ छूत रोग अहइ। ²³मुला अगर सफेद दाग अपनी जगह बना रहत ह, फइलत नाहीं तउ उ पुराना फोड़ा क सिरिफ घान अहइ। याजक क एलान करइ चाही कि मनई सुद्ध अहइ।

²⁴⁻²⁵“कउनो व्यक्ति क चाम जरि सकत ह। अगर कच्चा चाम सफेद या लाली लिए भए सफेद दाग में बदल जाइ, तउ याजक क ऐका जाँच करइ चाही। अगर उ दाग चमड़ी स गहिर मालूम होइ अउ उ जगह क बार सफेद होइ जाई तउ इ अत्यधिक व्याधिक चर्मरोग अहइ। जउन जरा भवा में स फूट पड़ा अहइ। तउ याजक क उ व्यक्ति क असुद्ध घोसित करइ चाही। इ भयंकर चर्म रोग अहइ। ²⁶मुला याजक इ जगह क लखत ह अउर सफेद दाग में सफेद बार नाहीं अहई अउ दाग चमड़ी स गहिर नाहीं अहइ, मुला हल्का बा तउ याजक क ओका सात दिना बरे अलग करइ चाही। ²⁷सतएँ दिन याजक क उ मनई क फुन देखइ चाही। अगर दाग चमड़ी पइ फइलइ तउ याजक क एलान करइ चाही कि मनई असुद्ध अहइ। इ भयंकर चर्मरोग अहइ। ²⁸मुला अलग सफेद दाग चमड़ी पइ न फइलइ, मुला धुँधला होइ तउ इ जरइ स पइदा भइ सूजन अहइ। याजक क उ मनई क सुद्ध घोसित करइ चाही। इ सिरिफ बर जाइ क चीन्हा अहइ।

29“कउनो मनई या मेहरारू क मूँड़े या दाढ़ी क चाम पइ कउनो छूत रोग होइ सकत ह। 30याजक क उ छूत क रोग (व्याधि) क जरूर लखइ चाही। अगर छूत क रोग चमड़ी स गहिर मालूम होइ अउ एकरे चारिहुँ कइँती क बार पियार अउर पतला अहा तउ याजक क एलान करइ चाही कि उ व्यक्ति असुद्ध अहइ। इ मूँड़े या दाढ़ी क बुरा चर्मरोग अहइ। 31अगर रोग चमड़ी स गहिर न मालूम होइ, अउर एहमौं कउनो करिया बार न होइ तउ याजक क ओका सात दिन बरे अलग कइ देइ चाही।

32“सतएँ दिन याजक क छूत क रोगी क फुन जाँच करइ चाही। अगर रोग फइला नाहीं बाटइ अउर बार पियार नाहीं होइ अउ जदि रोग चमड़ी स गहिर नाहीं अहइ, 33तउ उ मनई क बार जरूर काट देइ चाही। मुला ओका रोगवाले जगह क बार नाहीं कतवइ चाही। याजक क रोग लखइ बरे उ व्यक्ति क अउर सात दिन बरे अलगाइ देइ चाही। 34सतएँ दिन याजक क रोगी क निहारइ चाही। अगर रोग चमड़ी में फइला नाहीं अहइ अउर इ चमड़ी स गहिर नाहीं मालूम होत ह तउ याजक क एलान करइ चाही कि मनई सुद्ध अहइ। मनई क आपन ओढ़ना धोवइ चाही अउ सुद्ध होइ जाइ चाही।

35“मुला अगर मनई क सुद्ध होइके जाइके पाछे चमड़ी में रोग फइलत ह। 36तउ याजक क फिन मनई क लखइ चाही। अगर रोग चमड़ी में फइलत ह तउ याजक क पियार बाल लखइ क जरूरत नाहीं मनई असुद्ध अहइ। 37मुला अगर याजक इ समुझत ह कि रोग क बढ़व रुकि गवा बाटइ अउ एहमौं करिया बार जमत अहइँ तउ रोग नीक होइ गवा अहइ। मनई सुद्ध अहइ। याजक क एलान करइ चाही कि मनई सुद्ध अहइ।

38“जदि कउनो मनई या मेहरारू क चाम पइ सफेद दाग होइँ, 39तउ याजक क ओन दागन क लखइ चाही। अगर मनई क चमड़ी क दाग धुँधला होइँ, तउ रोग सिरिफ हानि न पहुँचावइवाली फोड़िया अहइ। उ मनई सुद्ध अहइ।

40“कउनो मनई आपन मूँड़े क बार क झरते हुए लख सकत हीं। उ सुद्ध अहइ। इ सिरिफ गंजापन बाटइ। 41कउनो मनई क मूँड़े क बार झरि सकत हीं। उ सुद्ध अहइ। इ दूसर तरह क गंजापन अहइ। 42मुला ओकरे मूँड़े क चमड़ी पइ लाल सफेद फोड़िया बाटिन तउ इ भयानक चर्मरोग अहइ। 43याजक क अइसे व्यक्ति क जाँच करइ चाही। अगर चमड़ी क व्याधि सरीर पइ उ चाम रोग की नाई ललछौँड सफेद अहइ। 44तउ उ मनई क मूँड़े क चमड़ी पइ भयानक चर्मरोग अहइ। मनई असुद्ध अहइ, याजक क एलान करइ चाही।

45“अगर कउनो मनई क भयानक चर्मरोग होइ तउ उ मनई क दूसर लोगन क होसियार करइ चाही। उ मनई क जोर से “असुद्ध! असुद्ध!” कहइ चाही, उ मनई क ओढ़नन क, सिलाइ स फाड़ देइ चाही। उ मनई क आपन बारन क सँवारइ नाहीं चाही अउ उ मनई क आपन मुँह ढँकइ चाही। 46जउन मनई असुद्ध होइ ओहमौं छूत क रोग हमेसा रही। उ मनई असुद्ध अहइ। ओका अकेल्ले रहइ चाही। ओकरे निवास डेरा स बाहेर होइ चाही।

47-48“कछू ओढ़नन पइ फफूँदी* लागि सकत ह। ओढ़ना सन या ऊनी होइ सकत ह। ओढ़ना बुना भवा या कढ़ा भवा होइ सकत ह। फफूँदी कउनो चमड़ा या चमड़ा स बना भवा कउनो चीज पइ होइ सकत ह। 49अगर फफूँदी हरिरअर या लाल होइ तउ ओका याजक क देखँवइ चाही। 50याजक क फफूँदी लखइ चाही। ओका उ चीज क सात दिन तलक अलग जगह पइ धरइ चाही। 51-52सतएँ दिन, याजक क फफूँदी लखइ चाही। इ महत्वपूर्ण नाहीं बा कि ओढ़ना क ताना बाना में फफूँदी अहइ या नाहीं इ महत्वपूर्ण नाहीं बा कि चमड़ा क प्रयोग काहे बरे कीन्ह गवा रहा। अगर फफूँदी फइलत ह तउ उ कपड़ा या चाम असुद्ध बाटइ। उ फफूँदी असुद्ध अहइ। याजक क उ कपड़ा या चमड़ा क बारि देइ चाही।

53“अगर याजक देखइ कि फफूँदी फइली नाहीं तउ उ कपड़ा या चाम धोवा जाइ चाही। इ महत्वपूर्ण नाहीं कि इ चाम अहइ या कपड़ा या कपड़ा क ताना बाना में फफूँदी अहइ या नाहीं। ऐका धोवइ चाही। 54याजक क मनइयन क इ हुकुम देइ चाही कि उ पचे चाम या कपड़ा क टूका क धोवइँ, तबहि याजक ओढ़नन क अउर सात दिन बरे अलग करइ। 55उ समइ क पाछे याजक क फुन देखइ चाही। अगर फफूँदी ठीक वइसेन ही देखाइ देत ह तउ उ ओढ़ना असुद्ध अहइ। इ महत्वपूर्ण नाहीं अहइ कि छूत फइली नाहीं अहइ। तू पचन क उ कपड़ा या चमड़ा बारि देइ चाही।

56“मुला अगर याजक उ चाम या कपड़ा क लखत ह कि फफूँदी मुरझान बा तउ याजक क चमड़ा या कपड़ा क फफूँदी स लाग दाग क चमड़ा या कपड़ा स फाड़ि देइ चाही। इ महत्वपूर्ण नाहीं कि कपड़ा क ताना बाना में फफूँदी अहइ या नाहीं। 57मुला फफूँदी उ चमड़ा या कपड़ा पइ लौटि सकत ह। अगर अइसा होत ह तउ फफूँदी बढ़ति अहइ। उ चमड़ा या कपड़ा क बारि देइ चाही। 58मुला अगर धोवइ क पाछे फफूँदी न लउटइ, तउ उ चाम या कपड़ा सुद्ध अहइ। एकर कउनो महत्व नाहीं कि कपड़ा क ताना बाना में फफूँदी अहइ या नाहीं। उ कपड़ा फुन धोवइ चाही अउर उ सुद्ध होइ।”

59चाम या कपड़ा पइ फफूँदी क बारे में फइसला करइ बरे इ सबइ नेम अहइ कि उ सुद्ध अहइ या असुद्ध। ऐकर कउनो महत्व नाहीं कि कपड़ा क ताना बाना में फफूँदी अहइ या नाहीं।

भयानक चर्मरोगी क सुद्ध करइ क नेम

14 यहोवा मूसा स कहेस, 2“इ सबइ ओन लोगन बरे नेम अहइँ जेनका भयानक चर्मरोग रहा अउर जउन नीक होइ गएन। इ सबइ नेम उ मनई क सुद्ध बनावइ बरे अहइँ।

“याजक क उ मनई क लखइ चाही जेका भयानक चर्मरोग अहइ। 3याजक क उ मनई क लगे डेरा क बाहेर जाइ चाही। याजक क इ लखइ क कोसिस करइ चाही कि

फफूँदी एक तरह क काई जउन गर्मी अउ नमीवाली जगह पइ ओढ़नन, चमड़न या काठ में लग जात ह। हिब्रू सब्ब क अरथ “कोढ़” या “भयानक चर्मरोग” भी बाटइ।

उ चर्म रोग नीक होइ ग अहइ। 4अगर व्यक्ति स्वस्थ अहइ तउ याजक ओका इ करइ क कही। ओका दुइ जिअत सुद्ध पंछी, एक देवदारु क लकड़ी, लाल कपड़ा क एक ठु टूका अउर एक ठु जूफा* क पौधा जरूर लइ आवइ चाही। 5याजक क बहत भए पानी क ऊपर माटी क एक ठु खोरा में एक ठु पंछी क मारइ क हुकुम देइ चाही। 6तब याजक दूसर जिअत पंछी, देवदारु क लकड़ी, लाल कपड़ा क टूकन अउ जूफा क पउथा स्वीकार करी। याजक क जिअत पंछी अउ दूसर चीजन क बहत भए पानी क ऊपर मारा गवा पंछी क रक्त में बोरइ चाही। 7याजक उ व्यक्ति प भयानक चर्मरोग स उपचार करइ बरे सात दाई रक्त छिरकी। तब याजक क जरूर घोसित करइ चाही कि उ मनई सुद्ध अहइ। तब याजक क खुला मैदान में जाइ चाही अउ जिअत पंछी क अजाद करइ देइ चाही।

8“एकरे पाछे उ व्यक्ति क आपन ओढ़ना जरूर धोवइ चाही। ओका आपन सब बार क मूंडन करावइ चाही अउ पानी स नहाइ चाही। उ पवित्र होइ जाइ। तब उ व्यक्ति सिबर में जाइ सकी। मुला ओका आपन खेमा क बाहेर सात दिन तलक रहइ चाही। 9सातएँ दिन ओका आपन सारा बार काट डवइ चाही। ओका आपन मूँड, डाढ़ी, भौहन क सबहिं बार कटवाइ लेइ चाही। तब ओका आपन कपड़ा धोवइ चाही अउ पानी स नहाइ चाही। तब उ मनई सुद्ध होइ।

10“अठएँ दिन उ व्यक्ति क दुइ भेड़ी क नर बच्चन लेइ चाही जेहमों कउनो दोख न होइ। ओका एक बरिस क एक ठु मादा मेमना भी लेइ चाही जेहमों कउनो दोख न होइ। ओका एपा क तीन दसवाँ हींसा तेल मिला भवा उत्तिम आटा लेइ चाही। इ आटा अन्नबलि बरे अहइ। उ व्यक्ति क दुइ तिहाइ पिण्ट* जैतून क तेल भी लेइ चाही। 11याजक क एलान करइ चाही कि उ मनई सुद्ध अहइ। याजक क उ मनई अउ ओकरी बलि क मिलापवाला तम्बू क दुआरे पइ यहोवा क समन्वा लइ आवइ चाही। 12याजक मेमनन में स एक क दोखबलि क रुप में चढ़ाई। उ मेमना क अउर उ तेल क यहोवा क समन्वा उत्तोलन बलि क रुप में चढ़ाई। 13तब याजक नर मेमना क उहइ पवित्र ठउर पइ मारी जहाँ उ पचे पापबलि अउ होमबलि क मारत हीं। दोखबलि, पापबलि क समान अहइ। इ याजक क बाटइ। इ बहोतइ पवित्र अहइ।

14“याजक दोखबलि क कछू रक्त सुद्ध कीन्ह जाइवाला व्यक्ति क दाहिने काने क लौ में कछू रक्त दाहिने हाथ क अंगूठा अउ दाहिन गोड़े क अंगूठा पइ लगाइ। 15याजक कछू तेल भी लेइ अउ आपन बाई हथेली पइ डार्इ। 16तब याजक आपन दाहिन हाथे क अँगुरियन अपन बाएँ हाथे क हथेली में धरे भए तेल में बोरी। उ आपन अँगुरी क प्रयोग कछू तेल यहोवा क समन्वा सात दाई छिरकइ बरे करी। 17याजक आपन हथेली स कछू तेल सुद्ध कीन्ह जाइवाला मनई क दाहिन काने क लौ पइ लगाई। याजक कछू तेल उ

मनई क दाहिन हाथे क अंगूठे अउ दाहिन गोड़ क अंगूठे पइ लगाइ। याजक कछू तेल दोखबलि क रक्त पइ लगाई। 18याजक आपन हथेली में बचा भवा तेल सुद्ध कीन्ह जाइवाला मनई क मूँडे प लगाइ। इ तरह याजक उ मनई क पाप क यहोवा क समन्वा प्रायश्चित करी।

19“ओकरे पाछे याजक पापबलि चढ़ाई अउ मनई क पापक प्रायश्चित करी। जेहसे उ सुद्ध होइ जाई। एकरे पाछे याजक होमबलि बरे पसु क मारी। 20एँह बरे याजक होमबलि अउ अन्नबलि क वेदी पइ चढ़ाई। इ तरह याजक उ मनई क पापक प्रायश्चित करी अउ उ मनई सुद्ध होइ जाई।

21“अगर व्यक्ति गरीब अहइ अउ ओन बलियन क देइ में असमर्थ बाटइ तउ ओका एक ठु नर मेमना दोखबलि क रुप में लेइ चाही। इ उत्तोलन बलि उ व्यक्ति क पापन क प्रायश्चित्य करइ बरे होइ। ओका एपा क दसवाँ हींसा तेल स मिला भवा उत्तिम महीन आटा लेइ चाही। इ आटा अन्नबलि क रुप में उपयोग में आई। मनई क दुइ तिहाई पिण्ट जैतून क तेल। 22अउर दुइ फाखता या दुइ ठु कबूतरे क बच्चा लेइ चाही। इ सबइ चिजियन क देइ में गरीब लोग समर्थ होइहीं। एक पंछी पापबलि बरे होई अउ दूसर होमबलि बरे होई।

23“अठएँ दिन, उ मनई ओन चिजियन क याजक क लगे मिलापवाला तम्बू क दुआर पइ लिआई। उ सबई चिजियन यहोवा क समन्वा बलि चढ़ाई जइहीं जेहसे मनई सुद्ध होइ जाई। 24याजक, दोखबलि क मेमना अउर तेल भी लेई अउर ओनका यहोवा क समन्वा उत्तोलन बलि क रुप में चढ़ाई। 25तब याजक दोखबलि क मेमना मारी। याजक दोखबलि क कछू रक्त लेई। याजक एहमों स कछू रक्त सुद्ध कीन्ह जाइवाला व्यक्ति क दाहिन कान क लौ पइ कछू रक्त इ व्यक्ति क दाहिन हाथे क अंगूठा पइ अउर कछू रक्त दाएँ गोड़ क अंगूठा पइ लगाई। 26याजक इ तेल में स कछू आपन बाई हथेली में भी डार्इ। 27याजक आपन दाहिन हाथे क अँगुरी क उपयोग आपन हथेली क तेल क यहोवा क समन्वा सात दाई छिरकइ बरे करी। 28तब याजक आपन हथेली स कछू तेल उहइ जगह पइ लगाइ जहाँ उ पहिले लगाए रहा। उ आपन हथेली स कछू तेल सुद्ध कीन्ह जाइवाला व्यक्ति क दाहिन काने क लौ पइ लगाई। याजक इ तेल में स कछू तेल मनई क दाहिन हाथे क अंगूठा अउ ओकरे दाहिन गोड़े क अंगूठा पइ लगाई। याजक दोखबलि क रक्त लगा ठउरे पइ एहमों स कछू तेल लगाई। 29याजक क आपन हथेली क बचा भवा तेल क सुद्ध कीन्ह जाइवाला मनई क मूँडे पइ डवइ चाही। इ तरह याजक यहोवा क समन्वा उ मनई क पापन क प्रायश्चित करी।

30“तब मनई फखतन या कबूतरे क बच्चन में स एक क बलि चढ़ाई। ओका उहइ चढ़ाई चाही जेका गरीब व्यक्ति देइ में समर्थ होइ। 31ओका दुइनउँ पंछियन में स एक क पापबलि क रुप में चढ़ावइ चाही अउ दूसर पंछी क होमबलि क रुप में ओका ओनकइ अन्नबलि क संग भेंट चढ़ावइ चाही। इ तरह याजक यहोवा क समन्वा उ मनई क पाप क प्रायश्चित करी। उ मनई सुद्ध होइ जाई।”

जूफा कटिजर क पौधा एँकर नरम पाती अउ साखन क प्रयोग सुद्ध करइ क प्रक्रिया में खून या पानी छिछकारइ में कीन्ह जात रहा।

दुइ तिहाइ पिण्ट “एक लोजा।”

32इ सबइ भयानक चर्मरोग क नीक होइ क पाछे कउनो एक मनई क सुद्ध करइ क नेम अहई। इ सबइ नेम ओन मनइयन बरे अहई जउन सुद्ध होइ बरे साधारिन बलियन क खर्चा नहीं उठाइ सकतेन।

घरे में लग फफूँदी क नेम

33यहोवा मूसा अउ हारून स इ भी कहेस, 34“मई तोहरे लोगन क कनान देस देत अहउँ। तोहरे लोग इ भुईया पइ जइहीं। उ समइ में होइ सकत ह, कछू लोगन क घसन में फफूँदी लगी होइ। 35तउ उ घर क मालिक क याजक क लगे आइके कहइ चाही, ‘मई आपन घरे में फफूँदी जइसी कउनो चीज देखेउँ ह।’

36“तब याजक क आदेस जरूर देइ चाही कि घर क खाली कइ दीन्ह जाइ। लोगन क याजक क फफूँदी लखइ जाइके पहिले ही इ जरूर करी। इ तरह घरे क सबहिं चिजियन क याजक क असुद्ध नहीं कहइ पड़ी। लोगन क घर क खाली कइ दीन्ह जाइ क पाछे याजक घरे क अन्दर जाइ अउर देखइ। 37याजक फफूँदी क लखी। अगर फफूँदी घरे क दीवारे पइ हरिअर या लाल रंग क चकत्ता बनाइ दिहे अहई अउर इ दीवारन क सतह स गहिरा मालूम पड़त अहइ, 38तउ याजक क घरे स बाहेर निकरि आवइ चाही। अउ सात दिना तलक घर जरूर बन्द कइ देइ चाही।

39“सतएँ दिन, याजक क हुआँ लौटइ चाही अउर घरे क जाँच करइ चाही। अगर घरे क दीवार पइ फफूँदी फइलि गइ होइ 40तउ याजक क लोगन क हुकुम देइ चाही कि उ पचे फफूँदी क सात पाथरन क उखाड़ि देई अउर ओनका दूर बहाइ देई। ओनका ओन पाथरन क सहर स बाहेर विसेस असुद्ध जगह पइ लोकावइ चाही। 41तब याजक क पूरे घर क भितरे से खुरचवावइ चाही। लोगन क उ लेप क जेका उ पचे खुरचेन ह, लोकाइ देइ चाही। ओनका उ लेप सहर क बाहेर खास असुद्ध जगह पइ डावइ चाही। 42तबहिं उ मनई क नवा पाथर दीवारे में लगावइ चाही अउ ओका ओन दीवारन क नवा लेप स ढाँकि देइ चाही।

43“होइ सकत ह कउनो मनई पुरान पाथरन अउ लेप क निकारिके नवा पाथरन अउ लेप क लगावइ अउ होइ सकत ह उ फफूँदी उ घरे में फिन परगट होइ। 44तब याजक क आइके उ घरे क जाँच जरूर करइ चाही। अगर फफूँदी घरे क अन्दर में फइलि गइ अहइ, तउ इ रोग अहइ जउन दूसरी जगहन में जल्दी स फइलत ह। एह बरे घर असुद्ध अहइ। 45उ मनई क उ घर गिराइ देइ चाही। ओनका सारा पाथर, लेप अउ दूसर लकड़ी क टूकन क सहर स बाहेर असुद्ध जगह पइ लइ जाइ चाही। 46कउनो मनई जउन ओहमों जात ह, साँझ तलक असुद्ध रही। 47अगर कउनो मनई ओहमों खाना खात ह या ओहमों सोवत ह तउ उ मनई क आपन ओढ़ना धोवइ चाही।

48“घरे में नवा पाथर अउ लेप लगाए क पाछे याजक क घरे क जाँच करइ चाही। अगर फफूँदी घरे में नहीं फइली अहइ तउ याजक एलान करी कि घर सुद्ध अहइ। काहेकि फफूँदी खतम होइ ग अहइ।

49“तब घरे क सुद्ध करइ बरे याजक क दुइ तु पंछी, एक देवदारु क लकड़ी, एक लाल कपड़ा क टूका अउ जूफा क पउथा लेइ चाही। 50याजक बहत भए पानी क ऊपर माटी क एक तु खोरा में एक पंछी मारी। 51तब याजक देवदारु क लकड़ी, जूफा क पउथा, लाल कपड़ा क टूका अउ जिअत पंछी क लेई। याजक बहत पानी क ऊपर मारा भए पंछी क रक्त में ओन चीजन क बोरी। तब याजक उ रक्त क उ घरे पइ सात दाई छिरकी। 52इ तरह याजक ओन चीजन क उपयोग घर क सुद्ध करइ बरे करी। 53याजक खुला मैदान में सहर क बाहेर जाई अउर पंछी क उड़ाई देई। इ तरह याजक घरे बरे प्रायश्चित करी। घर सुद्ध होइ जाइ।”

54उ सबइ नेम भयानक चर्मरोग क, 55घर या कपड़ा क टूकन पइ क फफूँदी क बारे में अहई। 56उ सबइ नेम सूजन, फुंसियन या चर्मरोग पइ सफेद दाग सम्बंध रखत हीं। 57उ सबइ नेम सिखावत हीं कि चीजन कब असुद्ध अहई अउ कब सुद्ध अहई। उ सबइ नेम उ तरह क बेरामी स सम्बंध रखत हीं।

सरीर स बहइवाला स्त्राव क नेम

15 यहोवा मूसा अउ हारून स कहेस, 2“इस्त्राएल क लोगन स कहा: जब कउनो मनई क सरीर स धात क स्त्राव होत ह तब उ व्यक्ति असुद्ध होत ह। 3उ धात सरीर स खुला बहत ह या सरीर ओका बहइ स रोक देत ह एँकर कउनो महत्व नहीं।

4“अगर धात तजइवाला बिछउना पइ सोवत रहत ह तउ उ बिस्तर असुद्ध होइ जाइ। जउने जगह प उ बइठत ह उ असुद्ध होइ जाइ। 5अगर कउनो मनई ओकरे बिछउना क छुअत ह तउ ओका आपन ओढ़नन क धोवइ चाही अउ पानी स नहाइ चाही। उ साँझ तलक असुद्ध रही। 6अगर कउनो मनई उ चीज प बइठत ह जउने पइ धात तजइवाला मनई बइठा होइ तउ ओका आपन ओढ़ना धोवइ चाही अउर बहत पानी में नहाइ चाही। उ साँझ तलक असुद्ध रही। 7अगर कउनो मनई उ मनई क छुअत ह जउन धात क तजे बाटइ तउ ओका आपन ओढ़नन क धोवइ चाही अउ बहत पानी में नहाइ चाही। उ साँझ तलक असुद्ध रही।

8“अगर धात तजइवाला मनई कउनो सुद्ध मनई पइ छूवत ह तउ सुद्ध मनई क आपन ओढ़ना धोवइ चाही अउ नहाइ चाही। उ मनई साँझ तलक असुद्ध रही। 9पसु पइ बइठइ क काठी जउने प धात तजइवाला मनई बइठा होइ तउ उ असुद्ध होइ जाइ। 10एह बरे कउनो मनई जउन धात तजइवाला मनई क नीचे रहइवाली कउनो चीजे क छुअत ह तउ उ साँझ तलक असुद्ध रही। जउन मनई धात तजइवाला मनई रहइवाली कउनो नीचे क चीजन क लइ जात ह तउ ओका आपन ओढ़नन क धोवइ चाही अउ पानी में नहाइ चाही। उ साँझ तलक असुद्ध रही।

11“सम्भव अहइ कि धात तजइवाला मनई पानी में बिना हाथ धोइके कउनो दूसर मनई क छुअइ। तब दूसर मनई आपन ओढ़नन क धोवइ चाही अउ पानी में नहाइ। उ साँझ तलक असुद्ध रही।

12“धात तजइवाला मनई अगर माटी क खोरा छुअइ तउ उ खोरा जरूर फोड़ देइ चाही। अगर धात तजइवाला मनई कउनो काठे क खोरा छुअइ तउ उ खोरा क बहत पानी में अच्छी तरह धोवइ चाही।

13“जब धात तजइवाला कउनो मनई आपन धात तजे स सुद्ध कीन्ह जात ह तउ ओका आपन सुद्धि बरे उ दिना स सात दिन गनइ चाही। तब ओका आपन ओढ़ना धोवइ चाही अउ बहत पानी में नहाइ चाही। उ सुद्ध होइ जाइ। 14अठएँ दिन उ मनई क दुइ फ़ाखता या दुइ कबूतरे क बच्चा लेइ चाही। ओका मिलापवाला तम्बू क दुआरे पइ यहोवा क समन्वा आवइ चाही। उ मनई दुइ पंछी याजक क देइ। 15याजक पंछियन क बलि चढ़ाई। एक क पापबलि बरे अउ दूसर क होमबलि बरे। इ तरह याजक इ मनई क यहोवा क समन्वा ओकरे धात तजइ बरे प्रायश्चित्त करी।

मनसेधुअन बरे नेम

16“अगर मनसेधू क वीर्य निकरि जात ह तउ ओका बहत पानी में नहाइ चाही। उ साँझ तलक असुद्ध रही। 17अगर वीर्य कउनो ओढ़ना या चाम पइ गिरइ तउ उ ओढ़ना या चाम पानी में धोवइ चाही। इ साँझ तलक असुद्ध रही। 18अगर कउनो मनसेधू कउनो स्त्री क संग सोवत ह अउ वीर्य निकरत ह तउ स्त्री अउ मनसेधू दुइनउँ क बहत पानी में नहाइ चाही। उ पचे साँझ तलक असुद्ध रहहीं।

स्त्रियन बरे नेम

19“अगर कउनो स्त्री मासिक रक्त स्राव क समइ मासिक धर्म स बाटइ तउ उ सात दिना तलक असुद्ध रही। अगर कउनो मनई ओका छुअत ह तउ उ मनई साँझ तलक असुद्ध रही। 20आपन मासिक धर्म क समइ स्त्री जउन कउनो चीज पइ ओलरी, उ भी असुद्ध रही अउ उ समइ में जउने चीजे प उ बइठी, उ भी असुद्ध होइ। 21अगर कउनो मनई उ स्त्री क बिछउना क छुअत ह तउ ओका आपन ओढ़नन क बहत पानी में धोवइ अउ नहाइ चाही। उ साँझ तलक असुद्ध रही। 22अगर कउनो मनई उ चीज क छुअत ह जेह पइ उ स्त्री बइठी होइ तउ उ मनई क आपन ओढ़ना बहत पानी में धोवइ चाही अउ नहाइ चाही। उ साँझ तलक असुद्ध रही। 23उ मनई स्त्री क बिछउना क छुअत ह या उ चीज क छुअत ह जेह पइ उ बइठी होइ, तउ उ मनई साँझ तलक असुद्ध रही।

24“अगर कउनो मनई कउनो स्त्री क संग मासिक धर्म क समइ में यौन सम्बंध रखत ह तउ उ मनई सात दिना तलक असुद्ध रही। हर उ बिछउना जउने प उ सोवत ह असुद्ध होइ।

25“अगर कउनो स्त्री क कइउ दिना तलक रक्त स्राव रहत ह जउन ओकरे मासिक धर्म क समइ नहीं होत, या निश्चित समइ क पाछे मासिक धर्म होत ह तउ उ उहइ तरह असुद्ध होइ जेह तरह मासिक धर्म क समइ अउ तब तलक असुद्ध रही जब तलक रही। 26पूरा रक्त स्राव क समइ उ स्त्री जेह बिछउना पइ ओलरी, उ वइसा ही होइ जइसा

मासिक धर्म क समइ। जउन कउनो चीजे पइ उ स्त्री बइठी, उ वइसे ही असुद्ध होइ जइसेन उ मासिक धर्म स असुद्ध होत ह। 27अगर कउनो मनई ओन चिजियन क छुअत ह तउ उ असुद्ध होइ। इ मनई क बहत पानी स आपन (कपड़ा) धोवइ चाही अउ नहाइ चाही। उ साँझ तलक असुद्ध रही। 28ओकरे पाछे जब उ स्त्री मासिक धर्म स असुद्ध होइ जात ह तब स ओका सात दिन जरूर गनइ चाही एकरे पाछे उ सुद्ध होइ। 29फिन अठएँ दिन ओका दुइ फ़ाखता अउ दुइ कबूतरे क बच्चा लेइ चाही। ओका ओनका मिलापवाला तम्बू क दुआरे पइ याजक क लगे जरूर लावइ चाही। 30तब याजक क एक पंछी पापबलि क रूप में अउ दूसर क होमबलि क रूप में चढ़ावइ चाही। इ तरह उ याजक ओका यहोवा क समन्वा ओकरे स्राव बरे प्रायश्चित्त करी।

31“एह बरे तू इस्त्राएल क लोगन क उपदेस द्या कि उ पचन्क अपने आप क अलग करइ चाही जउन उ असुद्ध अहइ। इ तरह उ मोर पवितर तम्बू क दूसित नाहीं करब्या जउन ओकर बीच बाटइ। अगर उ पचे एँका दूसित करत ही तउ आपन असुद्धी क कारण जरूर मरइ क होइ।”

32इ सबइ नेम तजइवाले लोगन क बरे अहईं। इ सबइ नेम ओन मनइयन बरे अहईं जउन वीर्य क सरीर स बाहेर निकरइ स असुद्ध होत हीं। 33अउर इ सबइ नेम ओन स्त्रियन बरे अहईं जउन आपन मासिक धर्म क रक्त स्राव क समइ असुद्ध होह हीं अउर उ सबइ नेम ओन मनसेधुअन बरे अहईं जउन असुद्ध स्त्रियन क संग सोवइ स असुद्ध होत हीं।

प्रायश्चित्त क दिन

16 हारून क दुइ पूत यहोवा क सुगन्ध भेंट चढ़ावइ क जतन करइ क समइ मर ग रहेन।* 2एकर पाछे यहोवा मूसा स कहेस, “आपन भाई हारून स कहा कि उ महा पवितर ठउर में पर्दा क पाछे कउनो टेम जाइ चाहत ह तउ नाहीं जाइ सकत ह। उ पर्दा क पाछे जउन कमरा बाटइ ओहमाँ पवितर सन्दूख रखा भवा अहइ। पवितर सन्दूख क ऊपर ओकर बिसेस ढकना* लाग अहइ। बिसेस ढकना क ऊपर एक ठु बदरे में मई परगट होब। अगर हारून उ कमरा में जात ह तउ उ मरि जाइ।

3“प्रायश्चित्त क दिन पवितर ठउर में जाइके पहिले हारून क पापबलि क बरे एक ठु बछवा अउ होमबलि बरे एक ठु भेड़ा क महा पवितर ठउर क दुआरे क अगवा जरूर भेंट करइ चाही। 4हारून आपन पूरा सरीर क पानी डइके धोइ। तब हारून इ सबइ ओढ़नन क पहिरी। सन क नीचे क ओढ़ना सरीर स सटा होइहीं। उ सन स बना भवा कमर बन्द बान्ध लेइहीं। तउ हारून सन क पगड़ी बाँधी। इ सबइ पवितर ओढ़ना अहईं।

हारून क दुइ पूत ... रहेन लखईं लैव्यव्यवस्था 10:1-2

बिसेस ढकना इ “दया क सीट” भी कहलावत ह। इब्रानी सब्द क अरथ “ढकना” ढाकइ क ओढ़ना” या “उ ठउर जहाँ पाप क छिमा कीन्ह जात ह।”

5“हारून क इस्त्राएल क लोगन स दुइ ठु बोकरा पापबलि क रूप में अउ एक ठु भेड़ा होमबलि क रूप में जरूर लेइ चाही। 6तब हारून बछवा क पापबलि क रूप में चढ़ाइ। इ बलि ओकरे अपने बरे अहइ। तब हारून उ अउ ओकर परिवार बरे प्रायश्चित करी।

7“एकरे पाछे हारून दुइ बोकरा लेइ अउ मिलापवाला तम्बू क दुआरे पइ यहोवा क समन्वा लिआइ। 8हारून दुइनउँ बोकरन बरे चिट्ठी डइ। एक चिट्ठी यहोवा बरे होइ। दूसरी चिट्ठी अजाजेल बरे होइ।

9“तब हारून चिट्ठी डइके यहोवा खातिर चुना गवा बोकरा क भेंट चढ़ाइ। हारून क इ बोकरा क पापबलि बरे चढ़ावइ चाही। 10मुला चिट्ठी डइके अजाजेल बरे चुना गवा बोकरा यहोवा क समन्वा जरूर जिअत लइ आवा जाइ चाही। याजक ऐसे ओकर पाप बरे प्रायश्चित करी। तब इ बोकरा मरूभूमि में अजाजेल क लगे पठवा जाइ।

11“तब हारून आपन बरे बछवा क पापबलि रूप में चढ़ाइ। हारून अपने अउ आपन परिवार बरे प्रायश्चित करी। हारून बछवा क अपने बरे पापबलि क रूप में मारी। 12तब ओका वेदी स आगी क एक ठु तसला अंगारा स भरा भवा यहोवा क समन्वा लइ आवइ चाही। हारून दुई मुट्ठी भइ उ महकइवाली सुगन्धित धूप लेइ जउन महीन पीसी गइ अहइ। हारून क पर्दा क पाछे कमरा में उ सुगन्धि क लिआवइ चाही। 13हारून क यहोवा क समन्वा सुगन्धि क आगी में जरूर डवइ चाही। तबहिं सुगन्धि स भरी धूप क धुआँ क बदर साच्छीपत्र क ऊपर क बिसेस ढकना क ढँकि लेइ। इ तरह हारून नाहीं मरी। 14साथ ही साथ हारून क बछवा क कछू रक्त अपनी अँगुरियन पइ लइ चाही अउ ओका बिसेस ढकना क पूरब कइँती छिछकारइ चाही। एकरे समन्वा उ सात दाईं जरूर अंगुरी स रक्त छिछकारी।

15“एकरे पाछे हारून क लोगन बरे पापबलि क रूप में बोकरा क मारइ चाही। हारून क बोकरा क रक्त पर्दा क पाछे कमरा में जरूर लावइ चाही। हारून क बोकरा क रक्त क प्रयोग वइसा ही करइ चाही जइसा बछवा क रक्त क किहस। हारून क उ ढकना पइ अउर ढकना क समन्वा बोकरा क खून जरूर छिछकारइ चाही। 16अउर ओका इस्त्राएल क लोगन क असुद्धता स, अउ ओकर अपराधन अउर पापन स महा पवित्तर ठउर क सुद्ध करइ बरे प्रायश्चित करी चाही। हारून क इ इहइ मिलापवाला तम्बू बरे करइ चाही जउन असुद्ध लोगन क बीच में बाटइ। 17जउने समइ हारून महा पवित्तर ठउर सुद्ध करइ, उ समइ कउनो मनई मिलापवाला तम्बू में नाहीं होइ चाही। कउनो मनई क ओकरे भीतर तब तलक नाहीं जाइ चाही जब तलक हारून बाहेर न आइ जाइ। इ तरह, हारून आपन क, आपन परिवार क अउर इस्त्राएल क सबहिं लोगन बरे प्रायश्चित करी। 18तब हारून उ वेदी पइ जाइ जउन यहोवा क समन्वा बाटइ। हारून वेदी बरे प्रायश्चित करी। हारून बछवा अउ बोकरा क कछू रक्त लइके वेदी क चारिहुँ कइँती अउ कोना पइ लगाइ। 19तब हारून कछू रक्त आपन अँगुरियन स वेदी पइ सात दाईं छिरकी। इ तरह

हारून इस्त्राएल क लोगन क सबहिं पापन स वेदी क सुद्ध अउ पवित्तर करी।

20“हारून महा पवित्तर स्थान, मिलापवाला तम्बू अउ वेदी बरे प्रायश्चित करी। इ सबइ काम क पाछे हारून यहोवा क लगे जिअत बोकरा क लिआई। 21हारून आपन दुइनउँ हाथन क जिअत बोकरा क मूँड़े पइ धरी। तब हारून बोकरा क ऊपर इस्त्राएल क लोगन क अपराध अउ पाप क कबूली। इ तरह हारून लोगन क पापन क बोकरा क मूँड़े पइ डइ। तब उ बोकरा क दूर रेगिस्तान में पठइ। एक मनई बगल में बोकरा क लइ जाइके बरे खड़ा होइ। 22इ तरह बोकरा सबहिं लोगन क पाप अपने ऊपर सूना रेगिस्तान में लइ जाइ। जउन मनई बोकरा क लइ जाइ उ रेगिस्तान में ओका खुला छोड़ि देइ।

23“तब हारून मिलापवाला तम्बू में जाई। उ सन क ओन उत्तम ओढ़नन क पहिरिही जेनका उ महा पवित्तर स्थान में जात समइ पहिरे रहा। ओका ओन ओढ़नन क हुअँइ तजइ चाही। 24उ आपन पूरा सरीर क एक पवित्तर जगह में पानी स धोई। तब उ आपन दूसर खास ओढ़नन क पहिरी। उ बाहेर आइ अउर आपन होमबलि अउर लोगन क होमबलि चढ़ाइ। उ आपन क अउ लोगन क पाप बरे प्रायश्चित करी। 25तब उ वेदी पइ पापबलि क चर्बी क चढ़ाइ।

26“जउन मनई बोकरा क अजाजेल क लगे लइ जाइ, उ आपन ओढ़ना अउ आपन पूरा सरीर क पानी स धोवइ चाही। ओकरे पाछे उ मनई सिबिर में वापिस आइ सकत ह।

27“पापबलि क बछवा अउर बोकरा क सिबिर स जरूर बाहेर लइ जाइ चाही। (उ पसुअन क रक्त पवित्तर ठउरे में पवित्तर चीजन बरे प्रायश्चित करइ बरे लिआवा ग रहा।) याजक ओन पसुअन क चाम, सरीर अउ सरीरे क मल आगी में बारी। 28तब ओन चीजन क बारइवाला मनई क आपन ओढ़ना अउ पूरा सरीर क पानी डइके धोवइ चाही। ओकरे पाछे उ मनई डेरा में आइ सकत ह।

29“इ नेम तोहरे बरे सदा रही। सतएँ महीना क दसवें दिन तू पचन क जरूर उपवास करइ चाही। तू पचन क कउनो काम नाहीं करइ चाही। तोहरे संग रहइवाला नागरिक या विदेसी भी कउनो काम नाहीं कइ सकिहीं। 30काहेकि उ दिन याजक तोहका सुद्ध किहिस ह अउ तोहरे पापनक बरे प्रायश्चित किहिस ह। तब तू पचे यहोवा बरे सुद्ध होब्या। 31इ दिन तोहरे बरे आराम करइ क बिसेस दिन अहइ। तोहका सबन क इ दिन उपवास करइ चाही। इ नेम सदा बरे होइ। 32तउ उ मनई जउन महा याजक बनइ बरे अभिसेक किहिस ह इ चीजन सुद्ध करइ बरे प्रायश्चित करी। इ उहइ मनई अहइ जेका ओकरे पिता क मउत क पाछे महा याजक क रूप में सेवा बरे तय कीन्ह ग अहइ। उ याजक क सन क पवित्तर ओढ़ना धारण करइ चाही। 33ओका पवित्तर स्थान, मिलापवाला तम्बू अउ वेदी क सुद्ध करइ चाही अउ ओका याजक अउ इस्त्राएल क सबहिं लोगन क सुद्ध करइ चाही। 34इस्त्राएल क लोगन क प्रायश्चित करइ क इ नेम सदा ही रही। तोहका इ सबइ बरिस में एक दाईं जरूर करइ चाही।”

एह बरे उ पचे उहइ किहेन जउन करइ क यहोवा मूसा क आदेस दिहे रहा।

जनावरन क मारइ अउ खाइ क नेम

17 यहोवा मूसा स कहेस, ²“हारून, ओकरे पूतन अउ इस्राएल क सबहिं मनइयन स कहा। ओनका कहा कि यहोवा इ हुकुम दिहे अहइ: ³कउनो इस्राएली मनई कउनो बर्धा या भेड़ी क बच्चा या बोकरा क डेरा में या डेरा क बाहेर मारि सकत ह। ⁴उ व्यक्ति उ जनावरे क मिलापवाले तम्बू क दुआरे पइ लिआइ। ओका उ जनावर क एक हीसा यहोवा क भेंट क रुप में देइ चाही। उ व्यक्ति रकत बहाएस ह। उ मारे बाटइ एह बरे ओका यहोवा क पवित्तर तम्बू में भेंट लइ जाइ चाही। अगर उ जनावर क हीसा यहोवा क लगे नहीं लइ जात तउ ओका आपन लोगन स अलग कइ देइ चाही। ⁵इ नेम एह बरे अहइ कि लोग मेलबलि यहोवा क अर्पण करईं। इस्राएल क लोगन क ओन जनावरन क जरूर लावइ चाही जेनका उ पचे मैदान में मारत ह। ओनका ओन जनावरन क मिलापवाला तम्बू क दुआर पइ लावइ चाही। ओनका ओन जनावरन क याजक क लगे लिआवइ चाही। ⁶तब याजक ओन जनावरन क रकत मिलापवाला तम्बू क दुआरे क लगे यहोवा क वेदी तलक फेंकइ। याजक ओन जनावरन क चर्बी क वेदी पइ बारी। इ यहोवा बरे महकउआ सुगन्ध होइ। ⁷ओनका कउनो भेंट ‘बोकरन क मूर्तियन’ क अगवा नहीं चढ़ावइ चाही, जउन उ पचन क वेस्थावृति क नाई बदलत हीं। इ सबइ नेम हमेसा रहईं।

⁸“लोगन स कहा: इस्राएल क कउनो नागरिक या कउनो बिदेसी जउन तू पचन क बीच बसत ह मैं स कउनो जउन मेलबलि अउ होमबलि चढ़ावत ह ⁹ओका आपन बलि क मिलापवाला तम्बू क दुआर पइ लइ चाही अउ ओका यहोवा क चढ़ावइ चाही। अगर उ मनई अइसा नहीं करत तउ ओका आपन लोगन स अलग कइ देइ चाही।

¹⁰“मईं हर अइसे मनई क खिलाफ होब जउन रकत खात ह। चाहे उ इस्राएल क नागरिक होइ या उ तोहरे बीच रहइवाला कउनो बिदेसी होइ। मईं ओका ओकरे लोगन स अलग कइ देब। ¹¹काहेकि प्राणी क जीवन रकत में बाटइ। मईं तू पचन क उ रकत वेदी पइ डवइ क नेम दिहेउं ह। इ तोहार आपन प्रायश्चित करइ बरे अहइ। काहेकि रकत में जान बाटइ, इ तोहार प्रायश्चित करी। ¹²एह बरे मईं इस्राएल क लोगन स कहत हउं: तू पचन में स कउनो अउर न ही तू पचन क बीच रहइवाला कउनो बिदेसी रकत खाइ सकत ह। ¹³अगर कउनो मनई कउनो जंगली जनावर या पंछी क धरत ह जेका खावा जाइ सकइ तउ उ मनई क रकत भुईया पइ जरूर बहाइ देइ चाही अउ माटी स ओका मूँद देइ चाही। चाहे उ मनई इस्राएल क नागरिक होइ या तू पचन क बीच रहइवाला बिदेसी ओका इ जरूर करइ चाही। ¹⁴तू पचन क इ काहे करइ चाही? काहेकि अगर रकत गोसे में बाटइ तउ उ जनावर क प्राण भी गोसे में बाटइ। एह बरे मईं इस्राएल क लोगन क हुकुम देत अहउं: उ गोस क जिन खा जेहमों रकत होइ। कउनो भी मनई जउन रकत खात ह आपन लोगन स अलगाइ दीन्ह जाइ।

¹⁵“अगर कउनो मनई खुद स मरा भवा जनावर या कउनो दूसर जनावर क जरिये मरा भवा जनावर क खात ह।

उ साँझ तलक असुद्ध रही। तउ उ मनई क आपन ओढ़ना अउ आपन पूरा सरीर पानी स धोवइ चाही। चाहे उ मनई इस्राएल क नागरिक हो या तू पचन क बीच रहइवाल बिदेसी। ओका इ जरूर करइ चाही। ¹⁶अगर उ मनई आपन ओढ़नन क नाहीं धोवत अउ न ही नहात ह तउ उ पाप करइ क अपराधी होइ।”

यौन सम्बंध क बारे में नेम

18 यहोवा मूसा स कहेस, ²“इस्राएल क लोगन स कहा: मईं यहोवा तू पचन क परमेस्सर अहउं। ³हिआँ आवइ क पहिले तू लोग मिस्त्र में रह्या। तू पचन क उ नाहीं करइ चाही जउन हुआँ होत भवा रहा। मईं तू लोगन क कनान लइ जात अहउं। तू लोगन क उ नाहीं करब अहइ जउन उ देस में कीन्ह जात ह। ⁴तू पचन क मोरे नेमन क जरूर पालन करइ चाही। इ नेमन क पालन में होसियार रहा। काहेकि मईं यहोवा तू पचन क परमेस्सर अहउं। ⁵एह बरे तू पचन क मोरे सबइ नेमन अउ कानून क पालन जरूर करइ चाही। अगर कउनो मनई मोर सबइ नेमन अउ हुकुमन क पालन करत ह तउ उ जिअत रही। मईं यहोवा अहउं।

⁶“तोहका सबन्क निचके क रिस्तेदारन स कबहुँ यौन सम्बंध नाहीं करइ चाही। मईं यहोवा अहउं!

⁷“तू पचन्क आपन पिता क अपमान नाहीं करइ चाही अरथ अहइ तू पचन्क आपन महतारी क संग यौन सम्बंध नाहीं करइ चाही। ⁸तू पचन्क आपन बाप क मेहरारु स भी यौन सम्बंध नाहीं करइ चाही चाहे उ तोहार महतारी भले ही न होइ। पिता क स्त्री स यौन सम्बंध सिरिफ तोहरे पिता बरे अहइ।

⁹“तू पचन्क आपन पिता या महतारी क बिटिया अर्थात आपन बहिन स यौन सम्बंध नाहीं करइ चाही। एहसे फरक नाहीं पड़त कि तोहरी उ बहिन क पालन पोसण तोहरे घरे में भवा या कउनो दूसर जगह।

¹⁰“तोहका सबन्क आपन नाती पोतन स यौन सम्बंध नाहीं करइ चाही। उ पचे तोहार अंग* अहईं।

¹¹“अगर तोहरे पिता अउ ओकर पत्नी* क कउनो बिटिया अहइ तउ तोहरा बहिन अहइ। तू सबन्क ओनकइ संग यौन सम्बंध नाहीं करइ चाही।

¹²“आपन पिता क बहिन क संग तोहार यौन सम्बंध नाहीं होइ चाही। उ तोहरे पिता क गोत क अहइ। ¹³तू पचन्क आपन महतारी क बहिन क संग यौन सम्बंध नाहीं करइ चाही। उ तोहरे महतारी क गोत क अहइ। ¹⁴तू पचन्क आपन पिता क भाई क पत्नी क संग यौन सम्बंध नाहीं करइ चाही। तू पचन्क आपन चाचा क पत्नी क निअरे तलक नाहीं जाइ चाही। उ तोहार काकी अहइ।

¹⁵“तोहका पचन्क आपन पतोहू क संग यौन सम्बंध नाहीं करइ चाही। उ तोहरे बेटवा क पत्नी अहइ। तोहका ओकरे संग यौन सम्बंध नाहीं करइ चाही।

तोहार अंग ओनकर नंगा होब तोहार नंगा होब अहइ।

ओकर पत्नी साइद एकर अरथ “तोहार सौतेली महतारी।”

16“तू पचन्क आपन भाई क पत्नी क संग यौन सम्बंध नहीं करइ चाही। इ आपन भाई क संग यौन सम्बंध रखब जइसा होइ। सिरिफ तोहार भाई आपन पत्नी क संग यौन सम्बंध रख सकत ह।*
 17“तोहका सबन्क कउनो महतारी अउ ओकरी बिटिया स यौन सम्बंध नहीं रखइ चाही अउ तोहका इ स्त्री क नातिन स यौन सम्बंध नहीं रखइ चाही। एहसे इ फरक नहीं पड़त कि उ नातिन उ स्त्री क पूत या बिटिया क बिटिया बाटइ। ओकर पोतिन ओकरे नजदिकी गोत क बाटिन। ओनकइ संग यौन सम्बंध करब गलत अहइ।
 18“जब ताई तोहार स्त्री जिअत बाटइ, तू सबन्क ओकरी बहिन क दूसर स्त्री नहीं बनावइ चाही। इ बहिनियन क आपसी दुस्मन बनाइ देइ। तोहका सबन्क आपन स्त्री क बहिन स यौन सम्बंध नहीं करइ चाही।
 19“तोहका सबन्क कउनो स्त्री क लगे ओकरे मासिक धर्म क समइ यौन सम्बंध बरे नहीं जाइ चाही। उ इ समइ असुद्ध अहइ।
 20“तोहे सबन्क आपन पड़ोसी क स्त्री स यौन सम्बंध नहीं करइ चाही। इ तू सबन्क असुद्ध बनाइ।
 21“तू सबन्क आपन कउनो गदेली क आगी क जरिये मोलेक क भेंट नहीं चढ़ावइ चाही। अगर तू पचे अइसा करत अहा तउ तू पचे आपन यहोवा क नाउँ क अपमान किहस ह। मई यहोवा अहउँ।
 22“तू सबन्क कउनो मनसेधू क संग यौन सम्बंध नहीं करइ चाही जइसा कउनो स्त्री क साथ कीन्ह जात ह। इ भयंकर पाप अहइ।
 23“कउनो जनावर क संग तोहार यौन सम्बंध नहीं होइ चाही। इ सिरिफ तोहका घिनौना बनाइ देइ। स्त्री क भी कउनो जनावर क संग यौन सम्बंध नहीं करइ चाही। इ प्रकृति क खिलाफ अहइ।
 24“इ सबइ अनुचित कामन स आपन क असुद्ध जिन करा। मई ओन रास्ट्रन क ओकर देस स बाहेर करत हउँ अउर मई ओनकी धरती तू सबन्क देत अहउँ। काहेकि उ पचे लोग वइसेन भयंकर पाप करत हीं। 25एह बरे उ देस असुद्ध होइ ग बाटइ। एह बरे मई ओन लोगन स ओनकइ पापन बरे भरपाई कराउब। उ देस आपन निवासियन बाहेर अलगइ देत ह।
 26“एह बरे तू पचे मोरे सबइ नेमन अउ कानूनन क पालन जरूर करब्या। तू पचन्क ओनमाँ स कउनो भयंकर पाप नहीं करइ चाही। इ सबइ नेमन इस्त्राएल क सबहिं नागरिक अउर तोहरे बीच रहइवाला सबहिं बिदेसियन बरे बाटइ। 27जउन लोग तू सबन्स पहिले हुआँ रहेन उ पचे उ सबइ भयंकर पापन किहेन। जेहसे उ धरती असुद्ध होइ गवा। 28अगर तू पचे भी उहइ काम करब्या तउ तू पचे इ धरती क गन्दा बनउब्या। इ तू लोगन्क वइसेन ही बाहेर निकाति देइ, जइसेन तू पचेन स पहिले बसइवाली जातियन क संग कीन्ह गवा रहा। 29अगर कउनो मनई ओन भयंकर पापन मँ कउनो पाप करत ह, तउ उ आपन लोगन स अलग कइ दीन्ह जाइ। 30दूसर लोग उ ओन भयंकर पापन

क किहेन ह। मुला मोरे नेमन क पालन करइ चाही। तोहका पचन्क ओन भयंकर पापन मँ स कउनो भी नहीं करइ चाही। ओन भयंकर पापन स आपन क असुद्ध जिन बनाव। मई तोहार सबन्क परमेस्सर यहोवा अहउँ।”

इस्त्राएल परमेस्सर क अहइ

19 यहोवा मूसा स कहेस, 2“इस्त्राएल क सबहिं लोगन स कहा: कि मई तोहार परमेस्सर अहउँ मई पवितर हउँ! एह बरे तू सबन्क पवितर होइ चाही!

3“तू पचन मँ स हर एक मनई क आपन महतारी बाप क सम्मान करइ चाही अउ मोर बिस्त्राम क खास दिनन क मनावइ चाही। मई तोहार पवितर परमेस्सर अहउँ!

4“मूर्तिर्यन क उपासना जिन करा। आपन बरे देवतन क मूर्तिर्यन क धातु गलाइके जिन बनाव। मई तू लोगन क परमेस्सर यहोवा अहउँ।

5“जबहिं तू यहोवा क मेलबलि चढ़ावा तउ तू पचे ओका अइसे ठीक तरीका स चढ़ावा कि यहोवा तोहार बलि क स्वीकार कइ लेइ। 6जउने दिन चढ़उब्या तू एँका खाइ सकब्या अउ दूसरे दिन भी। मुला अगर बलि क कछू हींसा तीसर दिन भी बचि जाइ तउ ओका तू पचन क आगी मँ बारि देइ चाही। 7कउनो भी बलि क तीसर दिन नहीं खाइ चाही। इ असुद्ध बाटइ। इ अंगीकार नहीं होइ। 8अगर कउनो मनई अइसा कामन करत ह तउ उ दोखी होइ। काहेकि उ यहोवा क पवितर चीजन क दूसित किहेस। उ मनई क ओकर लोगन स अलग कइ दीन्ह जाइ।

9“जबहिं तू कटनी क समइ आपन फसल काट्या तउ तू पचे सब कइँती स खेत क कोनन ताई जिन काट्या अउर अगर अन्न जमीन पइ गिरि जात ह तउ तू पचन्क ओका बटोरइ नहीं चाही। 10आपन अंगूरे क बगिया क सारा अंगूर जिन तोइया। जउन अंगूर भुइँया पइ गिरि जाइँ ओनका जिन उठावा। काहेकि तू पचन्क उ सबइ चीजन गरीब लोगन अउर जउन तोहार बीच रहइवाला बिदेसियन बाटइ ओनके बरे छोड़इ चाही। मई यहोवा तोहार परमेस्सर अहउँ!

11“तू पचन्क चोरी नहीं करइ चाही। तू पचन्क लोगन्क ठगी नहीं करइ चाही। तू पचन्क आपुस मँ झूठ नहीं बोलइ चाही। 12तू पचन्क मोरे नाउँ पइ झूठा बचन नहीं देइ चाही। अगर तू पचे अइसा करत ह्या तउ तू पचे आपन परमेस्सर क नाउँ क अपमान करत ह। मई यहोवा तोहार परमेस्सर अहउँ!

13“तू पचन्क आपन पड़ोसी क धोखा नहीं देइ चाही। तू पचन्क ओकर चोरी नहीं करइ चाही। तू पचन्क मजदूर क मजदूरी पूरी रात, भिन्सारे तलक नहीं रोकइ चाही।*
 14“तू पचन्क कउनो बहिरे मनई क सरापइ नहीं चाही। तू पचन्क कउनो आँधर क भहरावइ बरे ओकरे अगवा कउनो चीज नहीं रखइ चाही। मुला तू पचन्क आपन परमेस्सर यहोवा क सम्मान करइ चाही। मई यहोवा अहउँ!

तू पचन्क ... रोकइ चाही एहसे इ पता लागत ह कि मजदूरी पइ धरा गए मजदूर क उहइ दिन कीन्ह गए कामे क मजदूरी उहइ दिन दीन्ह जात रही। लखइँ मत्ती 20:1-16

सिरिफ ... सकत ह “उ तोहरे भाई क नंगापन अहइ।”

15“तू पचन्क क निआव करइ में ईमानदार होइ चाही। न तउ तू पचन्क गरीबन क संग खास पच्छपात करइ चाही अउ न ही बड़कन अउ धनी मनइयन बरे कउनो आदर देखावइ चाही। तू पचन्क आपन पड़ोसी क संग निआव करत समइ ईमानदार होइ चाही। 16तू पचन्क दूसर लोगन्क खिलाफ चारिहूँ कईती अफवाह सँचरावत भए नहीं चलइ चाही। अइसा कछू जिन करा जउन तू पचन्क पड़ोसी क खतरा में डइ देइ। मईँ यहोवा अहउँ!

17“तू पचन्क आपन हिरदइ में आपन भाइयन स घिना नहीं करइ चाही। अगर तोहार पड़ोसी कछू बुरा करत ह तउ एकरे बारे में ओका समझावा। मुला ओका छिमा करा! 18लोग, जउन तोहार बुरा करइँ, ओका बिसरि जा। ओसे बदला लेइ क कोसिस जिन करा। आपन पड़ोसी स वइसेन ही पिरेम करा जइसे अपने आप स करत ह्या। मईँ यहोवा अहउँ!

19“तू पचन्क मोरे नेमन क पालन जरूर करा। दुइ जाति क जनावनन क प्रजनन बरे आपुस में जिन मिलावा। तू पचन क खेते में दुइ तरह क बिआ नहीं मिलावइ चाही। तू पचन्क दुइ तरह क मिलावत स बना ओढ़ना क नहीं पहिरइ चाही।

20“इ होइ सकत ह कि कउनो दूसर मनई क दासी स कउनो मनई क यौन संबंध होइ। अगर इ दासी न तउ खरीदी गइ अहइ अउर न ही अजाद कराई गइ अहइ तउ ओनका जरूर दण्ड दीन्ह जाइ चाही। मुला उ पचे मउत न पइहीं। काहेकि स्त्री अजाद नहीं रही। 21उ मनई क आपन अपराध बरे मिलापवाला तम्बू क दुआरे पइ यहोवा बरे जरूर दोखबलि चढ़ावइ चाही। मनई क एक टु भेड़ा दोखबलि क रूप में लावइ चाही।

22“याजक उ मनई बरे जउन पाप किहेस ह क प्रायश्चित करी। याजक यहोवा क दोखबलि क रुप में भेड़ा क चढ़ाइ। इ मनई क कीन्ह गए पापन बरे भेंट होइ। तब मनई आपन कीन्ह गए पापन बरे छिमा पाइहीं।

23“भविस्स में तू पचे आपन प्रदेस में प्रवेस करब्या। उ समइ भोजन बरे तू पचे किसिम किसिम क बृच्छ लगाउब्या। पौधा लगावइ क पाछे बृच्छ क कउनो फले क प्रयोग करइ बरे तोहका तीन बरिस तलक जोहइ चाही। तू पचन क ओसे पहिले क फल क प्रयोग नहीं करइ चाही।

24“चउथे बरिस उ बृच्छ क फले यहोवा क होइहीं। इ यहोवा क स्तुति बरे पवितर भेंट होइ। 25तब, पँचवें बरिस तू सब उ बृच्छ क फल चखि सकत ह अउ बृच्छ तोहरे बरे जियादा स जियादा फल पइदा करी। मईँ तोहार परमेस्सर यहोवा अहउँ।

26“तू सबन्क क कउनो गोस जेहमा रकत बाटइ नहीं खाइ चाही। तू पचन्क भविस्सबाणी करइ बरे जादू या कउनो दूसर चीजियन क प्रयोग नहीं करइ चाही।

27“तू पचन्क आपन मूँडे क बगल क बाढ़ भवा बार कटवावइ नहीं चाही या तोहका आपन दाढ़ी क छटवावइ नहीं चाही। 28कउनो मरे मनई क सुमिरन बनाए रहइ बरे आपन तन क काटइ नहीं चाही। तू पचन्क आपन सरीर प गोदना गोदवावइ नहीं चाही। मईँ यहोवा अहउँ!

29“तू पचे आपन बिटिया क बेस्या जिन बनइ द्या। एहसे सिरिफ इ पता लागत ह कि तू ओकर इज्जत नहीं करत ह्या। तू पचे आपन देस में स्त्रियन क बेस्या जिन बनइ द्या। तू पचे आपन देस क इ तरह क पापन स जिन भर जाइ द्या।

30“तू पचन्क मोरे बिस्त्राम क बिसेस दिनन में काम नहीं करइ चाही। तू पचन्क मोरे पवितर ठउर क सम्मान जरूर करइ चाही। मईँ यहोवा अहउँ!

31“ओझा लोगन अउ भूत सिद्ध लोगन लगे सलाह बरे जिन जा। उ पचे सिरिफ तोहका असुद्ध बनइहीं। मईँ तोहार परमेस्सर यहोवा अहउँ।

32“बुढ़वा मनइयन क सम्मान करा। जब उ पचे कमरा में आवईँ तउ खड़ा होइ जा। आपन परमेस्सर क सम्मान करा। मईँ यहोवा अहउँ।

33“आपन देस में बिदेसी लोगन क संग बुरा बेउहार जिन करा! 34तू पचन्क बिदेसी लोगन क संग वइसा ही बेउहार ही करइ चाही जइसा तू पचे आपन नागरिकन क संग करत ह्या। तू बिदेसियन स वइसेन पियार करा जइसा आपन स करत ह्या। काहेकि तू पचे भी एक समइ मिस्त्र में बिदेसी रह्या। मईँ तोहार परमेस्सर यहोवा अहउँ!

35“तू पचन्क निआव करत समइ लोगन बरे ईमानदार होइ चाही। तू पचन्क चीजन क जोखइ अउ तउलइ में ईमानदार होइ चाही। 36तोहार झउअन ठीक नाप क होइ चाही। तोहरे नाप करइ क बासन में द्रव क ठीक मात्रा आवइ चाही। तोहरे तराजू अउ बटखरा चीजनक ठीक तउलइवाला होइ चाही। मईँ तोहार परमेस्सर यहोवा अहउँ। मईँ तू पचन्क मिस्त्र देस स बाहेर लिआएँ!

37“तोहका पचन्क सबहि नेम अउ निर्णयन क सुमिरिके रखइ चाही अउ तू सबन्क ओनका पालन करइ चाही। मईँ यहोवा अहउँ!”

मूर्ति पूजा क खिलाफ चिताउनी

20 यहोवा मूसा स कहेस, 2“तोहका इस्त्राएल क लोगन स इ भी कहइ चाही: तोहरे देस में कउनो मनई आपन गदेलन में स कउनो क लबार देवता मोलेक क दइ सकत ह। उ मनई क जरूर मार डवइ चाही। एहसे फरक नहीं पड़त कि उ इस्त्राएल क नागरिक अहइ या इस्त्राएल में बसइया कउनो बिदेसी। तू पचन क ओका पाथर लोकाइ लोकाइके मारि डवइ चाही। 3मईँ उ मनई क खिलाफ होब। मईँ ओका ओकरे लोगन स अलग कइ देब। काहेकि उ आपन गदेलन क मोलेक क दिहस। उ मोरे पवितर नाउँ क अपमान किहेस। उ मोरे पवितर ठउरे क असुद्ध किहस। 4होइ सकत ह कि साधारिन लोग उ मनई क उपेच्छा करइ। होइ सकत ह कि उ मनई क न मारइ जउन गदेलन क मोलेक क दिहस ह। 5मुला मईँ उ व्यक्ति अउ ओकरे परिवार क खिलाफ होब। मईँ ओका ओकरे लोगन स अलग करब। मईँ कउनो भी अइसे व्यक्ति क ओकरे लोगन स अलग करब, जउन मोलेक क पाछे वेस्या क तरह करत ह।

6“मई उ मनई क खिलाफ होब जउन कउनो ओझा या भूतसिद्ध क लगे सलाह लेइ बरे जात ह। अइसा करइके उ मोहे स अबिस्सासी होइ जात ह। एह बरे मई उ मनई क ओकरे लोगन स अलग करब।

7“बिसेस बना। आपन क पवितर बनावा। काहेकि मई यहोवा तोहार परमेस्सर अहउँ। 8मोर सबइ आग्या क पालन करा अउ ओनका सुमिरा। मई यहोवा अहउँ अउर मई तू लोगन क आपन बिसेस लोग बनाएउँ ह।

9“अगर कउनो मनई आपन महतारी-बाप क सराप देत ह तउ उ मनई क मारि डवइ चाही। उ आपन पिता या महतारी क सराप देत ह, एह बरे उ आपन मउत क खुद जिम्मेदार होइ।

यौन पापक दण्ड

10“अगर कउनो मनई आपन पड़ोसी क पत्नी क संग यौन सम्बंध रखत ह तउ स्त्री अउ मनसेधू दुइनउँ व्यभिचारी क अपराधी अहइँ। एह बरे दुइनउँ क जरूर मारि डवइ चाही। 11अगर कउनो मनई आपन सौतेली महतारी स यौन सम्बंध करत ह तउ उ मनई क मारि डवइ चाही। उ मनई क अउ ओकर सौतेली महतारी दुइनउँ क मार डवइ चाही।* उ मनई आपन पिता क खिलाफ खुद पाप किहेस ह।

12“अगर कउनो मनई आपन पतोहू क संग यौन सम्बंध करत ह तउ दुइनउँ क मारि डवइ चाही। उ पचे बहोत बुरा यौन पाप किहेन ह। ओनका दण्ड जरूर मिलइ चाही।

13“अगर कउनो मनई कउनो मनई क संग मेहरारु जइसा यौन सम्बंध करत ह तउ दुइनउँ क मारि डवइ चाही। उ पचे बहोत बुरा पाप किहेन ह। ओनका दण्ड जरूर मिलइ चाही।

14“अगर कउनो मनई कउनो मेहरारु अउ ओकरी महतारी क संग यौन सम्बंध करत ह तउ इ यौन पाप अहइ। लोगनक उ मनई अउ दुइनउँ मेहररुअन क आगी में बारि देइ चाही। इ यौन पाप क आपन लोगन में जिन होइ द्या।

15“अगर कउनो मनई कउनो गोरु स यौन सम्बंध करइ तउ उ मनई क मारि डवइ चाही अउ तोहका उ गोरु क मारि डवइ चाही। 16अगर कउनो मेहरारु कउनो गोरु स यौन सम्बंध करत ह तउ तू पचन क उ मेहरारु अउ उ गोरु क मारि डवइ चाही। ओनका जरूर मारि डवइ चाही।

17“इ एक भाई अउ ओकरी बहिन या सोतेली बहिन बरे लज्जा क बात अहइ कि उ पचे आपुस में यौन सम्बंध करइँ। ओनका समाज कइँती स दण्ड मिलइ चाही। उ पचन क आपन लोगन स अलगाइ देइ चाही। उ मनई जउन आपन बहिन क संग यौन सम्बंध किहेस ह, आपन पाप बरे जरूर दण्ड पाई।

18“अगर कउनो मनई कउनो मेहरारु क संग मासिक धर्म क रक्त बहइ क समइ यौन सम्बंध करी, तउ दुइनउँ क आपन लोगन स अलगाइ देइ जाई। उ पचे पाप किहेन क काहेकि उ पचे रक्त क स्रोत क उघारेन ह।

19“तू सबन्क आपन महतारी क बहिन या पिता क बहिन क संग यौन सम्बंध नाहीं करइ चाही। इ आपन नगीचे क

उ मनई ... डवइ चाही सब्द क अरथ “आपन मउत उ पचे खुद बोलाएन ह।”

रिस्तेदार क नंगापन क उघारेन ह। ऐह बरे दुइनउँ क ओनके पाप बरे जरूर दण्ड मिली चाही।

20“कउनो मनई क आपन चाचा-मामा क पत्नी क संग नाहीं सोवइ चाही। इ मनई अउ ओकर चाची अउ मामी क ओनके पापन बरे दण्ड मिली। उ पचे बगैर कउनो सन्तान क मरिहीं। 21कउनो मनई क बरे इ बुरा अहइ कि उ आपन भाई क स्त्री क संग यौन सम्बंध करइ। उ मनई आपन भाई क खिलाफ पाप किहे बाटइ। ओकर कउनो सन्तान नाहीं होइ।

22“तू पचन क मोर सारे नेम अउ निर्णय क सुमिरइ चाही अउ तोहका ओनकर पालन जरूर करइ चाही। मई तू पचन क तोहरे प्रदेस लइ जात अहउँ। तू लोग उ प्रदेस में रहब्या। अगर तू लोग मोर नेमन अउ सबइ निर्णय क मानत रहब्या तउ उ प्रदेस तू लोगन क निकारिके बाहेर न करी। 23मई दूसर लोगन क उ प्रदेस क तजइ क मजबूर करत हउँ। काहेकि ओन लोगन उ सबइ पाप किहेन। मई ओन पापन स घिना करत हउँ। एह बरे तू पचन्क ओकरे जीवन-सैली क नकल नाहीं करइ चाही।

24“मई कहेउँ ह कि तू पचे ओनकर प्रदेस पउब्या। मई ओनकर प्रदेस तू पचन क देबउँ। उ तोहार प्रदेस होइ। उ प्रदेस दूध अउ सहद क नदियन बहत हीं। मई तोहार परमेस्सर यहोवा अहउँ।

“मई तू पचन्क खास बनाएउँ ह। मई तोहरे संग दूसर रास्ट्रन स अलग बेउहार किहेउँ ह। 25एह बरे तू पचन क सुद्ध जनावरन क संग असुद्ध जनावरन स जरूर अलग बेउहार करइ चाही। तू पचन क सुद्ध पंछियन क संग असुद्ध पंछियन स जरूर अलग बेउहार करइ चाही। ओनमाँ स कउनो भी असुद्ध पंछी, जनावरन अउ कीड़ा-पतंगा क जिन खा जउन भुइयाँ प रेंगत हीं। मई ओन चीजन क असुद्ध बनाएउँ ह। 26तू पचन क मोरे बरे पवितर होइ चाही। काहेकि मई यहोवा अहउँ अउ मई पवितर हउँ। मई तोहका दूसर रास्ट्रन स अलग कइ दिहे हउँ तोहका बिसेस लोग बनावई बरे जउन कि मोर अहइ।

27“अगर कउनो मनसेधू या मेहरारु ओझा होइ या कउनो जादूगर होइ, ओनका निहचय ही मार दीन्ह जाइ। लोगन क चाही कि उ पचे पाथर मारि मारिके मार देईं। उ आपन मउत क खुद ही कसूरवार होइ।”

याजकन बरे नेम

21 यहोवा मूसा स कहेस, “इ सबइ बातन हारून क याजक पूतन स कहा: कउनो मरे भए मनई क छुइके याजक आपन क असुद्ध न करइ। 2मुला अगर मरा भवा मनई ओकरे निजके रिस्तेदारन में स कउनो अहइ तउ उ मरे भए क लहास क छुइ सकत ह। याजक आपन क असुद्ध कइ सकत ह अगर मरा मनई ओकर महतारी, बाप, ओकर पूत, या बितिया, ओकर भाई, 3ओकर बिन बियाही बहिन अहइ। (इ बहन ओकर निचके क रिस्तेदार अहइ काहेकि ओकर भतार नाहीं अहइ।) एह बरे याजक आपन क असुद्ध कइ सकत ह, अगर उ मरत ह। 4मुला याजक

आपन क असुद्ध नहीं करइ चाही, अगर मरा भवा व्यक्ति बियाहे क कारण ओकर रिस्तेदार होइ।*

5“याजकन क आपन मूँडे क मूडन नहीं करावइ चाही। याजकन क आपन दाढ़ी क सिरा नहीं कटवावइ चाही। याजकन क आपन चाम पइ कहूँ भी काटइ नहीं चाही। 6याजकन क आपन परमेस्सर बरे पवितर होइ चाही। उ पचे आपन परमेस्सर क नाउँ क दूसित नहीं करइ चाही। काहेकि उ पचे आपन भोजन अउ भेंट यहोवा क चढ़ावत ह एह बरे ओनका पवितर होइ चाही।

7“याजक परमेस्सर बरे पवितर अहइ। एह बरे याजक क अइसी मेहरारु स बियाह नहीं करइ चाही जउन कउनो क संग यौन सम्बंध किहे होइ। याजक क कउनो पतुरिया, या तलाक दीन्ह गइ मेहरारु स बियाह नहीं करइ चाही। 8याजक परमेस्सर बरे पवितर अहइ। एह बरे तू पचन क ओकरे साथे खास तरह स बेउहार करइ चाही। काहेकि उ पवितर चीजन क लइ चलत बाटइ। उ पवितर रोटी परमेस्सर क चढ़ावत ह अउर मई पवितर अहउँ। मई यहोवा अहउँ, अउर मई तू पचन क पवितर बनावत अहँउ।

9“अगर याजक क बिटिया पतुरिया बन जात ह तउ उ आपन इज्जत बरबाद करत ह अउ अपने भतारे पइ कलंक लगावत ह। एह बरे ओका बारि देइ चाही।

10“महा याजक आपन भाइयन मँ स चुना जात रहा। अभिसेक क तेल ओकरे मूँडे पइ नावा जात रहा। इ तरह उ महा याजक क बिसेस कर्तव्य बरे तैनात कीन्ह जात रहा। ओका महा याजक क खास ओढ़ना पहिरइ बरे चुना जात रहा। ओका आपन बार जंगली ढंग स नहीं बिखेरइ चाही। ओका आपन ओढ़ना बढ़ाइ देइ नहीं चाही। 11ओका मुर्दा क छुइके आपन क असुद्ध नहीं बनावइ चाही। ओका कउनो मुर्दा क लगे नहीं जाइ चाही। चाहे उ ओकर महतारी-बाप का ही काहे न होइ। 12महा याजक क परमेस्सर क पवितर ठउर क बाहरे नहीं जाइ चाही। अगर उ अइसा किहस तउ उ असुद्ध होइ जाइ अउ उ परमेस्सर क पवितर ठउर क भी अपमान कइ देइ। अभिसेक क तेल महा याजक क मूँडे पइ नावइ चाही। मई यहोवा अहउँ।

13“महा याजक क सिरिफ ओकर संग बियाह करइ चाही जउन कुवौरी होइ। 14महा याजक क अइसी मेहरारु स बियाह नहीं करइ चाही जउन कउनो दूसर मनई क संग यौन सम्बंध रख चुकी होइ। महा याजक क कउनो रण्डी, तलाक दीन्ह गइ मेहरारु या रौँड मेहरारु स बियाह नहीं करइ चाही। महा याजक क आपन लोगन मँ स एक कुवौरी स बियाह करइ चाही। 15ओका आपन गदेलन क अपवितर नहीं करइ चाही। मई, यहोवा, याजक क ओकरे खास कामे बरे पवितर बनाएँ ह।”

16यहोवा मूसा स कहेस, 17“हारून स कहा: अगर तोहरे बंस मँ जन्मइवालन क सन्तानन मँ स कउनो आपन मँ कउनो दोख पावइ तउ ओनका खास रोटी परमेस्सर तलक नहीं लइ जाइ चाही। 18कउनो मनई, जेहमँ कउनो दोख होइ, याजकन क काम न कइ सकत ह। उ मोरे लगे भेंट

नहीं लिआइ सकत ह। इ सबइ लोग याजक क रुप मँ सेवा नहीं कइ सकतेन।

ऑंधर मनई, लँगड़ा मनई, भयंकर चेहरा वाला मनई, बहोत जियादा लम्बी बाँह अउर टोंगवाला मनई।

19टूटा गोड़ या हाथवाला मनई,

20कुबड़ा मनई, बौना, ऑँखी मँ दोखवाला मनई, खजुरी अउ चरम रोग क मनई, बधिया कीन्ह गवा मनई।

21अगर हारून क कउनो बंसे मँ कछु दोख अहइ। अहइ तउ उ यहोवा क होमबलि नहीं चढ़ाइ सकत अउर उ खास रोटी परमेस्सर क लगे नहीं लइ जाइ सकत ह। 22बहरहाल उ पवितर रोटी खाइ सकत ह। उ सबन त पवितर रोटी भी खाइ सकत ह। 23मुला उ सबन त जियादा पवितर ठउरे मँ पर्दा स होइके नहीं जाइ सकत अउर न ही उ वेदी क लगे जाइ सकत ह। काहेकि ओहमँ कछु दोख अहइ। ओका मोरे पवितर ठउर क अपवितर नहीं बनावइ चाही। मई यहोवा ओन ठउरन क पवितर बनावत हउँ।”

24एह बरे मूसा इ सबइ बातन हारून स, हारून क पूतन अउ इस्राएल क सबहि लोगन स कहेस।

22 यहोवा परमेस्सर मूसा स कहेस, 2“हारून अउ ओकरे पूतन स कहा: इस्राएल क लोग जउन चिजियन मोका देइहीं, उ सबइ पवितर होइ जइहीं। उ सबइ मोर अहइँ। एह बरे तू सबइ याजकन क उ सबइ चीजन नहीं लेइ चाही। तोहका उ सबइ पवितर चिजियन क नहीं लेइ चाही। एँह बरे तू मोर नाउँ क अपमान नहीं करब्या। मई यहोवा अहउँ। 3अगर तोहरे बंसे मँ जन्मइवालन मँ स कउनो व्यक्ति जउन असुद्ध अहइ। ओन चीजन क छुई। तउ उ व्यक्ति क मोसे अलग कइ दीन्ह जाइ। इस्राएल क लोग उ सबइ चीजन क मोका दिहन। मई यहोवा अहउँ।

4“अगर हारून क कउनो बंसे जन्मइ वालन मँ क बुरा चरम रोगन मँ स कउनो रोग होइ या ओका धात स्राव होइ तउ ओका तबहि तलक कउनो पवितर खाना नहीं खाइ चाही जब तलक उ सुद्ध न होइ जाइ। इ नेम उ सबइ याजक क बरे अहइ जउन असुद्ध होइ। उ याजक कउनो लहासे क छुइके या आपन वीर्य क गिरइ स असुद्ध होइ सकत ह। 5उ तब असुद्ध होइ सकत ह। जब उ कउनो रंगइवाला जनावर क छुअइ। उ तब असुद्ध होइ सकत ह जब उ कउनो असुद्ध मनई क छुअइ। एकर कउनो महत्व नहीं कि उ मनई क कउन चीज असुद्ध किहे अहइ। 6अगर कउनो मनई ओन चीजन क छुई तउ उ सँझ तलक असुद्ध रही। उ मनई क पवितर भोजन मँ स कछु भी नहीं खाइ चाही! पानी डाइके बगैर नहाए भए उ पवितर भोजन नहीं कइ सकत ह। 7उ सूरज क बूड़इ प इ सुद्ध होइ। तबहुँ उ पवितर भोजन कइ सकत ह। काहेकि भोजन ओकर अहइ।

8“अगर याजक क कउनो अइसा जनावर मिलत ह जउन खुद मरि गवा होइ या कउनो जनावर क जरिये मारि दीन्ह ग होइ तउ ओका मरे भए जनावर क नहीं खाइ चाही। अगर उ मनई जनावर क खाइ लेत ह तउ उ असुद्ध होइ। मई यहोवा अहउँ।

मुला याजक ... रिस्तेदार होइ सब्द क अरथ “मुला सुआमी क आपन लोगन बरे असुद्ध नहीं होइ चाही।”

9"याजक लोगन क उ काम करइ बरे सावधान होइ चाही जउन मई ओका दिहेस ह। ओनका सावधान रहइ क होइ कि उ पचे पवित्र चिजियन क अपवित्र न बनावइ। अगर उ पचे सावधान रहई तउ मरिहीं नाहीं। मई यहोवा ओनका इ खास काम बरे दूसर लोगन स अलगाएउँ ह। 10सिरिफ याजक लोगन क परिवार क मनई ही पवित्र भोजन खाइ सकत हीं। याजक क संग ठहरइवाला अतिथि या मजदूर पवित्र भोजन में स कछू भी नाहीं खाइ। 11मुला अगर याजक आपन धन स कउनो दास क बेसहत ह तउ उ पवित्र चीजन में स कछू क खाइ सकत ह अउ याजक क घरे में पइदा भवा दास भी उ पवित्र भोजन में स कछू खाइ सकत ह। 12कउनो याजक क बिटिया अइसे मनई स बियाह कइ सकत ह जउन याजक न होइ। अगर उ अइसा करत ह तउ पवित्र भेंट में स कछू नाहीं खाइ सकत। 13कउनो याजक क बिटिया विधवा होइ सकत ह, या ओका तलाक दीन्ह जाइ सकत ह। अगर ओकरे भरण पोसण बरे ओकरे लरिकन नाहीं बाटेन अउर उ आपन पिता क हिआँ लउटत ह, जहाँ उ बचपन में रही ह तउ उ पिता क भोजन में स कछू खाइ सकत ह। मुला सिरिफ याजक क परिवार क मनइयन ही इ भोजन क खाइ सकत हीं।

14"कउनो मनई भूलिके कछू पवित्र भोजन खाइ सकत ह। उ मनई क उ पवित्र भोजन याजक क देइ चाही अउ ओकरे अलावा उ भोजन क दाम क पाँचवाँ हीसा ओका अउर देइ क होइ। 15इस्त्राएल क लोग यहोवा क भेंट चढ़ईहीं। उ सबइ भेंटन पवित्र होइ जात हीं। एह बरे याजक क ओन पवित्र चीजन क अपवित्र नाहीं बनावइ चाही। 16अगर याजक ओन चीजन क अपवित्र समझत हीं तउ उ पचे तबहिं आपन पाप क बढ़ईहीं जब पवित्र भोजन क खइहीं। मई, यहोवा, ओनका पवित्र बनावत हउँ।"

17यहोवा परमेस्सर मूसा स कहेस, 18"हारून अउ ओकरे पूतन, अउर इस्त्राएल क सबहिं लोगन स कहा: होइ सकत ह कि इस्त्राएल क कउनो नागरिक या कउनो बिदेसी कउनो भेंट लावइ चाहइ। होइ सकत ह उ कउनो बिसेस बचन दिहे होइ, अउ इ ओकरे बरे होइ। या होइ सकत ह इ उ बिसेस भेंट होइ जेका उ व्यक्ति अर्पित करइ चाहइ। 19-20इ सबइ अइसी भेंटन अहई जेनका लोग एह बरे लिआवत हीं कि उ पचे यहोवा क भेंट चढ़ावइ चाहत हीं। तोहका सबन्क अइसी भेंट नाहीं कबूल करइ चाही जेहमों कउनो दोख होइ। मई उ भेंट स खुस नाहीं होब। अगर भेंट एक ठु साँइ अहइ, या एक ठु भेड़ी अहइ, या एक बोकरा अहइ तउ उ नर होइ चाही अउ एहमों कउनो दोख नाहीं होइ चाही।

21"कउनो मनई यहोवा क मेलबलि चढ़ाइ सकत ह। उ मेलबलि उ व्यक्ति क जरिये दीन्ह गए बचन बरे होइ सकत ह या इ कउनो खुद प्रेरित भेंट होइ सकत ह। इ बर्धा या भेड़ी होइ सकत ह। मुला ओका तन्दुरुस्त अउ दोख रहित होइ चाही। 22तोहका यहोवा क अइसा कउनो गोरु भेंट नाहीं करइ चाही जउन आँधर होइ या जेकर हाइ टूटा होइ, या जउन लंगड़ा होइ, या जेकर घाव बहत होइ, या चरम रोग वाला होइ। तोहका यहोवा बरे वेदी प कउनो बीमार गोरु क भेंट नाहीं चढ़ावइ चाही।

23"कबहुँ कबहुँ कउनो बर्धा या मेमना क गोइ बहोत जियावा लम्बा होइ सकत हीं या अइसेन गोइ होइ सकत हीं जेनकर विकास ठीक स न भवा होइ। अगर कउनो मनई अइसे गोरु क यहोवा क खास भेंट क रुप में चढ़ावत ह तउ उ स्वीकार कीन्ह जाइ। मुला एका कउनो व्यक्ति क जरिये दीन्ह गए बचन बरे स्वीकार नाहीं कीन्ह जाइ।

24"अगर कउनो गोरु क अण्ड कोस जख्मी, घाउवाला, फाड़ा भवा या कटा भवा होई तउ तोहका उ गोरु क भेंट यहोवा क नाहीं चढ़ावइ चाही। तोहका अइसा गोरुअन आपन भुईया पइ बलि नाहीं देइ चाही।

25"तोहका बिदेसियन स बलि बरे अइसे गोरुअन क नाहीं लेइ चाही। काहेकि इ सबइ गोरु कउनो तरह चोट खाए अहई। ओनमों कछू दोख अहइ। इ सबइ स्वीकार नाहीं कीन्ह जइहीं।"

26यहोवा मूसा स कहेस, 27"जब कउनो बछवा, या भेड़ी, या बोकरी जउन नवा पइदा होइ तउ आपन महतारी क संग ओका सात दिन रहइ देइ चाही। तब अठएँ दिन अउ ओकरे पाछे इ यहोवा क दीन्ह जाइवाली बलि क रुप में स्वीकार कीन्ह जइहीं। 28मुला तोहका सबन्क उही दिन उ गोरु अउ ओकरी बच्चन क नाहीं मारइ चाही। इहइ नेम गइया अउ भेड़न बरे अहइ।

29"अगर तू पचन्क यहोवा बरे कउनो खास कृतग्यता बलि चढ़ावइ क होइ तउ तू पचे उ भेंट क चढ़ावइ में अजाद अहा। मुला इ इ तरह करा कि परमेस्सर क खुस करा। 30तू पचन्क पूरा गोरु उहइ दिन खाइ लेइ चाही। तू पचन्क अगले भिन्सारे बरे कछू भी गोस नाहीं छोड़इ चाही। मई यहोवा अहउँ।

31"मोरे आदेसन क याद राखा अउ ओनकइ पालन करा। मई यहोवा अहउँ। 32मोरे पवित्र नाउँ क अपमान जिन करा। मोका इस्त्राएल क लोगन बरे बहोत खास होइ चाही। मई, यहोवा तू पचन्क आपन बिसेस लोग बनाएउँ ह। 33मई तू पचन्क मिस्र स लाएउँ। मई तोहार परमेस्सर बनेउँ। मई यहोवा अहउँ।"

खास पवित्र दिन

23 यहोवा मूसा स कहेस, 2"इस्त्राएल क लोगन स कहा: तू पचे यहोवा क निहचित पर्वन क पवित्र एलन करा। इ सबइ मोर पवित्र दिन अहई:

सबित

3"छः दिन काम करा। मुला सतवाँ दिन, आराम क एक खास दिन या पवित्र मिलन क दिन होइ। उ दिन तू पचन क कउनो काम नाहीं करइ चाही। इ तोहरे सबहिं घरन में यहोवा क सबित अहइ।

फसह त्यौहार

4"इ सबइ यहोवा क चुने भए पवित्र दिन अहई। ओनके बरे निहचित समइ पइ तू पचे पवित्र सभा क घोसणा करब्या। 5यहोवा क फसह त्यौहार पहिले महीना क चउदह तारीख क साँइ बेला में अहइ।

अखमीरी रोटी क त्यौहार

6“उहइ महीना क पन्द्रह तारीख क बे खमीरी मैदा क फुलकन क त्यौहार होइ। तू पचे सात दिना तलक बे खमीरी मैदा क फुलकन खाब्या। 7इ त्यौहार क पहिले दिन तू पचे एक पवितर सभा करब्या। उ दिन तोहका कउनो काम नहीं करइ चाही। 8सात दिन तलक तू पचे यहोवा बरे भेंट चढ़उब्या। सतएँ दिन एक पवितर सभा होइ। उ दिन तू पचन क कउनो काम नहीं करइ चाही।”

पहिली फसल क त्यौहार

9यहोवा मूसा स कहेस, 10“इस्त्राएल क लोगन स कहा: तू पचे उ धरती पड़ जाब्या जेका मई तोहका देव। तू पचे उ समइ ओकर फसल कटब्या। उ समइ तू पचन क आपन फसल क पहिली पूली याजक क लगे लइ आवइ चाही। 11याजक पूली क यहोवा क समन्वा लहराइ। तब उ तोहरे पचन्क बरे स्वीकार कइ लीन्ह जाइ। याजक पूली क रविवार क भिन्सारे लहराइ।

12“जउने दिन तू पचे पूली क लहरउब्या, उ दिन तू पचे एक बरिस क एक ठु नर भेड़ी क बच्चा बलि चढ़उब्या। उ भेड़ी क बच्चा मँ कउनो दोख नहीं होइ चाही। इ भेड़ी क बच्चा यहोवा क होमबलि होइ। 13तू पचन क एपा क दुइ दसवाँ हीसा जइतून क तेल स सना आटा क अन्नबलि देइ चाही। तू पचन क हीन क चौथाई हीसा दाखरस भी देइ चाही। इ भेंट यहोवा क खुस करइवाली सुगन्धि होइ। 14जब तलक तू पचे आपन परमेस्सर क भेंट नहीं चढ़उत्या, तब तलक तू पचे कउनो नवा अनाज, या फल या नवा अनाज स बनी भइ रोटी नहीं खाइ चाही। इ नेम तू पचे जहाँ भी रहब्या, तोहरी पीढ़ी दर पीढ़ी चलत रही।

हप्तन क त्यौहार

15“उ रविवार क भिन्सोर स ही उ दिन जब तू पचे पूली उत्तोलन बलि बरे लिआवत ह, सात हप्ता गिना। 16सतएँ हप्ता क पाछे रविवार क (अर्थात पचास दिन क पाछे) तू पचे यहोवा बरे नवा अन्नबलि लउब्या। 17उ दिन तू पचे आपन निवास स्थान स दुइ-दुइ रोटी लिआवा। इ सबइ उत्तोलन भेंट होइ। खमीर क प्रयोग करा अउ चार क्वार्ट आटा क रोटी बनावा। उ तोहरी पहली फसल स यहोवा क भेंट होइ।

18“लोगन स अन्नबलि क साथ मँ एक ठु बछवा, दुइ भेड़ा अउर एक-एक बरिस क सात नर मेमना भेंट कीन्ह जइहीं। इ गोरुअन मँ कउनो दोख नहीं होइ चाही। इ सबइ भेंट क रूप मँ यहोवा क खुस करइ बरे सुगन्धित होमबलि होइहीं। 19तू पचे भी पापबलि क रूप मँ एक ठु नर बोकरा अउ एक बरिस क दुइ भेड़ी क बच्चन मेलबलि क रूप मँ चढ़उब्या।

20“याजक यहोवा क समन्वा उत्तोलन बलि क रूप मँ दुइ भेड़ी क बच्चन क पहिली फसल क रोटी क संग लहरउब्या। उ सबइ यहोवा बरे पवितर अहई। इ सबइ याजक क होइहीं। 21उहइ दिन, तू पचे एक ठु पवितर सभा

बोलउब्या। तू पचे कउनो काम नहीं करब्या। इ नेम तोहरे सबहिँ घरन मँ हमेसा ही चली।

22“जब तू पचे आपन खेतन क फसल कटब्या तउ खेतन क कोनन सारी फसल जिन काट्या। जउन अन्न भुईया पड़ गिरइ, ओका जिन उठावा। ओका तू पचे गरीब लोगन क अउ तोहरे सबन्क देस मँ जात्रा करइवाले बिदेसियन बरे छोड़ द्या। मई यहोवा तोहार परमेस्सर अहई।”

तुरहियन क त्यौहार

23यहोवा मूसा स फिन कहेस, 24“इस्त्राएल क लोगन स कहा: सतएँ महीना क पहिले दिन तोहका पचन्क आराम क खास दिन मानइ चाही। उ दिन एक पवितर सभा होइ। इ दिना (यहोवा क) याद रखइ अउर तुरही क बजावइ बरे अहइ। 25तोहका कउनो काम नहीं करइ चाही। तू पचे यहोवा क भेंट चढ़ावइ बरे बलि ले अउब्या।”

प्रायश्चित क दिन

26यहोवा मूसा स कहेस, 27“सतएँ महीना क दसवें दिन प्रायश्चित क दिन* होइ। उ दिन क पवितर सभा होइ। तू पचे भोजन नहीं करब्या। अउर तू पचे यहोवा क भेंट चढ़उब्या। 28तू पचे ओह दिन कउनो काम नहीं करब्या। काहेकि इ प्रायश्चित क दिन अहइ। उ दिन याजकन यहोवा क समन्वा जाइ अउ उ तोहार बरे प्रायश्चित करइहीं।

29“अगर कउनो मनई उपवास करइ स मना करत ह तउ ओका आपन लोगन स अलगाइ दीन्ह जाइ। 30अगर कउनो मनई उ दिन काम करी तउ मई ओका ओकरे लोगन मँ स बारबाद करइ देव। 31तोहका कउनो भी काम नहीं करइ चाही। इ नेम तू पचे जहाँ कहीं भी रहब्या, सदा ही रही। 32इ तोहरे सबन्क आराम क खास दिन होइ। तू पचन क भोजन नहीं करइ चाही। तू पचे आराम क इ खास दिन क महीना क नवाँ दिन साँझ* स सुरु करब्या। इ आराम क खास दिन उ साँझ स सुरु कइके अगली साँझ तलक रहत ह।”

कटीर क त्यौहार

33यहोवा मूसा स फुन कहेस, 34“इस्त्राएल क लोगन स कहा: सतएँ महीना क पन्द्रहवें दिन कटीर क त्यौहार होइ। यहोवा बरे इ पवितर त्यौहार सात दिन तक चली। 35पहिले दिन एक धरम सभा होइ। तू पचन्क तब कउनो काम नहीं करइ चाही। 36तू पचे सात दिना तलक यहोवा बरे भेंट चढ़उब्या। अठएँ दिन तू पचे दूसर धरम सभा करब्या। तू पचे यहोवा क भेंट चढ़उब्या। इ एक भेंट सभा होइ। तू पचन्क तब कउनो काम नहीं करइ चाही।

प्रायश्चित क दिन एँका “युम कुप्पुर” भी कहा गवा बाटइ। इ यहूदियन क एक बहोत महत्व क पवितर दिन अहइ। इ दिन महा याजक परमपवितर ठउर मँ जात रहा अउ ओन कामे क करत रहा जेहसे लोगन क पापन क प्रायश्चित होत रहा।

नवाँ दिन साँझ यहूदी लोगन क दिन क आरम्भ साँझ स होत रहा।

37“इ सबइ यहोवा क खास पवित्र दिन अहई। ओन दिन पवित्र सभा होइ। तू पचे यहोवा क होम बलि, अन्नबलि, जनावरन क बलि पेयबलि भेंट क रूप में चढ़उब्या। तू पचे उ सबइ भेंटन क ठीक समइ पइ लइ अउब्या। 38तू पचे यहोवा क सबित दिनन क सुमिरइ क अलावा ओन पवित्र दिनन क त्यौहार मनउब्या। तू पचे ओन बलियन क यहोवा क आपन अन्नबलि क अलावा देब्या। तू पचे बिसेस दीन्ह गए बचन क पूरा करइ क रूप में दीन्ह गइ कउनो भेंट क अलावा ओन चिजियन क देब्या। उ सबइ ओन बिसेस भेंटन क अलावा होइहीं जेनका तू पचे यहोवा क देइ चाहत अहा।

39“सतएँ महीना क पन्द्रहवें दिन, जब तू पचे आपन खेतन स फसल लिआइ चुकब्या, सात दिन तलक यहोवा क त्यौहार मनउब्या। पहिले अउ अठएँ दिन भी आराम क खास दिन होइ चाही। 40पहिले दिन तू पचे फलदार पेड़न स नीक फल लिअउब्या अउ तू पचे खजूर क बृच्छ क डारी, चीड़ अउ बेंते क बृच्छन स डारि लिअउब्या। तू पचे आपन परमेस्सर यहोवा क समन्वा सात दिना तलक त्यौहार मनउब्या। 41तू पचे इ पवित्र दिन क हर साल यहोवा बरे सात दिना तलक मनउब्या। इ नेम सदा ही रही। तू पचे इ पवित्र दिन क सतएँ महीना में मनउब्या। 42तू पचे सात दिना तलक अस्थायी आस्त्रयन में रहब्या। इस्राएल में पइदा भए सबहि लोग ओन आस्त्रयन में रहहीं। 43काहे? एहसे तोहरे सब बंसज इ जनिहीं कि मई इस्राएल क लोगन क अस्थायी आस्त्रयन में रहइवाला ओह समइ बनाएँ जउने समइ मई ओनका मित्र स लिआएँ। मई तोहार परमेस्सर यहोवा अहउँ।”

44इ तरह मूसा इस्राएल क लोगन क यहोवा क खास पवित्र दिनन क बारे में बताएस।

डीबट अउ पवित्र रोटी

24 यहोवा मूसा स कहेस, 2“इस्राएल क लोगन क कुचला भवा जइतून स जइतून क तेल अपने लगे लिआवइ क आदेस द्या। उ तेल दीपकन बरे अहई। इ सबइ दीपक बेबुझे भए लगातार बरत रहइ चाही। 3हारून यहोवा क मिलापवाला तम्बू में करार क सन्दूख क पर्दा क आगे सँझ बेला स भिन्सारे तलक दीपकन क बारे राखी। इ नेम सदा बरे अहइ।

4“हारून क सोना क डीबट पइ यहोवा क समन्वा दीपकन क सदा बरत भवा रखइ चाही।

5“नीक महीन आटा ल्या अउ ओकर बारह रोटी बनावा। हर एक रोटी बरे एपा क दुइ दसवों हींसा आटा क प्रयोग करा। 6ओनका दुइ लाइन में सुनहरी मेजे पइ यहोवा क समन्वा धरा। हर एक लाइन में छः रोटी होइहीं। 7हर एक लाइन पइ सुदुध लोहबान धरा। इ यहोवा बरे भेंट, भोजन क स्मृति हींसा होइ। 8हर एक सबित दिवस क उ रोटियन क यहोवा क समन्वा एक करार क रूप में क्रम में इस्राएल क लोगन क संग हमेसा बरे राखि। 9उ रोटी हारून अउ ओकरे पूतन क होइ। उ पचे रोटियन क पवित्र ठउर में खइहीं। काहेकि उ रोटी यहोवा क चढ़ई गइ भेंटन में स एक अहइ। उ रोटी सदा हारून का हींसा होइ।”

उ मनई जउन यहोवा क सराप दिहस

10एक इस्राएली स्त्री क पूत रहा। ओकर बाप मित्री रहा। इस्राएली स्त्री क इ पूत इस्राएली रहा। उ इस्राएली लोगन क बीच में घूमत रहा अउ उ डेरा में लइब सुरु किहस। 11इस्राएली मेहरारु क लरिका यहोवा क नाउँ क सरापेस ह। एह बरे लोग उ लरिका क मूसा क समन्वा लिआएन। (लरिका क महतारी क नाउँ सलोमीत रहा जउन दान क परिवार समूह स दिब्री क बितिया रही।) 12लोग लरिका क कैदी क तरह धरे रहेन अउ तब तलक जोहत रहेन, जब तलक यहोवा क हुकुम ओनका साफ तरीका स मालूम नाहीं होइ गवा।

13तब यहोवा मूसा स कहेस, 14“उ मनई क डेरा स बाहेर एक ठउरे पइ लिआवा, जउन सराप दिहस ह। तब ओन सबहि लोगन क एक संग बोलावा जउन ओका सराप देत सुनेन ह। उ पचे लोग आपन हाथ ओकरे मूँडे प धरिहीं।* अउर तब सब लोग ओह पइ पाथर स मरिहीं अउ ओका मार डइहीं। 15तोहका पचन्क इस्राएल क लोगन स कहइ चाही: अगर कउनो मनई आपन परमेस्सर क सरापत ह तउ उ मनई क सजा मिलइ चाही। 16कउनो मनई, जउन यहोवा क नाउँ क सरापत ह, जरुर मार दीन्ह जाइ चाही। सब लोगन क ओका पाथर स मारइ चाही। बिदेसी क वइसे भी ही सजा मिलइ चाही जइसे इस्राएल में जन्म लेइवाला मनई क मिलत ह। अगर कउनो मनई यहोवा क नाउँ क सरापत ह तउ ओका जरुर मार देइ चाही।

17“अउर अगर कउनो मनई कउनो दूसर क मार डवत ह तउ ओका जरुर मार डवइ चाही। 18अगर कउनो मनई कउनो मनई क गोरु क मार डवत ह तउ ओकरे बदले में ओका दूसर गोरु देइ चाही।*

19“अगर कउनो मनई अपने पड़ोस में कउनो क चोट पहुँचावत ह तउ उ मनई क उहइ तरह क चोट उ मनई क पहुँचावइ चाही।* 20एक टूटी हड्डी बरे एक टूटी हड्डी, एक आँखी बरे एक ठु आँखी, अउर एक दाँत बरे एक ठु दाँत। उहइ तरह क चोट उ मनई क पहुँचावइ चाही, जइसा उ दूसर क पहुँचाएस ह। 21एह बरे जउन मनई कउनो दूसर मनई क गोरु क मारइ तउ एकरे बदले में ओका दूसर गोरु देइ चाही। मुला जउन मनई कउनो दूसर मनई क मार डवत ह उ जरुर मार डवा जाइ चाही।

22“इहइ नेम तू सबइ लोगन बरे लागू होइ: इ तोहार बीच में रहइवालन बिदेसी अउ तोहरे आपन देसबासियन बरे समान होइ। काहेकि मई तोहर परमेस्सर अहउँ।”

23तब मूसा इस्राएल क लोगन स बात किहस अउर उ पचे उ मनई क डेरा क बाहेर एक ठउर पर लिआएन, जउन सराप दिहे रहा। तब उ पचे ओका पाथर स मार डएन। इ

हाथ ओकरे मूँडे प धरिहीं एहसे पता चलत ह कि उ पचे सब लोग लरिका क सजा देइ में हाथ बटावत रहेन।

दूसर गोरु देइ चाही सव्व क अरथ एकरे बरे भुगतान करा “जीवन बरे जीवन।”

अगर ... चाही इ नेम समाज बरे अपराधन क निहचित करइ बरे एक दिसा निर्दोस अहइ। निजी तरीका स बदला लेइ क बजाय अपराध क मुताबिक सजा समाज क निहचित करब अहइ।

तरह इस्त्राएल क लोग उहइ किहन जउन यहोवा मूसा क हुकुम दिहे रहा।

भुइँयाँ बरे आराम क समइ

25 यहोवा मूसा स सिनाई पहाड़े प कहेस। यहोवा कहेस, 2[॥] इस्त्राएल क लोगन स कहा: तू लोग उ भुइँयाँ प जाब्या जेका मई तू पचन्क देत अहउँ। उ समइ तू पचन्क भुइँयाँ क आराम क समइ जरूर देइ चाही। इ यहोवा क सम्मान देइ बरे भुइँयाँ क आराम क खास समइ होइ। 3[॥] तू पचे छ: बरिस तलक आपने खेतन मँ बिआ बोउब्या। तू पचे आपन अंगूर क बागन मँ छ: बरिस तलक कटनी करब्या अउ ओकर फल स खूब आनन्द लेउब्या। 4[॥] मुला सतएँ बरिस तू पचे उ भुइँयाँ क आराम करइ देब्या। इ यहोवा क सम्मान देइ बरे आराम क खास समइ होइ। तोहका पचन्क आपन खेतन मँ बिआ नाहीं बोवइ चाही अउ अंगूर क बागन मँ बेलन क कटनी नाहीं करइ चाही। 5[॥] तू पचन्क ओन फसलन क कटनी नाहीं करइ चाही जउन फसल कटइ क पाछे अपने आप उगत ह। तू पचन्क आपन ओन अंगूर क बेलन स अंगूर नाहीं उतारइ चाही जेनकइ तू पचे कटनी नाहीं किहे अहा। इ भुइँयाँ क आराम क खास समइ होइ।

6[॥] इ (जउन चीज सतएँ बरिस मँ अपने आप उगत ह) तोहरे बरे भोजन होइ। तोहार मनसेधू अउ मेहरारू दास लोगन बरे मजदूरी प रखा गएन तोहरे मजदूर अउ तोहरे देस मँ रहइवाले बिदेसियन बरे प्रयाप्त भोजन होइ। भोजन रही। 7[॥] तोहरे गोरुअन अउ दूसर जनावरन क खाइ बरे ढेर चारा होइ।

जुबली मुक्ति बरिस

8[॥] तू पचे सात बरिस तलक सात समूहन क गनब्या। इ सबइ उन्नचास बरिस होइहीं। इ समइ क भितरे भुइँयाँ बरे सात बरिस आराम क होइहीं। 9[॥] प्रायश्चित्त क दिन तू सबन्क भेड़ा क सींग बजावइ चाही। उ सतएँ महीना क दसवाँ दिन होइ। तू सबन्क पूरा देस मँ भेड़ा क सींग बजावइ चाही। 10[॥] तू पचे पचासवँ बरिस क बिसेस ल्यौहार मनउब्या। तू पचे आपन देस मँ रहइवाले सबहिँ लोगन क स्वतंत्र घोषित करब्या। इ समइ क “जुबली” कहा जाइ। तू पचन मँ स हर एक आपन भुइँयाँ मँ लउटि जाइ। अउर तू पचन मँ स हर एक आपन परिवार मँ लउटि जाइ। 11[॥] पचासवँ बरिस तोहरे पचन्क बरे खास उत्सव क बरिस होइ। उ बरिस तू पचे बिआ जिन बोआ। अपने आप उगी भइ फसल क जिन काटा। अंगूरे क ओन बेलन स अंगूर जिन ल्या। 12[॥] उ जुबली बरिस अहइ। इ तोहरे पचन बरे पवितर बरिस होइ। तू पचे उ पैदावार क खाब्या जउन तोहरे खेतन स आवति अहइ। 13[॥] जुबली बरिस मँ हर एक मनई क ओकर धरती वापस होइ जाइ।

14[॥] दूसर मनई क आपन भुइँयाँ बेंचइ या खरीदइ मँ जिन ठगा। 15[॥] अगर तू पचे कउनो क भुइँयाँ बेसहइ चाहया तउ पिछले जुबली स काल क गिना करा अउ उ गणना क प्रयोग धरती क ठीक दाम तय करइ बरे करा। अगर तू पचे भुइँयाँ क बेंचत ह, तउ फसलन क कटनी क सबइ बरिस

क गना अउ बरिसन क गणना क उपयोग ठीक दाम तय करे बरे करा। 16[॥] अगर जियादा बरिस अहइँ तउ दाम ऊँच होइ। अगर थोड़ा बरिस अहइँ तउ दाम कमती करा। काहेकि उ मनई तू पचन्क सचमुच कुछ बरिस क फसल बेंचत अहइ। अगली जुबली पइ भुइँयाँ ओकरे परिवार क होइ जाइ। 17[॥] तू सबन्क एक दूसर क ठगइ नाहीं चाही। तू सबन्क आपन परमेस्सर क सम्मान करइ चाही। मई यहोवा तोहार परमेस्सर अहउँ।

18[॥] मोरे नेमन अउ निर्णयन क सुमिरा। ओनकइ पालन करा। तबहिँ तू पचे अपने देस मँ सुरच्छित रहब्या। 19[॥] भुइँयाँ तोहरे बरे उत्तम फसल पइदा करी। तब तोहरे लगे बहोत जियादा भोजन होइ अउर तू पचे आपन देस मँ सुरच्छित रहब्या।

20[॥] मुला साइद तू पचे इ कहा, ‘अगर हम बिआ न बोई या आपन फसल न बटोरी तउ सतएँ बरिस हम लोगन बरे कछु खाइ क तनिकउ भी न रही।’ 21[॥] चिन्ता जिन करा। मई छठवँ बरिस मँ आपन आसीस क तोहरे सबन्क लगे आवइ क हुकुम देब। भुइँयाँ तीन बरिस तलक फसल पइदा करत रही। 22[॥] जब अठएँ बरिस तू पचे बोउब्या तब तलक फसल पइदा करत रही। तू पचे पुरान पैदावार क नवएँ बरिस तलक खात रहब्या जब अठएँ बरिस मँ बोइ भइ फसल घरन मँ आइ जाइ।

सम्पत्ति क नेम

23[॥] असल मँ भुइँयाँ मोरि अहइ। एह बरे तू पचे ऐंका स्थायी रुप मँ नाहीं बेंच सकत्या। तू पचे मोरे संग मोर भुइँयाँ पइ सिरिफ बिदेसी अउ निवासी क रुप मँ रहत बाट्या। 24[॥] कउनो मनई आपन भुइँयाँ बेंच सकत ह, मुला ओकर परिवार हमेसा ही आपन भुइँयाँ वापस पाइ। 25[॥] कउनो मनई तोहरे देस मँ बहोत गरीब होइ सकत ह। उ ऐंतना गरीब होइ सकत ह कि ओका आपन सम्पत्ति बेंचइ क पइइ। अइसी हालत मँ ओकरे निचके क रिस्तेदारन क आगे आवइ चाही अउ आपन रिस्तेदार बरे उ उ सम्पत्ति वापस बेसहइ चाही। 26[॥] कउनो मनई क कउनो अइसा नजदीकी रिस्तेदार नाहीं। भी होइ सकत ह जउन ओकरे बरे सम्पत्ति वापस खरीदइ। मुला होइ सकत ह उ खुद भुइँयाँ क वापस बेसहइ बरे ढेर क धन पाइ लेइ। 27[॥] तउ ओका जब स भुइँयाँ बिकी रही तब स बरिसन क गनइ चाही। ओका उ गणना क उपयोग, भुइँयाँ क दाम निहचित करइ बरे करइ चाही। तब ओका भुइँयाँ क वापस बेसहइ चाही। तब भुइँयाँ फुन ओकर होइ जाइ। 28[॥] मुला अगर उ मनई आपन बरे भुइँयाँ क वापस बेसहइ बरे ढेर क धन नाहीं जुटाइ पावत तउ जउन कछू उ बेंचेस ह उ उ मनई क हाथे मँ जउन ओका बेसहेस ह, जुबली क ल्यौहार क आवइ तलक रही। तब उ खास उत्सव क समइ भुइँयाँ पहिले भू स्वामी क परिवार क होइ जाइ। इ तरह सम्पत्ति फुन मूल आधिकारी परिवार क ही होइ जाइ।

29[॥] अगर कउनो मनई नगर परकोटा क भीतर आपन बेंचत ह तउ घरे क बेंचा जाइ क पाछे एक बरिस तलक ओका वापस लेइ क अधिकार होइ। घर क वापस लेइ क

ओकर अधिकार एक बरिस तलक रही। 30 मुला अगर घरे क मालिक एक पूरा बरिस बीत जाइ क पहिले आपन घर वापस नहीं बेसहत तउ नगर परकोटा क भीतर क घर जउन मनई बेसहत ह ओकर अउ ओकरे बसजन क होइ जात ह। जुबली क समइ पहिल गृह स्वामी क वापस नहीं होइ। 31 बगैर परकोटा वाला नगर खुला मैदान माना जइहीं। एह बरे ओन छोटे नगरन में बने भए घर जुबली क त्यौहार क समइ पहिले गृह स्वामी क वापस होइहीं।

32 "मुला लेवियन क नगर क बारे में: जउर सहरन लेवियन क आपन अहई, ओनमें उ सबइ आपन घरन क कउनो भी समइ वापस खरीद सकत हीं। 33 अगर कउनो मनई लेवी स कउनो घर खरीदइ तउ लेवियन क उ घर फुन जुबली क अवसर में लउटइ जाइ। काहेकि उ घर उ लेवियन क अउ ओकरे परिवारे क अहइ जउन इस्राएली लोगन क बीच रहत ह। 34 लेवी नगरन क चारिहूँ कइँती क खेत अउर चरागाह बेचा नहीं जाइ सकतेन। उ सबइ खेत सदा लेवियन क अहई।

दासन क सुआमियन क नेम

35 "साइद तोहरे देस क मनई ऐतना गरीब होइ जाइ कि आपन भरण पोषण न कइ सकइ। तू पचे ओका कउनो दूसर नागरिक या बिदेसी निवासी क तरह तोहारे संग जरूर रहइ देइ चाही। 36 ओका दीन्ह गए आपन कर्जा पइ कउनो सूद जिन ल्या। आपन परमेस्सर क सम्मान करा अउ आपन भाई क अपने साथे रहइ द्या। 37 ओका सूद पइ पइसा उधार जिन द्या। जउन भोजन उ करइ, ओह पइ कउनो फायदा लेइ क कोसिस जिन करा। 38 मई तोहार परमेस्सर यहोवा अहउँ। मई तू पचन्क मिस्त्र देस स कनान प्रदेस देइ अउ तोहार परमेस्सर बनइ बरे बाहेर लाएँ।

39 "इ होइ सकत ह कि तोहार कउनो भाई ऐतना गरीब होइ जाइ कि उ दास क रूप में तू पचन्क अपने क बेंच देइ। तोहका ओसे दास क तरह काम नाही लेइ चाही। 40 उ जुबली बरिस तलक मजदूर अउ एक अतिथि क तरह तोहरे संग रही। 41 तब उ तू सबन्क छोड़ सकत ह। उ आपन बच्चन क अपने संग लइ जाइ सकत ह अउ आपन परिवार में लउट सकत ह। उ आपन पुरखन क सम्पत्ति क लउटाइ सकत ह। 42 काहेकि उ पचे मोर सेवक अहई। मई ओनका मिस्त्र क गुलामी स अजाद किहेउँ ह। ओनका फुन स दास नाही होइ चाही। 43 तोहका सबन्क अइसे लोगन पइ क्रूर होइके सासन नाही करइ चाही। तोहका पचन्क अपने परमेस्सर क सम्मान जरूर करइ चाही।

44 "तोहरे दास दासियन क बारे में: तू पचे आपन चारिहूँ कइँती क रास्ट्रन स दास अउ दासियन क लइ सकत ह। 45 अगर तोहरे देस में रहइवाले बिदेसियन क परिवारन क बच्चन तोहरे लगे आवत हीं तउ तू पचे ओनका भी दास रख सकत ह। उ सबइ बच्चन तोहार दास होइहीं। 46 तू सबइ इ बिदेसी दासन क आपन बच्चन क भी दइ सकत ह जउन तोहरे मरइ क पाछे तोहरे बच्चन क होइहीं। उ पचे सदा तोहार दास रहहीं। तू पचे इ बिदेसियन क गुलाम बनाइ

सकत ह। मुला तू पचन्क आपन भाइयन, इस्राएल क लोगन पइ क्रूर होइके सासन नाही करइ चाही।

47 "होइ सकत ह कि कउनो बिदेसी या अस्थायी निवासी तोहरे बीच धनी होइ जाइ। सम्भव अहइ कि तोहरे देस क कउनो मनई ऐतना गरीब होइ जाइ कि उ आपन क तोहरे बीच रहइवाले धनी बिदेसी क हाथ या बिदेसी परिवार क कउनो सदस्य क हाथ दास क रूप में बेंचइ। 48 उ मनई वापस खरीदा जाइ अउ अजाद होइ क अधिकारी होइ। ओकरे भाइयन में स कउनो भी ओका वापस बेसहि सकत ह 49 या ओकर चाचा, मामा व चचेरा, ममेरा भाई ओका वापस बेसहि सकत हीं या ओकरे निचके क रिस्तेदारन में स ओका कउनो खरीद सकत ह या अगर मनई ढेर क धन पावत ह तउ खुद धन दइके उ फुन अजाद होइ सकत ह।

50 "तू पचे ओकर दाम कइसे निहचित करब्या? तू पचे बिदेसी क लगे जब स उ अपने क बेंचेस ह तब स अगली जुबली तलक क बरिसन क गनब्या, उ आपन क जुबली क बरिस तलक बेचेस ह। उ गणना क उपयोग दाम तय करइ में प्रयोग करा। काहेकि असल में उ मनई कछू बरिसन बरे ओका मजदूरी पइ राखेस। 51 अगर जुबली क बरिस क पहिले कइउ बरिस होइ जाइँ तउ मनई क दाम क बड़का हींसा लउटावइ चाही। इ ओन बरिसन क गनती पइ टिका बाटइ। 52 अगर जुबली क बरिस तलक कछू ही बरिस बाकी होइँ तउ मनई मूल कीमत क थोड़ा सा हींसा लउटावइ चाही। 53 मुला उ मनई हर बरिस बिदेसी क हिआँ मजदूर क तरह रही, बिदेसी क उ मनई पइ क्रूर होइके सासन न करइ द्या।

54 "उ मनई कउनो क जरिये वापस न बेसहा जाइ पइ भी अजाद होइ। जुबली क बरिस उ अउ ओकरे बच्चन अजाद होइ जइहीं। 55 काहेकि इस्राएल क लोग मोर सेवक अहई। उ पचे मोर सेवक अहई जउन क मई मिस्त्र क गुलमी स अजाद किहेउँ। मई तोहार परमेस्सर यहोवा अहउँ।

परमेस्सर क आग्या मानइ क पुरस्कार

26 "अपने बरे मूर्तियन जिन बनावा। मूर्तियन या यादगार क पाथर क स्थापना जिन करा। आपन देस में उपासना करइ बरे पाथर क मूर्तियन क स्थापना जिन करा। काहेकि मई यहोवा तोहार परमेस्सर अहउँ।

2 "मोरे आराम क खास दिनन क याद रखा अउ मोरे पवित्र स्थान क सम्मान करा। मई यहोवा अहउँ।

3 "मोर नेमन अउ आदेसन क याद रखा अउ ओनकर पालन करा। 4 अगर तू पचे अइसा करब्या तउ मई जउने समइ बर्खा आवइ चाही, उहइ समइया में बर्खा कराउब। भुईँया फसलन क पइदा करिहीं अउर बृच्छ आपन फल देइहीं। 5 तोहार अनाज निकारइ क काम तब तलक चली जब तलक अंगूर एकट्ठा करइ क समइ आइ अउ अंगूरे क बटोरब तब तलक चली जब तलक बोवाइ क समइ आइ जाइ। तब तोहरे लगे खाइ क बहोत होइ, अउर तू पचे आपन पहेँटा में सुरच्छित रहब्या। 6 मई तोहरे देस क सान्ति देब। तू पचे सान्ति स सोइ सकब्या। कउनो मनई डरवावइ

नाहीं आइ। मई बिनास करइवाले जनावरन क तोहरे देस स बाहेर रखब। अउर फउज भी तोहरे देस स न गुजरिहीं।

7“तू पचे आपन दुस्मनन क पाछा कइके भगउब्या अउर ओनका हरउब्या। तू पचे ओनका आपन तरवार स मारि डउब्या। 8तोहरे पाँच मनई सौ मनईयन क पाछा कइके भगाइ देइहीं अउर सौ मनई दस हजार मनईयन क पाछा कइके भगाइ देइहीं। तू पचे आपन दुस्मनन क हरउब्या अउ ओनका तरवारे स मार डउब्या।

9“तब मई तोहरी कइँती मुडबउँ। मई तू पचन्क बहोत स बच्चावाला बनउबउँ। मई तोहरे संग आपन वाचा क पालन करबउँ। 10तोहरे लगे एक बरिस स जियादा चलइवाली ढेर क पइदावार होइ। तू पचे नई फसल कटब्या। मुला तब तोहका पुरान पइदावार नई पइदावार बरे जगह बनवइ खातिर फेंक देइ क पड़ी। 11तू पचन क बीच मँ मई आपन पवित्तर तम्बू लगाउब। मई तू लोगन क नाहीं तजिबय। 12मई तोहरे संग चलब अउर तोहार परमेस्सर रहब। तू पचे मोर आपन लोग रहब्या। 13मई तोहार परमेस्सर यहोवा अहउँ। तू पचे मिस्र मँ दास रह्या। मुला मई तू पचन्क बाहेर लिआएउँ। तू लोग दास क रुप मँ भारी बोझा ढोवइ स निहुरा भए रह्या मुला मई तोहरे कधि क जुए क तोड़ फेंकेउँ। मई तू पचन्क फुन गरब स चलइवाला बनाएँ।

यहोवा क आग्या पालन न करइ बरे सजा

14“मुला अगर तू मोर आग्या क पालन नाहीं करब्या अउर मोर इ सबइ आदेस क नाहीं मनब्या तउ इ सबइ बुरी बात होइहीं। 15अगर तू मोर नेम अउ आदेसन क रद्द करब्या अउर ओनका पालन करइ मँ फेल होब्या। तउ तू पचे मोर करार क भंग कइ देब। 16अगर तू पचे अइसा करत अहा तउ मई अइसा करबउँ कि तोहार सबन्क भयंकर अनिस्ट होइ। मई तू पचन्क लाइलाज रोग अउ तेज बोखार लगाउब। उ सबइ तोहरी अँखियन क नस्ट करिहीं अउ तोहार जिन्गी लइ लेइहीं। जब तू पचे आपन बिआ बोउब्या तउ तू पचन्क कामयाबी न मिली। तोहार पइदावार क तोहार दुस्मन लोग खइहीं। 17मई तोहरे खिलाफ होब, तोहार दुस्मन तोहका हरइहीं। उ सबइ दुस्मन तोहसे घिना करिहीं अउ तोहरे ऊपर सासन करिहीं। तू पचे तब भी पराइ जाब्या, जब तोहार पाछा कउनो न करत रहा होइ।

18“अगर ऐंकरे पाछे भी तू पचे मोर आग्या क नाहीं मानत अहा तउ मई तोहरे पापन बरे सात गुना जियादा सजा देब। 19मई ओन बड़के सहरन क भी नस्ट करब जउन तोहका घमण्डी बनावत हीं। आकास बर्खा न देइ अउ धरती पइदावार नाहीं उपजाइ।* 20तू पचे कठिन परिस्त्रम करब्या, मुला एहसे कछू भी न होइ। तोहरी भुइँया मँ कउनो पइदावार न होइ अउर तोहरे बृच्छन प फल नाहीं अइहीं।

21“अगर तब भी तू पचे मोरे खिलाफ जात ह्या अउर मोरी आग्या क मानब स्वीकार नाहीं करत ह्या तउ मई सात गुना कठोर होइके मारब। जेतना जियादा पाप करब्या ओतना

जियादा सजा पउब्या। 22मई तोहरे सबन्क खिलाफ जंगली जनावर पठउब। उ सबइ तोहरे गदेलन क तोहसे छोर लइ जइहीं। उ पचे तोहरे गोरुअन क नास कइ देइहीं। उ पचे तोहार मनइयन क गनती बहोत कम कइ देइहीं। लोग जात्रा करइ स डेराइ जइहीं, सड़क खाली होइ जइहीं।

23“अगर ओन चीजन क होइ प तू पचन्क सिच्छा नाहीं मिलत अउर तू पचे मोरे बिरुद्ध होइ जात ह्या, 24तउ मई तोहरे बिरुद्ध होब। मई, हॉ, मई (यहोवा) तोहरे पापन बरे सात गुना सजा देब। 25तू पचे मोर वाचा तोड़्या ह, एह बरे मई तू सबन क दण्ड देब। मई तोहरे खिलाफ फउज क पठउब। तू पचे सुरच्छा बरे आपन सहरन मँ जाब्या। मुला मई अइसा करब कि तू लोगन मँ बेगामी सँचरइँ। तब तोहार दुस्मन तोहका हराइ देइहीं। 26मई उ सहर मँ छोड़े गए अन्न क एक हींसा तोहका देब। मुला खाइ बरे बहोत कम अनाज रही। दस मेहररुअन आपन सबहिं रोटियन एक चूल्हा मँ सेकं सकिहीं। उ पचे रोटी क हर एक टूका क नपिहीं। तू पचे खाब्या, मुला फुन भी भूखा रहब्या।

27“अगर तू पचे खतना पइ भी मोर बातन क सुनब अंगीकार नाहीं करत ह्या, अउर मोरे बिरुद्ध रहत ह, 28तउ मई असलियत मँ आपन किरोध परगट करब। मई, हॉ, मई (यहोवा), तू पचन्क तोहरे पापन बरे सात गुना दण्ड देब। 29तू पचे आपन पूत, बितियन क तने क खाब्या। 30मई तोहरे ऊँचे ठउरन* क नस्ट करब। मई तोहार सुगन्धि वाली वेदियन क काट डाउब। मई तोहरे लहासन क तोहरे निर्जीव मूर्तियन क लहासन पइ डाउब। तू पचे मोका बहोत जियादा घिनौना लगब्या। 31मई तोहरे सहरन क नस्ट करब। मई तोहार पवित्तर ठउर क खाली कइ देब। मई तोहार महकउआ सुगन्धित भेंटन क अंगीकार नाही करब। 32मई तोहरे देस क एतना खाली कइ देब कि तोहरे दुस्मन तलक जउन एहमँ रहइ अइहीं, उ पचे ऐंह पइ चकित होइ जइहीं। 33अउर मई तू पचन क अलग अलग पहुँटन मँ बिखराउब। मई आपन तरवार हींचब अउ तू सबन्क नास करब। तोहार भुइँया खाली होइ जाइ अउ तोहार नगर उजाइ होइ जइहीं।

34“तू पचे आपन सत्रु क देसन मँ लइ जावा जाब्या। जब तोहार धरती क खाली कइ देइ जाइ उ समइ इ आपन सबित क बिस्त्राम मनाइ। 35जेका तू पचे ओका तब नाहीं दिहे रह्या जब तू पचे ओह पइ रहत रह्या। 36उत्तरजीवी आपन दुस्मनन क देस मँ हिम्मत खोइ देइहीं। उ हर चीज स डेरात होइहीं। उ पचे हवा क जरिये हिलइवाला पाती क आवाज़ स भी डेराइ जाइ अउर ओकरे कारण उ सबइ अइसेन परइहीं मान ल्या कउनो तरवार लिए भए ओनकर पाछा करत होइ। बिना केहू क पाछा कइ भए भी उ पचन्क गिरि जाब। 37उ पचे एक दूसरे पइ तब भी गिरिहीं, जब कउनो भी ओनकर पाछा नाहीं करत रहा होइ।

“तू पचे ऐंता सक्तीसाली नाहीं रहब्या कि आपन दुस्मनन क मुकाबला मँ खड़ा होइ सका। 38तू दूसर लोगन मँ बिलाइ जाब्या। तू पचे आपन दुस्मनन क देस मँ लुप्त होइ जाब्या। 39इ तरह तोहार सन्तानन तोहरे दुस्मनन क देस मँ आपन

आकास ... उपजाइ सब्द क अरथ, “तोहरे बरे आकास लोहा स होइ अउर भुइँया काँसे जइसी।”

ऊँचे ठउरन परमेस्सर या झूठे देवतन क उपासना क ठउर। इ सबइ ठउर अक्सर पहाड़ी अउ पर्वत प बनाव जात रहेन।

पापन में सड़िहीं। उ पचे आपन पापन में वइसे ही सड़िहीं जइसे ओनके पुरखन सड़ा रहेन।

आसा हमेसा रहत ह

40“इ होइ सकत ह कि लोग आपन पापनक कबूल लेई अउर उ पचे आपन पुरखन क पापनक स्वीकार करिहीं। होइ सकत ह कि उ पचे कबूलई कि उ पचे मोरे खिलाफ भएन ह। इ होइ सकत ह उ पचे इ कबूल लेई कि उ पचे मोरे खिलाफ पाप किहे अहई। 41इ होइ सकत ह कि उ पचे स्वीकार करई कि मई ओनके खिलाफ भाएई अउ ओनका ओनके दुस्मनन क देस में लाएई। अगर उ पचे विनम्र होइ जाई अउ आपन पापन बरे सजा क कबूल लेई। 42तउ मई याकूब क संग क आपन वाचा क सुमिरब। इसहाक क संग क आपन वाचा क सुमिरब। इब्राहीम क संग कीन्ह गए वाचा क सुमिरब अउर मई उ भुईया क सुमिरब।

43“भुईया खाली रही। भुईया आराम क समइ क आनन्द लेइ। तब तोहरे बचे भए लोग आपन पाप बरे सजा क कबूल लेइहीं। उ पचे सिखिहीं कि ओनका एह बरे सजा मिली कि उ पचे मोर व्यवस्था स घिना किहेन अउ नेमन क पालन करब स्वीकार नहीं किहेन। 44उ पचे पुरे पाप किहेन। मुला अगर उ पचे मोरे लगे मदद बरे आवत हीं तउ मई ओनसे दूर नहीं रहब। मई ओनकइ बातन तब भी सुनब जब उ पचे आपन दुस्मनन क देस में भी होइहीं। मई ओनका पूरी तरह नस्ट नहीं करब। मई ओनके संग आपन वाचा क भंग न करब। काहेकि मई यहोवा ओनकर परमेस्सर अहई। 45मई ओनके पुरखन क संग कीन्ह गइ वाचा क याद रखब। मई ओनके पुरखन क मिस्त्र स बाहेर लिआएई कि मई ओनकर परमेस्सर होइ सकई। दूसर सबइ रास्ट्रन ओन बातन क लखेन। मई यहोवा अहई।”

46इ सबइ उ सबइ नेमन, कानून अउर उपदेस अहई जेनका यहोवा इस्त्राएल क लोगन क दिहस। उ सबइ कानून इस्त्राएल क लोगन अउ यहोवा क बीच करार अहइ। यहोवा ओन कानून क सिनाई पहाड़े प दिहे रहा। उ मूसा क नेम दिहस अउ मूसा ओनका लोगन क दिहस।

बचन क महत्व बाटइ

27 यहोवा मूसा स कहेस, 2“इस्त्राएल क लोगन स कहा: कउनो मनई यहोवा क खास बचन दइ सकत ह। उ मनई यहोवा क कउनो मनई क अर्पित करइ क बचन दइ सकत ह। उ मनई यहोवा क सेवा खास तरीका स करी। याजक उ मनई बरे बिसेस दाम निहचित करी। अगर लोग ओका यहोवा स वापस बेसहइ चाहत हीं तउ उ पचे दाम देइहीं। 3बीस स साठ बरिस उमिर तलक क मनसेधू क दाम पचास सेकेल चाँदी होइ। तू पचन क चाँदी क तौलइ बरे पवितर ठउर क सेकेल क अनुसार उपयोग करइ चाही। 4बीस स साठ बरिस उमिर तलक क मेहरारु क दाम तीस सेकेल होइ। 5पाँच स बीस बरिस उमिर तलक क मनसेधू क दाम बीस सेकेल होइ। पाँच स बीस बरिस उमिर तलक क मेहरारु क दाम दस सेकेल होइ। 6एक महीना स पाँच बरिस क उमिर तलक क बालक क दाम

पाँच सेकेल होइ। एक लरिकी क दाम तीन सेकेल होइ। 7साठ या साठ स जियाद अवस्था क मनसेधू क दाम पन्द्रह सेकेल होइ। एक मेहरारु क दाम दस सेकेल होइ।

8“अगर मनई ऐतना गरीब अहइ कि दाम देइ में समर्थ नहीं अहइ तउ उ मनई क याजक समन्वा लिआवा। याजक इ निहचित करी कि उ मनई केतना दाम भुगतान में दइ सकत ह।

यहोवा क भेंट

9“कछू गोरुअन क उपयोग यहोवा क बलि क रुप में कीन्ह जाइ सकत ह। अगर कउनो मनई ओन गोरुअन में स कउनो क लिआवत ह तउ उ गोरु पवितर होइ जाइ। 10उ मनई यहोवा क उ गोरु क देइ क बचन देत ह। एह बरे उ मनई क उ गोरु क जगह पइ दूसर गोरु रखइ क कोसिस नहीं करइ चाही। ओका नीक गोरु क बुरे गोरु स नहीं बदलइ चाही। ओका बुरे गोरु क नीक गोरु स नहीं बदलइ चाही। अगर उ मनई दुइनई गोरुअन क बदलइ चाहत ह तउ दुइनई, उ गोरु अउ बदलइ भइ गोरु पवितर होइ जइहीं।

11“कछू गोरुअन यहोवा क बलि क रुप में नहीं भेंट कीन्ह जाइ सकतेन। अगर कउनो मनई ओन असुद्ध गोरुअन में स कउनो क यहोवा बरे लिआवत ह तउ उ गोरु याजक क समन्वा लिआवा जाइ चाही। 12याजक उ गोरु क दाम उ नीक या बुरे अहइ क अनुसार निहचित करी। जउन दाम याजक निहचित करत ह उहइ मकान क दाम अहइ। 13अगर मनई गोरु क वापस बेसहइ चाहत ह* तउ ओका दाम में पाँचवाँ हीसा अउर जोड़इ चाही।

यहोवा क भेंट कीन्ह गए मकान क दाम

14“अगर कउनो मनई आपन मकान क पवितर मकान क रुप में यहोवा क अर्पित करत ह, तउ याजक क एकर दाम नीक या बुरा अहइ क अनुसार निहचित करी। जउन दाम याजक निहचित करत ह उहइ मकान क दाम अहइ। 15मुला उ मनई जउन मकान अर्पित करत ह अगर ओका वापस खरीदइ चाहत ह तउ ओका दाम में पाँचवाँ हीसा जोड़इ चाही। तब घर उ मनई क होइ जाइ।

सम्पत्ति क दाम

16“अगर कउनो मनई अपने खेते क कउनो हीसा यहोवा क अर्पित करत ह तउ ओन खेतन क दाम ओनका बोवइ बरे जरुरी बिआ पइ टिका होइ। एक होमेर* जौ क बिआ क कीमत चाँदी क पचास सेकेल होइ। 17अगर मनई जुबली क बरिस खेत क दान करत ह तब दाम उ होइ जउन

वापस बेसहइ चाहत ह पहिलौठा बच्चा या गोरु यहोवा क दीन्ह जात रहेन। मुला गधन क तरह बच्चन क बलि नहीं दीन्ह जात रही। इ तरह मनई पहिला पइव भए क याजक क देत रहा। याजक दाम निहचित करत रहा, अउर मनई पहिले पइव भए क धन या बलि चढ़ावइ जोगग गोरु स वापस बेसहत रहा।

एक होमेर माप वाली झुरान बिअन क तउल। इ लगभग छः बुसल।

याजक निहचित करी। 18 मुला मनई अगर जुबली क पाछे खेत क दान करत ह तउ याजक क असली दाम तय करइ चाही। ओका अगले जुबली बरिस तलक क बरिसन क गनइ चाही। तब उ गणना उपयोग दाम निहचित करइ बरे करी। 19 अगर खेत क दानी मनई खेत क वापस बेसहा चाहउ तउ ओकरे दाम मँ पाँचवाँ हीसा अउर जोड़ा जाइ। 20 अगर उ मनई खेत क वापस नाहीं बेसहत ह तउ खेत सदा याजकन क होइ। अगर खेत कउनो दूसर क बेचा जात ह तउ पहिला मनई ओका वापस नाहीं बेसहि सकत। 21 अगर उ मनई खेत क वापस नाहीं बेसहत ह तउ जुबली क बरिस खेत सिरिफ यहोवा बरे पवितर रही। इ सदा ही याजकन क रही। इ उ भूँइ क तरह होइ जउन पूरी तरह यहोवा क दइ दीन्ह गइ होइ।

22 “अगर कउनो आपन खेते क यहोवा क अर्पित करत ह जउन ओकरी निजी सम्पत्ति क हीसा नाहीं अहइ। 23 तब याजक क जुबली क बरिस तलक बरिसन क जरूर गनइ चाही। अउ ओका खेत क दाम भी जरूर निहचित करइ चाही। तब उ खेत यहोवा क होइ। 24 जुबली क बरिस उ खेत मूल भू सुआमी क पास चला जाइ। उ ओह परिवार क जाइ जउन ओकर सुआमी अहइ।

25 “तोहका पवितर स्थान क सेकेल क अनुसार उपयोग ओन दाम क अदा करइ बरे करइ चाही। पवितर ठउर क प्रमाण क सेकेल क तउल बीस गेरा* अहइ।

गोरुअन क दाम

26 “लोग गोरुअन अउ भेड़न क यहोवा क दान दइ सकत हीं, मुला अगर गोरु पहिला पइदा भवा अहइ तउ उ गोरु जन्म स ही यहोवा क अहइ। एह बरे लोग पहिला पइदा भवा गोरु क दान नाहीं दइ सकतेन। 27 लोगन क पहिला पइदा भवा गोरु यहोवा क जरूर देइ चाही। मुला

अगर पहिला पइदा भवा गोरु असुद्ध अहइ, तउ मनई क उ गोरु क वापस जरूर बेसहइ चाही। याजक उ गोरु क दाम निहचित करी अउर मनई क उ दाम क पाँचवाँ हीसा ओहमँ जोरि देइ। अगर मनई गोरु क वापस नाहीं खरीदत तउ याजक क आपन निहचित कीन्ह गए दाम पइ ओका जरूर बेंच देइ चाही।

बिसेस भेंट

28 “एक ठु बिसेस तरह क भेंट* अहइ जेका लोग यहोवा क चढ़ावत हीं। उ भेंट न वापस खरीदी जाइ सकत ह न तउ बेची जाइ सकत ह। उ भेंट यहोवा क अहइ। इ बहोत पवितर अहइ। उ तरह क भेंटन अइसे लोग, गोरु अउर खेत अहईं, जउन परिवारे क सम्पत्ति अहइ।

29 “अगर उ बिसेस प्रकार क यहोवा क भेंट कउनो मनई अहइ तउ ओका वापस बेसहा नाहीं जाइ सकत। ओका जरूर मार दीन्ह जाइ चाही।

30 “सबहिं पइदावारन क दसवाँ हीसा यहोवा क अहइ। एहमँ खेतन, फसलन अउ बृच्छन क फल सामिल अहईं। उ दसवाँ हीसा यहोवा क अहइ। 31 एह बरे कउनो मनई आपन दसवाँ हीसा वापस लेइ चाहत ह तउ ओकरे दाम क पाँचवाँ हीसा ओहमँ जोड़इ चाही अउ वापस खरीदइ चाही।

32 “याजक मनइयन क गोरुअन अउ भेड़िन मँ स हर दसवाँ जनावर लेइ। हर दसवाँ जनावर यहोवा क होइ। 33 मालिक क इ चिन्ता नाहीं करइ चाही कि उ जनावर नीक अहइ या बुरा। ओका जनावर क दूसर जनावर स नाहीं बदलइ चाही। अगर उ बदलइ क निहचय करत ह तउ दुइनउँ जनावर यहोवा क होइहीं। उ जनावर वापस नाहीं बेसहा जाइ सकत।” 34 इ सबइ उ आदेसन अहईं जेनका यहोवा सिनाइ पहाड़ पइ मूसा क दिहस। इ सबइ आदेस इस्त्राएल क लोगन बरे अहईं।

License Agreement for Bible Texts

World Bible Translation Center

Last Updated: September 21, 2006

Copyright © 2006 by World Bible Translation Center

All rights reserved.

These Scriptures:

- Are copyrighted by World Bible Translation Center.
- Are not public domain.
- May not be altered or modified in any form.
- May not be sold or offered for sale in any form.
- May not be used for commercial purposes (including, but not limited to, use in advertising or Web banners used for the purpose of selling online ad space).
- May be distributed without modification in electronic form for non-commercial use. However, they may not be hosted on any kind of server (including a Web or ftp server) without written permission. A copy of this license (without modification) must also be included.
- May be quoted for any purpose, up to 1,000 verses, without written permission. However, the extent of quotation must not comprise a complete book nor should it amount to more than 50% of the work in which it is quoted. A copyright notice must appear on the title or copyright page using this pattern: "Taken from the HOLY BIBLE: EASY-TO-READ VERSION™ © 2006 by World Bible Translation Center, Inc. and used by permission." If the text quoted is from one of WBTC's non-English versions, the printed title of the actual text quoted will be substituted for "HOLY BIBLE: EASY-TO-READ VERSION™." The copyright notice must appear in English or be translated into another language. When quotations from WBTC's text are used in non-saleable media, such as church bulletins, orders of service, posters, transparencies or similar media, a complete copyright notice is not required, but the initials of the version (such as "ERV" for the Easy-to-Read Version™ in English) must appear at the end of each quotation.

Any use of these Scriptures other than those listed above is prohibited. For additional rights and permission for usage, such as the use of WBTC's text on a Web site, or for clarification of any of the above, please contact World Bible Translation Center in writing or by email at distribution@wbtc.com.

World Bible Translation Center

P.O. Box 820648

Fort Worth, Texas 76182, USA

Telephone: 1-817-595-1664

Toll-Free in US: 1-888-54-BIBLE

E-mail: info@wbtc.com

WBTC's web site – World Bible Translation Center's web site: <http://www.wbtc.org>

Order online – To order a copy of our texts online, go to: <http://www.wbtc.org>

Current license agreement – This license is subject to change without notice. The current license can be found at: <http://www.wbtc.org/downloads/biblelicense.htm>

Trouble viewing this file – If the text in this document does not display correctly, use Adobe Acrobat Reader 5.0 or higher. Download Adobe Acrobat Reader from: <http://www.adobe.com/products/acrobat/readstep2.html>

Viewing Chinese or Korean PDFs – To view the Chinese or Korean PDFs, it may be necessary to download the Chinese Simplified or Korean font pack from Adobe. Download the font packs from: <http://www.adobe.com/products/acrobat/acrrasianfontpack.html>